

A. Baibil
Risei rang 1
Thupui: Baibil Pathian thu
Itep rang: 2 Tim.3:16; Mat.16:17; 2 Pet.1:21

A thiltum: Miriamhei imangin Pathianin Baibil hih arziak.

1. Baibil: Baibil hi Grik ðong ‘Biblia’ ti ata ila suak a nit; a omzia chu “Lekhabuhei itina a nit. Baibil a hin lekhabu dang dang 66 a oma; khahei khah hong inrichinin lekhabu khatka isiam a nit a, “Pathian lekhabu Rithiang” ibe a nit. Baibil hi Kristian sakhua bu ai nit angka Kristian sakhua lekhabu iti hih arming riput dan khom a nit. Baibil mithiam Jerome-an chu “Pathian thu hei omna mun,” itin ai be a nit.

2. Pathian rithuakkhum a nitzia: Baibil a thu om tin hei hih :Pathian rithuakkhuma riziak,” (2 Tim.3:16) iti a nit a. A omzia chu Pathianin miriam hei a pól a an ring theina ranga thu a inriat riziaka an isia, tina a nit.

3. Bible riziaktuhei neh an riziak dan: Baibil Pumpui hi inika ðhen a nit a; i) Thuthlung lui neh ii) Thuthlung Thar a nit. Thuthlung luia bu 39 a oma, Thuthlung Thar a bu 27. Hi lekhabu riziaktu hei hih mi 40 neka tam ini rangin an iam. Khante, an riziak hun sung khom hih kum 1,600 (kum sanglei rizarukka) vel ini rangin an i-iam a nit.

Khangka dor kum itam sunga mi dang dangin lekhabu an lei irziak khah mi khatka kutsuak angka dora a thuhei rizom theia ai om hih Pathian rithuak khum a nitna a nit. Baibil a hin Pathian kut ngeia riziak iom ei iriat chu “Thupek som” (Ten commandments) (Exo.31:18) hi a nit.

Miriam hei imanga riziak a nit dan chu ri-ang zit ual maka; a ðhen inlarna rithokin a nit a, aþhen Rithla Rithiang polnaa rithok a nit a, a ðhen Pathian sinthotheina ritha an irtem neh an iriat a rithoka riziak a nit.

1. Ei riat ranga a tul:

1) Baibil hih Pathianin a mihei imanga a irziak ai nit angka ipom tlak a nit.

2) Jisua Krista khomin a dik itin a ipom a nit (Mat.5:18; Joh.5:46,47).

3) Baibil a thumal tin hei hih dikino om viat iloia Pathianin miriam hei kut imanga a irziak angkana ringai rang chu ni mak.

4) Arziaktu mize dang dang sikin ai tum khatka nikhomseh isir dan dang viat viat a om thei iti reh rang a nit.

5) A thûn ai tum tak isirsuak dan fel tókno khomseh arziaktu hih miriam a nit iti ireh mai a ðhat.

6) Baibil a thuhei hih riziak rilôn (Re-write) mai ai nit banah ðong dang danga ilet nok (translate) a nit sikin riziak insual neh ilet insual a om thei iti iria a ðhat.

7) Baibil Thuthlunglui pumpui hi Hebrai tonga riziak a lei nit a, Thuthlung Thar hih Grik tonga riziak a nit.

Richang Spel: 2 Tim.3:16: : Ei sakho thurithup roinpuizia hih iphial thei ni ni mak a; Ani chu miriam mêl riputin a zuang ilang a, Rithla khan â dikzia ân lang a, Vântirtônhei khomin an mu a. Ani chu nam tin lâiah puang indar a nit a; Rammual pumpuia mihein an iam a, roinpuinaah zuk ilan a om tâk.

Þongridon:

1. ‘Baibil’ hih iðong ata la suakim ai nit? neh itinam ai nit?

2. Baibil lekhabu 66 hei inrichina lekhabu khatka isiam anit nungin im arming ai nit?

3. Baible a thu om tin khah im ai nit?

4. Baibil pumpui hi mi idorka neh kum idorka sunga riziakim a nit ei iti khah?

5. Baibil a Pathian kut ngeia riziak khah ithûm ei iti kha?

6. Baibil hi iðonga riziakim an lei nit ei iti kha?

7. Baibil hi miriam hei imanga riziak a nit dan ni riat danin isir ta?

Risei rang 2
Thupui: Bible bu ridot dan
Itep rang: Luka 24:44

A thiltum: Pathian ngaituana rithup Bible in a phuang.

Baibil bu hei hih hun dang dang, mun dang neh midang dangin an irziak nikhomseh, an hong ritikkhoma munkan an hong inribun chu ridot ifel tlapka ai om thei hih Baibil danglam bîkna a nit.

Ei riseilai (lesson) a ei lût man Baibil dang an imang ngai la zuang isir bak rei.

i) Hebrai Baibil: Amah hih Baibil masatak khom a nit a, atuna Thuthlunglui ei iti hih a nit. Hebrai Baibil a chu lekhabu 39 a oma, a then dan chu Torah (Dan bu) Nebiim (Zanthlahei) neh Ketubim (Thurchihe) a nit

ii) Septuagint (Lxx): Izip reng Ptolemy II Philadelphus an Alexandaria khuaa library a iseh rangin Hebrai Baibil a Danbu Grik tonga ilet rangin Jerusalema Thiampu laltak ziangah a hang ngena. Ani khan mithiam 72 Israel nam ikipa mi 6 ka rithlang pekin Danbu (Torah) chu an ilet a nit anti. Hi septuagint (Lxx) hin lekhabu 53 ai om a nit. Thuthlung Thar tang iloiin. Hi Baibil hih Jisua Krista khomin ai mang ning ati itin an i-iam a nit.

iii) Vulgate (Latin): A.D. kum zabi lina mong tiangah khan Pope Damascus an Jerome (Bible mithiam) a chu Latin tonga Baibil isong inrup isiam rangin a ngena. Khaangkan, Bethlehem khuah ifen Latin tonga Baibil chu a ilet tak a nit. Vulgate Baibil a Thuthlunglui bu 46 a oma, Thuthlung Thar bu 27 neh rengkan 73 ai om a nit. Amah kha Roman Catholic Baibil a nit.

iv) Syriac Baibil: Suria tong khomin Baibil hi ilet a nit a, Thuthlung lui 42 a oma, Thuthlung Thar 27 neh rengkan 69 a nit.

v) Baibil (Arab Baibil): Coptic Koindang khomin Baibil ran an neia, Thuthlunglui 43, Thuthlung thar 27 neh rengkan 70 a nit.

vi) Protestan Bible: Protestant Baibil ei iti hih atuna ei imang Baibil hih a nit a. A.D.kum zabi 16-na sunga koindang

siamthatna a hong omah khan, Protestant Koindang ruaituhein Baibil siaminthat tha an tia; Hebrai Baibil Thuthlunglui ipom rangin tha an tia, a dang ka chu an inol a nit. England reng James I-in Baibil ilet rangin mithiam 54 arthlanga, annihei khan kum 7 ka an buaipui nungin kum A.D.1611-ah khan an izoi tak a nit. Kha zoroa an inrifom dan angka chia khah atuna ei Baibil manglai hih ai nit tak a nit.

Baibil bu ridot dan: Ei Baibil manglai bu ridot dan chu hingkan a nit:

1. Danbu: Danbu ei iti hih Mosia lekhabu khom anti ngaia. Hebrai Baibil-a “Torah iti a nit a, Grik tongin “Pentateuch” a omzia chu “Danbu ringaka hei” itina a nit. Khahei khah Genesis, Exodus, Leviticus, Numbers, neh Deuteronomy.

2. Thurchi Bu: Hebrai tongin Ketubim a nit. Israel nam hei Joshua ruaina nuaia Kanaan ram an luta rithoka Babulon sal ata an hong kir nok idena an thurchi (history) riziakna bu hei a nit; khahei khah Joshua, Roireltuhei, Ruthi, Samuela 1 & 2, Renghei 1 & 2, Chronicle 1 & 2, Ezra, Nehemia, Estheri an rengkan 12 ka an nit.

3. Varna bu hei or Labu hei: Thuvar imanga la ridonhei, thur rikhen imanga thumak hei neh Pathian inpakna la hei ai chuang a nit; khahei khah Joba, Lapui, Thuvar, Thuriltu neh La hei la, an rengkan 5 ka a nit.

4. Zanthla bu: Zanthla hei imanga Pathianin a mihei an riseina bu a nit a, lekhabu 17 a nit; khahei khah Isaia, Jeremia, Ta la, Ezekiel, Daniala, Hosea, Joela, Amosa, Obadia, Jona, Mika, Nahuma, Habakuka, Zephania, Hagaia, Zakaria, Malakia an nit.

5. ThurchiTha bu: Jisua Krista rammualah a zuang thu, a damlaia a sin zong thu, a thi neh thoinok thu riziakna bu a nit. Bu ilika a nit a, khahei khah Mathaia, Marka, Luka neh Johana a nit.

6. Thurchi bu: Kristian hong riphut dan, an sintho dan neh Koindang thurchi riziakna bu a nit, amakha, Tirtonhei Sinthohei a nit.

7. Lekhathonhei: Lekhathonheia hin mi dang dang 6 (irukka) vel irziak a nit a, Koindang, ram neh mimal lei riat ranga inriseina thu a nit ual; khahei khah Rom, Korinth 1 & 2, Galatia,

Efesi, Kolosa, Thessalonika 1 & 2, Timothea 1 & 2, Tita, Filemona, Hebrai, Jakoba, Petera 1 & 2, Johana 1,2,& 3, neh Juda a rengkan 21 an nit.

Hi lekhathonhei hin riming dang an nei noka, a nuaia angka hin:

i) Lekhathon masahei: Thessalonika 1 & 2 an nit.

ii) Lekhathon ilianhei: Rom, Korinth 1 & 2, Galataia neh Filipi

iii) Tâng in lekhathon hei: Efesi, Kolosa neh Filemona.

iv) Pastor lekhathonhei: Timothe 1 & 2 neh Tita

v) Mirthianghei lekhathon: Peter 1 & 2, Jakoba, Johana 1,2,& 3 neh Juda

8. Thuphuangsua: Jisua Krista rithla'n Lungthlung Johana ziang a rammuala thil ithlung â thleng tak neh ala hong iom rang hei thurithupa om khah iphuangsuak ranga ân riatna thu a nit.

Pathian ngaituanaa om thurithup a mihei saninringa an om theina lampui hei, misual hei chungthu irela a om rang thuhei, kumtluang ringna neh kumtluang duk tuangna om rang thu hei hi bu ahin iphuangin ai om a nit.

Richang Spell: Luka 24:44: Khante, an ziangah khan, “Nin ziangah ki om laia khan hi thuhei hih nangni ke ril ngai kha, Mosia Dân lekhabuah hei, zânthlahei lekhabuah hei, Inpâkna la bu--ah hei ki thurchi riziak murdi chu a hong itlung idik rang a nit, itin nangni ki lei iril ngai kha,” a ti a.

Tongridon:

1. Izat Bible im ei imang?
2. Septuagint Bible kha mi idorka irziak neh lekhabu idorkam a om?
3. Protestant Bible khah tu rengin isiam ranga thu pe, mi idorkam a siamtu an init neh tik kuma an izoi mani?
4. Vulgate Bible khah tu Koindang heim a mang ual?
5. Jisuan i-Bible im ai mang ini ranga inrihoi kha?
6. Thuthlungluia thurchibu hein a ihuap sunga thu om hei neh Thuthlungthara Thurchi bu thupel ni riat danin isir roh?
7. Thuphuangsua hih tu irziakim? Tu inriat im? neh ithûm?

Risei rang 3

Thupui Bible Thuneina

Itep rang: Lapui 19:7,8

A thitum: Pathian mizia chu a thuah imuthei a nit.

1. A omzia: “Thuneina” iti hih Grik tong “Exousia” a nit a, sap tongin “authority” a nit. Pathian ziang ata idong thuneina manih Pathian ipek thuneinah itina a nit. Ei Rengpa Jisua Krista khomin a thuneina chu Pa ziang a rithoka ai dong inin â sir. “Nuai neh vana richamneina murdi ki ziangah ipe a nit tak,” itin a sir (Mat.28:19†8). Khangka ngirin Bible thuneina ei iti khom hih Pathain rithuakkhum, Pathian thu a nit.

2. Bible hi Pathian thu a nit: Bible thu hih Pathian thu, Pathian ziang ata idong angkana isir a nit. Mosia khan Dan neh thupek hei chu Pathian ziang ata idong inin a sîr (Exo.20:1). Khante, Mosia ngirin “Amah hi nin tho ranga thupek chu a nit,” itin Exo.35:1 ah â sîr sa. Zanthlahei khomin an thusirhei khah Pathian ziang ata an idong a nit iti an isir (Isa.1:2; Jer.1:4; Hos.1:1; Amos.1:3 neh a dang dang). Khante, ei Rengpa Jisua khomin thlemna a tong laiah khan, thlemtu doi lêt nan Mat.4:4,7,10 heiah khan “**itin riziak a nit,**” itin Thuthlungluia thu hei imangin ai sâm ngai a nit.

3. Bible hi Pathian mizia neh nuamlam inpuangna a nit: Bible hi Pathian mizia neh nitna, a nuamlam neh a nuamno lam, ai tum neh a sinzong hei nê riltu a nit. Khasikin, Bible chu ei iamna, ei omdan neh ei sintho dan tinreng chung a thuneitu tak a nit a, thuthlukna neitua ipom a nit.

4. Bible hi iamna neh sintho rikhina a nit: Mihei ziangah Pathian ân lâr ngaia, mihei ziangah Pathianin thu a sîr ngai a. Eini hei lai khomah inlarna ki mu iti manih inriatna ki dong iti manih ei om ngai a; Khaangkan inlarna imu ngai hei neh ireh ngai hei iriat khah Thuthlunglui huna Pathian inlarna Kristaa hong thlung rikip tâkhei neh artok non chu khangkana inlarna hei khah inlarna dik ninonia ipom tlâk khom ai nit ino rang a nit.

Koindang masa hei khomin Pathian neh a mizia chungchanga ngai dan itam taka an lei inei hei chu a dikino a nit itin an lei inol ngai a nit. Khaangkan ngaidan inei Koindangan a lei inol hei chu: Docetist pol hei, Gnostic polhei, Sabellia, Aria, Apollinaria, Nestoria, Eutuka, Pelagia neh Montana hei an nit. Khangka khan Koindang masa hei khan Bible hi iamna neh sintho rikhina mangin Bible thu neh rime no hei chu an lei inol ngai a nit.

5. Bible thuneina laipui (centre): Pathian inlarna, inriat lokna (zanthla thûnpuang) chu Kristaah a hong rikip taka. Pathian inlarna rikip a nit sikin, Reng Jisua inriseina hi Bible thuneina laipui (centre) chu a hong init tak a nit.

Richang Spell: Mathaia 28:18,19: Jisuan a hong nâi a, an ziangah, “Rinêng neh rivâna thuneina murdi ki ziangah ipe a nit tâk. Khanchu, fe unla, nam tina mihei ki kôilômin siam rei; Pa neh Naipa neh Rithla Rithiang rimingin baptis unla, thu nangni ki pêk murdi izôm rangin inrisei rei.

Tongridon:

1. Bible thuneina ei iti hih im a omzia?
2. Bible thuneina laipui (centre) tak khah im ai nit?
3. Thlemtu doi lêt nan Jisuan thuthlunglui thu hei imangin a sâm ngaia, a mong takah im a ti ngai?
4. Thuthlunglui huna Pathian inlarna Kristaa hong thlung rikip tak hei neh rimê no khah ingkam ai nit rang ei iti kha?
5. Koindang masa hein Pathian neh a mizia chungchanga ngai dan dikino nei a lei inolhei khah ân dotin riziak roh.

B. ThuthlungLui Hun

Risei rang 4

Thupui: Thilsiam thu

Itep rang: Isaia 40:12,17 Thuphuang 4:9-11

A Thiltum: Thil tinreng Bulpui chu Pathian a nit.

Genesis bu bung masa inika hei a hin Pathianin thil a siam riphut ata suina chi inika ei mu a. Akhatna chu Gen.1:1-2:4 (a) hi a nit a, a nikna chu bung 2:4(b)-25 hi a nit. Ichial taka riseituhein an thil sui dan ri-angno dan an isir imu a nit. History-a hun ridot dan neh kum sûtna ranga an iti ni maka, Science dana thil hong risiam suak dan an suina khom ni ual make. Pathian ei iamna sakho thurina rithoka sua thil tinreng bulpui tak chu ‘Pathian a lei nit nget hite’ an tina a nit ual.

Mi thenkan Pathiana mi thumka Pa neh Naipa neh Rithla Rithiang hei hin hun bi ran chit inei angkana an isir ngai hi Bible inrisei dan dikino a nit iti inlangna rangin thilsiam riphuta rithokin Pa neh Naipa neh Rithla Rithiang Pathian rikip khan, a tira rithokin, tinrengah sin ai tho a nit iti ei riat a that. Entirnan Pa khan thil a siam: Gen.1:1; Isa.44:24;45:7; Lap.33:6

Naipa khan thil a siam: Joh.1:3,10; Kol.1:16

Rithla khan thil a siam: Gen.1:2; Joh.26:13.

1. Thil tinreng hi a khâta risiam a nit: Mithiam (Scientist) hein chu rammualah hin thil chi dang dang 108 vêt iomin an iriat a nit. Kha thil chi dang dang 108 vêt ata khah thil dang an hong irsiam thiai thei anit an tia; Entirnan Tui hih boiruak chi inika Oxygen neh Hydrogen ripolh a rithoka hong rifom ai nit angkan. Kha oxygen neh Hydrogen ripolh ei iti khah an ripolh rang dor inrup bang ka ân ripoltu om nang ata, ân ripolh rang thil khom khah siamtu boiin ai om theiino rang a nit. Khasikin thiltinreng hih ân omtu, a siamtu om a nit zel a. Thil neh miriam tute la om mâna khan tum a siamtu ai nit rang tak?

2. Pathianin thiltinreng a siam: Genesis bung khatna khan Pathianin thil tinêng a siam thu ei mua. A siam zoia khan tha a ti tak taka. A siam dan chu hingkan a sir:

A sunkhatnin: Ivar a siama, sun neh zan a hong om (1:3-5)

A sun niknan: Boiruak rizat tak (rivan) a siam (1:6-8).

A sunthumnan: Tuikhanglian neh khomual neh rinenga loisûl chitin hei, tlaichi hei, theikung chi dang dang a siam (1:9-13).

A sunlinan: Ni neh thla neh Arsihei a siam (1:14-19).

A sunringanan: Chunga vuang iva hei neh tuia om Inga hei neh miring chi dang dang a siam (1:20-23).

A sunruknan: Nuaia miring chitin neh miriam (Ipa neh nupang) a siam (1:24-28).

3. Pathian thilsiam dan: Pathianin thil a siam dan lam ithumka a oma; khahei kha:

a) Pathianin thun a siam: Pathianin ama nuamlam angka takin thilhei a siam a, a thilsiam hei chu “Tha ati tak taka.” Ite omino a rithokin “Hong om rise,” a ti a. an hong iom zel a nit.

b) Pung ipuang thiai thei rangin a siam: A tirah khan Pathianin idorka chiam ai siam reh mang mea, khan, a thilsiam hei chu ipung ipuang thiai mai rangin ai siam a nit. A tira ai siam nino miring or thil ithar hong iom angkana ei iriat hei khom a tira ai siam hei ata hong risiam indanglam viat viat a a thar angkana an hong ilang rang dan khom lei ingaitua diamin ai siam a nit. Khasikin, thil hong iom murdi hih Pathiana rithoka hong iom an nit vang.

c) Miriam hih thilsiam tin laiah ân chung tak a nit: Miriam hih thilsiam tin chung thuneitu nih rangin Pathianin ai siam a nit (Gen.1:2b-28). Miriam warna neh sinthotheina a hong risâng ual ualin a siamtu roinpuizia a ilang ual ual ngai a nit. Thil rikhel neh roinpui imusuak thei ranga miriam ne siamtu Pathian roinpui rang zia hih tuten ei iriat phâkino a nit.

Richang Spell: Hebrai 11:3: Rammual hih Pathian thua siam a nit iti neh thil imu theihei hih thil mu thei inoheia siam a nit iti iamnan ei iriat a nit.

Tongridon:

1. Tui hi ingkana hong iomim ei iti khah?
2. Pathianin thil a siam dan a sun indotin isir roh.
3. Pathian roinpuizia ithom ei riat phakno?

Risei rang 5

Thupui Eden Rikul

Itep rang: Gen.2:8-15; Kolosa 1:15-20

A thiltum: Miriam dam san tak chu Pathian a nit.

Thuma: “Eden” iti hih Hebrai tong a nit a, lomna tina a nit itia ringai an oma, Phaizol tina a nit itia ringai an om. Ei Bible a a lang danin chu Eden chu Phaizol ihoi tak nise arhoi (Gen.2:8). Hi Eden rikul omna mun tak hi atun tenan irianfel ni mak. A omna kolvela vadung ilika, Bible-in a isir hei laia Pison neh Gihon vadung hei vang hih chu taka om im an init tuten an iriat khai ino a nit. Hidekel hih chu Tigris vadung hi a nit a, Eufrates vadung chu angaiin ala oma. Mi thenkan chu Pison neh Gihon vadung hei chu ninupui sikin a irmang ningati anti.

1. Eden rikul: Pathianin miriam ai siam masa tak hei chu Edenah ân oma. Rikul sungah khan thing chi dang dang hei, sa chi dang dang hei an om saa. Rikul inlaina takah ringna thing neh sia neh tha riatna thing a om sa. Rikul ifâ rang neh tlaichi intha rangin vadunghei an luang dûl dûl a. Kha rikulah khan miriam hei ringum takka an vangsak theina rang thil itul tinreng chu ai om vang a nit.

2. Eden rikul i-enkol rangin Pathianin miriamhei a sia: Pathianin a thu angka taka i-enkola donsua, an chung thûnei rangin a miriam siam hei chu rikulah khan a sia a. Miriamin Pathian ata mophurna chu ai nei zel a nit. An ringna ranga â tul murdi chu an ifâkin an inei zel ai phal a nit. Rikul inlaina taka thing inika omhei rek chu an ranga tul bâk ino a nit an fâk rangin phal make. Anmahni siamtu a nit sikin an ranga tul neh tul ino khah ai riat pek vang a nit.

3. Miriamin Pathian thu oi make: Miriam khan an sia neh tha riatna imang puma Pathian thu angka taka an iring khah an ta ranga tha tak chu a nit a. Khan kha riatna ngir khah imangin Soitanan a hong ithlem taka. Evi khan a mitin thei kha rizuk iom takkan a mua, a kuar riatah Pathian thu oi kher tul ual mak

itin soitana rôl a riat a. A lungintongin kha thu khah a ngaituaa, a zôma, a kutin thei rimal phal ino khah rimalin a fâk taka, a pasal khom ân fâk sa taka. Anmahni dit rithlangna ngeiin Pathian thupek chu an iborh tak a, an irngai poimo ual chu Pathian ni khai iloiin anmahni a nit ual tak. Pathian en loiin anmahni an zuk ri-enin chu sil ibom reng reng iboia om an nit an rimu suak tak a. Izak an riat tak, theichâng nâ keng ithuiin thluk neh thlan an imang tâk. Pathian mitah an korongboina rikhu zoi rual ni pek khai mak e.

4. Eden rikul ata Pathianin a umisua: Pathian khan ama thu thua om ranga ai siam miriam hein a thu an oi khaino sikin Eden (lomna Phaizol) ata kha a umisua tak a. Natna neh thina, ngaisiatna neh inkhok, intak tinreng ituangin an îrung an îrung tâk a nit. Pathian ranga iring mai ranga isiam ni manseh, anmahni ranga ring an tum sikin siatnaah an ithlâk tâk a nit. An richihei khomin kha lampui khah an izui mai tâk a nit.

Richang Spell: Thuvarhei 21:30: Miriam vârna hei, riatna hei neh thiamna hei hi Pumapa doina a nitin chu chanlamboi a nit.

Tongridon:

1. Eden itong neh itina mani?
2. I vadung heim Ninupui sika armang ini ranga an i-iam?
3. Edenah irangim Pathianin miriam hei ai sia?
4. Rikul inlaina taka thing inika om ei iti khah ithingim an init?
5. Miriam hei khan tum an ringai poimo ual ei iti kha?
6. Eden ata umisua hei khan im an ituang tâk?

Risei rang 6
Tui lian sang
Itep rang: Gen.6:1-22; 1 Pet.3:20

A thiltum: Sual sika siatna lam ei rô laiin Pathian ei intum rang ni mak.

Thuma: Novan rikuang a sin thu hih thonthu angkana sir khomin thu ringai nuam iom tak neh thu ringai rikhel iom tak a nit. Asan chu mual, tlang idil khopa tui ilian khah ei rammual mangah hin ei lai mu ngaiino a nit sikin. Kha tui ilian khah isikim ai nit ei tin chu miriam hei isual rei sik neh Pathian an isir insiat sika a lei nit.

1. Miriam an isual rei tâk: Miriam masa hei khan sual lam iron an itlan tâk sikin an isual ual ual tak a. Pathian khomin “an lungril ngaituanah tin tin khah sualna sip a nit,” a riata (Gen.6:5). Anmahni sikin rineng hih ringo risualnan a sip a (6:13). An hur rei tak sikin a en hoi neh hoi ino khom ngaitua phâk khai mak a. A lei isiam tâk khah Pathian khom a insîr ok a nit (6:6), khangka hun laiah khan Nova neh a sungkua hei bang khah mi tha om chu an nit.

2. Pathianin an sual rilet rangin a nuam: Nova'n kum 120 vel rikuang a sin sûng heiah khan Pathianin an rilet nuam rop im itin ai ngak ngei ngei a nit (1 Pet.3:20). Rilet sela ai ngaidam rang a nit. Ngak khom chu ai ngak sot ok a nit Gen.6:3-9 “Kum 120 chu la dam anti,” aiti hih hih Nova rikuang sin sung ai nit rang a nit. Eini chu ning ei la, “Voi thumka tenan ner riat suaknon chu.....” ei iti rang a nit.

3. Pathianin tui an lian tak: Pathianin Nova khah rikuang chontan richuan ithumka nei, a dung ft.450, a khang ft.75, arsang dan ft.45 ân sin a. Miriam hei khah an sual an rilet nuam khaino sikin Pathianin Nova neh a insung mihei, a nupui neh a Naipahei, Sema, Hama neh Japheta neh an nupui hei chit neh rineng chung a thil iring tinreng bopka chit rikuang sungah, sun 371 an fak rang neh, ilût rangin thu a pek taka. Khanchu, sun 40 chu

chât iloiin rua sangsari a zuang sôr taka, amakha rammualah tuilian sang om masatak a hong nit tâk.

Khante, Novan Pathian ziangah ribolna a lana, zâm zâm ka tui a hong rikai thiai thiai laiah khan. Rua a sôr riphut ni ata rikuang arngam tak khah sun 371 a nit a, kumka neh sun rukka a nit. Kharizoiin chu Pathianin rineng chungah tuilian sang om nok khaiino rang entirnan sum risâng ân rizâm pek a.

4. Pathianin damna lampui a siam: Pathianin miriam om dan ranga ai siam Baibilin ane iril murdi hi damna rang korong a nit. Khan, miriamin soal an rithlang ual ngai sikin siatna neh thina lam an ipan ngai a nit. Pathianin miriamhei khah lung a thlung rei sikin Reng Jisua Krista zara saninringna chu a tlonga mu theina rangin sin ai tho nok mai a nit.

Richang Spell: Rom 6:23: Nikhomsela ki takpumah hin sinithotu, dân danglam tak a om iti ki riat; amakhan ki lungril tha ti lam dân khah a doi a, soalna dân ki takpuma sin itho mai ngai bôia a ne isiam ngai a nit.

Tongridon:

1. Novan kum izakam rikuang a sin?
2. Pathianin misualhei an soal riletna rangin kum izakam a ngak?
3. Tuilian nia rithokin sun izakam Nova neh a insungmihei rikuang sungah an om?
4. Tuilian sang om nok khaino rang risin Pathianin im a inlang pek?
5. Rikuang khah ingkana sinim ai nit ni riat danin isir roh?

Risei rang 7

Thupui: Babel in risang

Itep rang: Genesis 11:1-9

A thiltum: Miriamin Pathian archakpui rual ni mak.

Thuma: Jisua naisen a nit laiin naipang kum inika nuai tianga thattu Herod Liana tupa Herod Agrippa khah mi ripâk tak a nit a. Sunka chu a lal puan senduk ritle uar ribât in roi a rel a. Ami hein an ringai inrisang oka, “Miriam naran pai ni khai make, pathian dor keng a nit tâk kHITE,” an ti a. An inpâkna khah a lom rei sikin Pathian a ribe rang dorkan a lungril arpâk taka. A chungah Pathian a lung a hoi khaino sikin rulkûtin an fâk a, voika rengin a thi taka (Sintho.12:20-24). Babel in risang an sinna san khom hih miriam hei an ripâk sika a nit. Pathian maah tute ripâk thei ni mangme iti hei ei riat rangin ei nuam.

1. Babel in risang an sin: Tuilian sang om zoia Nova richihei an hong pung ok nung ten khomah khan tong khatka mangin an lai om a nit. Babulon rama Sinar phaizolah an rengpa Nimrod-an khopui khatka “Babel” an iti chu ân dinga (Gen.10:10). “Babel” iti chu buaina itina a nit. Babulon iti neh a omzia thumun a nit. An ramah lung a omno sikin Rolung (Ita) siam dan khom an thiam oka, Alkatara heiin an inriman a. Atunlaia angkan cement la nei make. “Tho rei, khopui siam eita, ân risâng, rivan isun dapkan sin eita, ei riming inthang eiti u; khanonchu, nuai chung murdia ei rithek indar loiin,” an ti a. Pathianin, “Nuai chung murdi luansip rei,” ati laiah an nin hingkana an itho hih Pathian ngaisakno sika a nit ual.

Khabanah, rivan idum chungah khin Pathian iom rangin an iama. Pathian omnaa an irngai ithlung khopa in risâng isin an tumna san khom Pathian neh ri-ang angkana an ribe sika a nit. Thurchi riziak ngai Josephus-an â sôr danin chu “In risâng sin eiti u iti tu hih an reng Nimroda a nit a. ‘Pathianin tui inlian nok khomseh ai chîm phak khai ino rang khopa risângin sin ei ta, ei pi neh puhei dûk a lei thonah khah lei thung rei u,” a ti a. Pathian

maa an ripâk zia neh Pathian an izâ nozia hih a irkhel a nit.

2. Pathianin an sintho a siat pek: An lunginṭong ṭha mak iti Pathianin a riatin chu a zuang tak a; sin an tho mai thei nona rangin an ṭong an danglam pek vang tak a. Tute rison thei khai maka, buai takin an buai tak a. China naipang neh rizuin ithu manih isir tâng eila, ingka dor im ibuai ai om rang! Anni hei khom khangka taka khan an ibuai rang chu ai nit tak a nit. Khanchu, In khah sin sunzom thei khai maka, lo an isam tak chu a nit. An lei iti angka takin nuai chung murdia Pathianin a chekindar tak a.

3. Miriamin Pathian archakpui rual ni mak: Pathian rangin tute hih ama richakpui rang khopa lian neh roinpui omak e. Miriam hih Atta intliamnaa atta di kop ei nuamin ei sem infai theia, ei nuamin ei ithing let thei (Isa.4:15-17) angka a nit. Reng Nebukadnezara khomin a Babulon kho roinpui tak chu arpakpua, ân dingu Pathian reh phak iloiin, “Hi Babulon kho roinpui hi keima ratna sika rêng omna rang mun neh ki roinpui maina ranga ki siam ni makima? itin a sîr inlum a. Khanchu Pathianin, “Ân chung takah khan, miriam hei lalna ram chungah thu a neia, ai ditsak hei ka a pek ngai,” a ti a. Nebukadnezara chu ân vêt tak a. Sechal angka ram nuaiah sûl iringhei ifa’n ai om tak a nit (Daniala bung 4-a khan)

Richang Spell: Luka 1:51: A bân tharât an chungah a dâng a, lungri la lâripâkhei chu â chekindar ngai.

Ṭongridon:

1. Babel itinam ai nit?
2. Tak phaizôlâm Nimrod-an khopui ai siam?
3. Izat isinim an thiam ok ei iti kha?
4. Josephus-a ti danin Nimrod-a khan irang sika in risâng khah ai sin mani?
5. Isikinim Babel In isin an irngam?
6. Babel in isin an ringam nungah khan ingkam an om?

Risei rang 8

Thupui: Sodom neh Gomorra

Itep rang: Genesis 19:1-14, 23-24

A thiltum: Taksa rizukna thunun thei non chu siatna a ṭun ngai.

Thuma: Sodom neh Gomorra hi Jordan dung kol phaizol ihoia om a nit a, atunah hin chu a omna mun tak irianfel ni khai mak. Pathian thu risei mi hein chu Tuipui ithi (dead sea) hih ning a ti itin an iam (Gen.14:1-3). Mei neh kât insûr iti khom hih volcano puak angka hi nise arhoi. Sodom neh Gomorra thurchi hin taksa rizukna, hurna inler sika Pathianin ân rimang thu a inlang a nit.

1. Lota neh Sodom khua: Lota hi Abrahama unaipa Harana naipa a nit a. A pa ulian Abrahama neh munka an hong inzin mainaah an sial-ui-arhei an hong pung ok tak sikin enkoltu hei karah buaina a om taka. An inṭhen a ṭul nget tak sikin, Abrahaman Lota ziangah, “Tho, ram chu rithlang ta roh, voi tiang ni fen chu keimah changtiang feng ki ta, chang tiang ni fen chu keimah voi tiang feng ki ti,” a ti a. Khanchu, Lotan, Sodom neh Gomorra phai ram ihoi tak arthlang tak a. Amakhan, an insungkua pumin an om tâk.

2. Sodom neh Gomorra mihei isualzia: Sodom khua mihei isualna tak chu hurna tiang a nit. Sunka chu an isualzia en rangin Pathian a fe tak a. Abrahama a zuk itlo masa a, an isual a nit iti a riatinfelin dûk itho a tum tak a. Abrahaman Sodom khuaah khan mifel 50 ka om seh izua ning an tim itin ardona. Pathianin o, izua ning ati itin a sâm a. Khante Abrahaman 45 ka omseh....., 40 om seh,..... 30 ka om seh, 20 om seh, 10 ka tenah khom om seh itin a lar don maia. Pathianin mifel 10 ka tenah khom om seh zua’ ki ti itin a sam a.

Zanah chu vantirton inika hi Lota inah khan an zuang lut a. Sodom khomi hei khan mi hur angkana pól rangin an tum tak a. Lota’n khangkana tho loi rangin a ngenna chu nuam pek mak a. A inkhar khah an hong ibo taka. Lota chu insung tiang mikhual heiin an kai lût a. Pu tianga misual lom hei chu vantirton heiin

an mit an indel peka. Sâp hein hur dan ðhano hih “Sodomy” an ti a. Sodom mihei angka dora mi hur a nit an tina a nit.

3. Pathianin soal â hua: A tuk zing khua a var kaneh chu Pathianin Sodom khua chu mei neh kât in ihal a tum tak a. Lota hei nu pa neh an nai nungak inika hei khah vantirton hein khua pen ipana itlan thal rangin an kaiisua tak a. Lota khan â mâk hei rang khom khah a ril a. Khannise ui-ar irâm ilua lei invarh khai maka. Lota hei parêng chu Zoar khua panin an itlana. Pumapa khan rivana rithokin mei neh kât ân sûr tâk a. Sodom khua neh a kolvel phaizol murdi miriam banah ui-ar khom zua loiin a kâng infai vang tâk a (Gen.19:24,25).

4. Lota nupui chi lung a chang: Sodom khua an maksan rangah khan, “Ni ringna rangin itlansuak roh, nungtiang ngat khai non la, phaizolah khom iding no roh, itlangah son itlan roh, khannonchu ni thi sa loiin,” (Gen.19:17) itin an iril maia. Khannise Lota nupui khan Sodom khua chu arngai tak tak sikin itlan nuam khai maka, nungtiang ingat ân sûm zoi khaino sikin chi lungah a chang tak a. Mei khan a hong ikâng nget ai nit rang tâk. Pathian thu zom nuam iloaia, mahni nuam dan angkana om mai chu siatna a nit ngai iti ai fel a nit.

Richang Spell: 2 Petera 2:6: Pathianin Sodom neh Gomora khopuihei khom thiamno inchangin meiin ân rimang a, Pathian ngaisak inohei kuttum a tho dân rang inentirman a îrimang vâng a nit.

Tongridon:

1. Sodom neh Gomorra khah tak munâm ai om?
2. Bible risei mihein tak munim tianlai Sodom neh Gomorra mun ini ranga n i-iam?
3. Abrahaman Pathian ziangah idorka ta idorka tenam mifel om seh Sodom khua ai zua rang itia a irdon?
4. Sodom neh Gomorra soalna khah ingka tianga soal nâm ai nit?
5. Sap hein ihur ðongkama an imang ngai khah imani?
6. Rivan ata mei neh kât isûr khah arkhekpui thei ni riat a omim isir ta?

Risei rang 9

Thupui: Abrahama

Itep rang: Genesis 11:24; 12:5

A thiltum: Pathianin a sinitho rangin mi arthlang ngai

Thuma: Abrahama hi Nova naipa Sema richia mi a nit a. A thurchi hih Genesis bung 11-25 sungah hin mun itam takah imu rang a om. Thuthlung Thara khom mun itam takah ei imu a nit. Judahei, Kristian hei, Mosolman hein Abrahama hi ei sakhua bul neh Pa inin ei iriat seng a nit.

1. Abrama: Abrahama riming masa chu Abrama a nit a, “Pa roinpui” itina a nit. A pa chu Tera a nit. Abrahaman inzirpui inik a aneia Nahora neh Harana an nit. Harana chu Lota Pa a nit. Abraman Nupui Sarai a neia, Pathianin arming a thleng peka “Sari” itin a omzia chu “Reng nainu” tina a nit.

Abrama omna khua chu ûr a nit a kho roinpui tak a nit. Rivai munpui a nit a, Ini neh mei Pathian biakna munpui a nit. Abrama hei sungkua khomin kha Pathian hei khah an ibiak ngai a nit (Joh.24:2,3). Kha khuaah an om laiin a nit Abrama chu Pathianin raminkunga fe rangin ai koi a nit (Gen.15:7). Ram inkung ipana an isuak khah Haran khuaah ommun an khuar tak a, kha khuaah khan a Pa Tera chu a thi tak a.

2. Abrama chu Pathianin a koi nok: Abrama chu Haran khua an om laiin Pathianin a koi nok a. “Ni omna ram ata neh ni suapuihei lai ata neh ni Pa in ata suak inla ram nang ki la in en rang tiang fe roh richi roinpui takkan nang siam kita, ðat nang vur kita, nerming inthangin siam kiti; nangmah ðatvurna hong ni roh,” (Gen.12:1-3) a ti a. Khanungah khan arming a thleng peka, Abrahama (Mi tin tin pa) a ti taka (17:5). Khanchu Abrahaman Pathian thupek izomin Kanaan ram a pan tak a. Kanaan ram chu a tunlaia Israel ram khu a nit. Kha zoro laiah khan Abrahama chu kum 75 ka mi a nit tak (Gen.12:4). Ama richi hong ife thiai mai ata rammuala namtin rithuak rizanga in om rangtu a hong suak theina rangin Pathianin ai

koi a nit.

Abrahama neh Sari khan nai lak chu la nei maka; khangka an nit lai khomin Pathianin chu ner chihei rivana arsi neh nuaia it̄tai dora tam an lai nit rang itin t̄ong an kunga (Gen.15:5), i-oi ân tak rang vangna! Anni khomin a tirah chu an iam zoi ngamno sikin th̄unrualin an boinu Hagari ata khah Abrahaman nai a nei a; kha nai khah Ismaela a nit. Ismaela chu atunlaia Arab richi murdi hei chibul a nit. A nungkhonah chu Sari khan nai ipa Isaaka a nei taka. Isaakan Jakoba a neia, Jakoban nai somleinika a nei a, kha 12 ka hei laia Juda richi zuang ife maiah khan rammual saninringtu Jisua Krsita a zuang isuak a nit. Ani hih rammuala nam rithuak inrizangtu chu a hong nit tak.

3. Pathian i-iamtu murdi chu Abrahama nai an nit: Abrahama richi Juda hei khan Pathian thu an zom khaino sikin Pathianin a sintho sunzom rangin Jisua Krista mangin Koindang hih a inding tak a nit. Koindang khan rammualah saninringna thu chu puangindarin Pathian sinpui chu ai sin rang tak a nit. Koindang hei inriseina zoma Jisua Krista iamtu murdi chu Abrahama nai dik takin Pathianin a irngai tak a nit (Gal.3:7).

Richang Spell: Galatia 3:7: Khasikin, Abrahama nai dik takhei chu iamna neihei hi an nit iti re rei.

Tongridon:

1. Abrahama khah tuhei sakhua bul neh Pa'm ai nit?
2. Ur khah i munpuiim ai nit kha?
3. Abrahama tak munah a om lai inim Pathianin ai koi nok?
4. Ismaela khah tu hei richi bul mani?
5. Pathian sinpui isunzom ranga Pathianin a inding khah imani?
6. Pathian i-iamtu murdi tu nai im ei init?

Risei rang 10

Thupui: Isaaka

Itep rang: Genesis 21:1-8

A thiltum: Nu neh Pa thuzom hein Pathian thatvurna an dong.

Thuma: Pathianin chu Nu neh Pa thuzom thei mi hei hih thuanthlunga om rang neh vân thatna dong rangin a lei iti rêng a nit. A dikzia riattheina om chu ei rama mi roinpui neh mi inlar hei hih an naipang lai ata mi imusit rang khopa nu neh Pa thuzom thei hei an nit ngai. Vuansun khomah hin khangkana mi thurchi khah ei irsei rang a nit.

Isaaka Thurchi: Isaaka thurchi hih Genesis bung 21-28 sungah hin ei mu a. Israel nam pa hei laiah chu amah bang hih keng nupui khatka nei chu ai nit. “Abrahama Pathian, Isaka Pathian, Jakoba Pathian (Exo.3:6; Sintho.3:13) iti riming ipel khopa Israelhei sakhua lungphum poimo ai tling a nit. Abrahama kum 100 ka a nit a, a nupui Sari khom kum 90 a nit tak a. Khangka dora itar dingmun an nit nungin Sari khan nai a vong tak a. Nai an hong neia khan arming Isaaka an sak a. Arming omzia chu “Inuia” itina a nit. Sari khan, “Pathianin a nen nui tak’ mitin ne ria hei khomin ne nuipui sang an ti.” (Gen.21:6) aiti tak a nit. Isaaka kha a hong puitling tikin Nupui Rebeki a neia, Nai ipa inika an neia Esaua neh Jakoba an nit.

1. Isaaka chu sunriat nin serh an tan: Pathian mi rithlang Abrahama sungkua hei risinsianan ipa reng reng an suak nia rithoka sun riatka tenan an serh vun mor an tan ngai rang anit itin Pathianin thu a pek (Gen.17:12). Isaaka hi khangkana serh an itan masatak khom a nit (Gen.21:4). Naisen anit a rithok khomin Pathian thupek a ichaiino a nit.

2. Pathian thuzom sika thingam a nit: Sunka chu Pathianin Abrahama a sôn a, Moria tlangah a naipa Isaaka chu ribolnan halrivam thila mang rangin a phût tâk a. Hi zoro laiah hin Isaaka chu kum 25 mi vel ning ati itin Josephus-an a sâr. A pa khan Pathian thu chu izomin Isaaka, ama halna rang thing t̄el an riput a, aman mei neh chemte a choia. Isaaka khan ribol ranga fea ribolna lan rang berate khom an ichoiino a ngaituaa arkhel a ti a. A pa ardon lakin “Pathianin ngaituang a ti,” itin a sam ngaia.

Ribolna rang mun an tlungin chu ribolna lan thei zel rangin an thing choi chu ân buk khôm tak a. Khanchu, Abrahamama khan a naipa chu a khuap ilûm zel tak a, halrivam itumin maichamah khan ân zâl tâk a. Isaaka khomin a Pa thiltum chu riano theiin om khai mak a. Khangka dor nikhomse, Isaaka khan riphunna òngbai nei viat make. Abrahaman a chemte ithuatin a nai khah zuk idot rang a ti kaneh Pathianin a zuang khap tak a. Khanchu, a pena kelchal arki thing chekirei kara okin ân mu tak a. Isaaka chu a sût a kha bera chal imangin ribolna chu ai lan tâk a nit.

3. Isaaka chu a Pa thu angka taka Nupui inei a nit: Abrahaman a naipa chu Kanaan nungak nupuia innei nuam maka. Anmahni richia mi ngei nupuia innei itumin a som laia ulian tak Eliazara chu Mesopotamia ram Nahora khuah a tir tak a. Nungak tui lei ichoi hei laiah Isaaka nupui rang takin a mi tir chu lei don inthat rangin Pathian ziangah a òngtai a. Rebekin a lei don inthat sikin Isom khan Isaaka nupui rangin a biak zel tak a. Rebeki neh a nu neh pa hei khomin tha an ti zela, khanchu, Isaaka nupui rangin in tiang a panpui tak a. Isaakan Rebeki khah a mun a lom tak tak a, nupuiin a nei tak a. Atunlaia Nupui Pasal ei nei dan neh ar-angin ei riat theiim ngaitua ta u.

4. Isaaka chu roinpui taka nit: Khangka dora nu neh pa thuzom mi a nit sikin Pathianin kum 180 ka idamin ai choiinrisang a nit. A thi nung khomin Israel nampa, chopui poimo takah ai chuang phak a nit. Pathian tak khomin “Isaaka Pathian,” itia rivua ai ngam a nit.

Ricang Spell: Deut. 5:16: “Pumapa ni Pathianin thu nang ai pèk angkan ni nu neh ni pa ngik roh; khanchu Pumapa nang ipèk ramah hin vângsak ni ta, ni ring dam sôt a ti.

Tongridon:

1. Abrahamama neh Sari khah kum izakah an nit inim Isaaka an inei?
2. Isaaka riming omzia imani?
3. Isaakan “Masatak” nitna i-im ai nei?
4. A pan Moria tlanga halrivama lan ranga a òthuih khan kum izakah mi velim ningati Josephus-an ai ti?
5. Rebeki kha tak ram mi neh tak khuami mani?
6. Isaaka “roinpui tak” a nitna bi ithumka riziak roh.

Risei rang 11
Thupui Jakoba
Itep rang: Genesis 35:9-29

A thiltum: Israel nam Pa tak chu Jakoba a nit.

Thuma: Vuansun tena rammuala nam inlar tak Israel nam hong inzir dan neh Israel iti òngkam Bible in a mang dan isui ei itum rang a nit a. Atuna Israel ram khu Abrahamama zianga Pathianin ipe a inkung a nit sikin “Raminkung” anti ngai. Israel ram iti hei, Juda neh Efraim ram iti hei, Juda neh Israel iti hei Palestina ram iti hein riming a lei hong riput ngaia. Atunlai takah hin chu Israel ram iti anit tak. Khantaka a lupui tak, ram riming ten khoma an imangpui tak chu Jakoba a nit.

1. Jakoba thurchi: Rebekin nai inphir a neia; suak nung itah ual in a masapu ke artui a tûk ngita. Khahei urnai kha Esaua neh Jakoba an nit. Jakoba riming omzia chu “Lemtuah” iti manih “Mi siaktu” tina a nit. An hong tlangval nungah khan Jakobana u sikar ife vonitam neh hong ikir ziangah a bething but khah in fa nuam khai maka. “Ni nai lutir nitna ni ne lan no rangin chu.....” ati ngit tâk a. Esaua vonitam khan “A nit e, nangmah nai ulian chang roh,” itin a sam a. Judahei mang danah chu nai lutir ini hih a lut ok a, insung pa tak idottu nitna an nit ngai sikin Pa richon iluatu rang, Pa richon an sem lai khoma a tam tak idongtu an nit ngai sikin.

An pa Isaaka a thi rang a hong nai takin chu, a mit hei khom a del tak a, Esaua òthat ivur a tum laiin Jakoba chu a nu Rebeki neh lungvar ithon Esaua zakua â hâk a, Esaua a ang theina rangin a rng neh a kut hei kel vûnin artuam vel a. Khanchu a pa ilemin a u sikar ife òthatvur dongtum chu aman a lei dong pek tak a. Lemtuah, mi siaktu a nitna chu a irmepui a nit.

Jakoban nupui Leaii neh Rakili a nei a. A somnu hei laiah Bilhahi neh Zilpaii nupuiin a nei sa a, anni ruai ata naipa 2 ka seng a neia. A rengkan nai 12 ka a nei. Hi a nai 12 ka hei hin an riming chit ichoiin Israel panam 12 ka an init tâk a nit.

2. Jakoba chu Israela iti a nit: A u Esaua a lem sika itin laizam

a tho tak a. A u ziang a hong kir nok tiang Jabok vadung rikamah zanah Pathian arbuapua. Pathian a nê sikin a malpui ru ribun a khiak inriphêt pek a. Khanchu, arming a thleng pek a. “Israela” (Pathian Reng nai) itin a be tak. Ama mimal riming rang banga ai be ni loiin Pathian neh an rizom dan a that thu isirnan ai be a nit. Khantaka rithokin chu archi hei khomin nam riming an irput tak a nit.

3. Israel ithar a om nok tak: Thuthlunglua Israel riming an bena san chu Pathian mi a nit isirna ranga a nit. Khannise, Pathian mi dik taka om nekan Israel richi ni khah an risongpui a. Pathianin a siam inrifom dan angka om loiin Israel mi ini-a khan an ilung a thluk tak sikin Pathian ilung chu thluk khai maka. Jisua Krista an iam sika Israel ithar (Pathian Reng nai ithar) hong ichangin namdang hei a hong inding suak tak. Amah kha a Koindang hei hi ei nit. Taksaa Israel hei khan Jisua chu an nôl a; vuani tena hin Juda sakhua an zui a, an sakho mi nitna risinsiana rangin serh khom an itan mai a nit. Kristian ini khom nuam mak a. Khahei ziangah khan anit Paulan, “A lang paia Juda mi ini chu Juda tak nimak a lang paia serh itan khom serhitan ni ual make serhtan dik chu lungrila tan hi a nit” (Rom 2:28,29) itin a sir. Abraham richi, Juda mi inia Israel ini khah an songa. Paula ngirin, “Khasikin amah hi reh rei, iamnaa omhei khahei ngei khah Abraham nai hei an nit” (Gal.3:7) a ti a. Taksaa Israelhei richi ni nekan Jisua Krista iamna sika Kristian ei inith Pathianin Israel tak tak inin arngai ual.

Rchang Spell: 1 Petera 2:10: Matonah khan chu Pathian mi ni ngai mak chei a, atûn chu Pathian mihei nin nit tâk; matonah khan chu pathian lungkhamna dong ngai mak chei a, atûn chu a lungkhamna nin idong tâk a nit.

Tongridon:

1. Jakoba riming omzia im ai nit?
2. Jakob an a u Esau nai lutir nitna khah ingkam ai dong?
3. Tu heim Israel ithar?
4. A u Esau tia laizam a tho a khan tak rama'm ai rot? Tu ziangam ai om? Im ai tho ngai?

Risei rang 12
Thupui: Josefa
Itep rang: Sinthohei 7:9-16

A thiltum: Tik zoro khoma Pathian ranga iamom hei lo an thluk ngai.

Thuma: Genesis bung 37-50 sung hih Josefa thurchi riziakna a nit a. A thurchi hih ringai nuam iom tak a nit a. Pathian mitmuah a iamomzia neh Pathianin that a vurzia hei hih risei rang inrup ei imu hei an nit. A thurchi ata hih naipang hein Pathian ranga iamiom a thatzia ei risei suak rang hih ei inuam tak a nit.

1. Josefa neh a insunghei: Josefa hi Jakoba nai 12 ka hei laia a someikhatna a nit a, anu chu Rakili a nit. An ureng 12 ka banah Nupang khatka a oma, arming Dinaii a nit. An ureng hi nu dang dang ilika inei hei an nit sikin ringei khom intak ok a ti. Josefa hin a pa thu a zom ngai sikin a pa khomin a duam ok ngaia. A urenghein an thik bâk bâk ngaia. Josefa hin armangin a u hei chung a lan lal rang thu hi a mu ngaia; a u hei a sir pekin an lei ithik isa reng a nit sikin an thik ual ual tak a. “Nangmamte hih ingkan khom kin chungah inlal theino tin,” itin an sâm ngai a.

2. Josefa chu urenghein an zuar: Sunka chu a urenghei Bera enkola an ram riakna va tlo rangin a pan a tir a. A hong an lei mun chu an that rang dan an ngaitua tak a. A u hei laia khatkan chu that iloia khursehûma ithul rangin a ngena. Khaangkan, tha an tia an itlak tak a. Kha zoro takah khan rivai mihei an lei hong thapa, khur ata an kaisuaka Tangka sominikan an zuar tak a. Rivai mihei khan Izip reng Faroa vengtu sipai uliantak Potiphara ziangah an zuar nok a. A pa neh a unai Benjamina hein chu a thi tâkin an be a, a thurchi an riat khaino sikin.

3. Josefa chu Pathian rangin a iamom: Josefa chu tlangval mel itha tak a nit a, a pu Potifara omno karin a pi (a pu nupui) khan izalpui rangin a thlema, khannise, Josefan, “Ki pun ane

iam zoia, thil tinreng ki kuta a nen kola khan, nangmah chu nen kol make, ingkanim hi thil isual ilian tak hih Pathian mitmuah ki sin thei ranga,” itin a nôl a. A pi lak khan, zal rat isongin a kai ngit a, Josefa zakua a kai pai a, Josefa khan a zakua iman a tlan pat tak a. A pu a hong tlungin chu a pi khan a lei no a, “Josefan ne zalpui a tuma, ke khek pek rak a, a zakua khom hih ai mak rak a nit,” itin a lei no ngit a. A pu chu Josefa chungah a ning a thik ok tâk sikin Josefa chu lung inah a khum tâk a.

4. Josefa iamomna Pathianin a riat: Lung inah a tâng sungin Pathianin varna a pek a, rimang rilfia hei hih a thiam tak tak a. Voika Faroan rimang rikhel tak hi a neia. Armanga khan sechal ithai thai 7 ka an hong suaka, khanungah khan sechal ikong 7 ka an hong suak noka. A kong hei khan a thai hei khah an ilem vang tak a. Khannise, khop ual make. Khangka ngirin bu vuih itak 7 ka bu vuih takino 7 ka ngir rifah risak a mu sa a, Faroa chu a lung a buai ok tak a. A ram sunga mi var murdi a bûm khoma tute a rilfia pek thei omak. Josefa tâng ina om khah an va koia, ani khan, “E kum sarika richong rizom nita kum sari dang ram pumin ițam ai tuang rang a nit. Khasikin ner chong laiin ram pumpui rangin ițam sunga an bu nek rang kudâm ițha tak isiamin bu hei bûm khom ta roh, nakanah ni buai nona rang,” itin a rilfia pek a. Faroan arngain arkhel hih a ti tak tak a. A ram sunga ama dottu reng takin a siam zel tak a. Atunlaia supply minister ei inei angka hi ning a ti.

5. Josefa a urenghein bu an zuang zong: Josefa urenghei omna ram khom ițam sikin bune rang izongin Izipa an fe tak a. Tiana an unaipa an izuar khah bu sem ngai ilian tak ning ati iti reng reh maka. An nin chu Josefa a nit iti rekhaino khomseh aman chu a ureng hei an nit iti rimâi maka; khannise riphuang zel nuam maka. A u hei lakin rêng chibai unin a ke bulah an ikhûn dûl dûl a. Nungtakah chu arphuang tak! “Tiana nin unaipa nin izuar khah ki nit. Khan, ne ți no unla, a hun taka nangni inzok

rang pialin nin Pathian khan a ne lei inrifuk a nit hi. Ki pa khah ala damin chu nin nupui neh nai neh te hei neh hang ıthui vang unla, hin nangni lei ifâ ki ti ati zel tak a. An lom rei sikin an ıtap an ıtap a. Khanchu, an pa neh an nupui nai neh te hei hang iıthuiin ilom takan an om tâk.

Richang Spell: Mathaia 25:21: A pu khan a ziangah, “Nangmah isom iıtha neh iamom, ni thôn ıthat, iroicheka chungah iiam ni om sikin itam takka chung khomah nangin om ki ti. Hong inla, ki lômna hong dong sa roh, ’ a ti a.

ıTongridon:

1. Josefa a urenghei chungah an lal rang thu rimang ai nei khah ni riat danin isir ta?
2. Josefa khah a urenghein idorkanim an izuar?
3. Josefa kha a pan lung a thlung bik indangnan im ai pek?
4. Josefan Faroan rimang ai rilfia khah ingkana rimangim ai nit isir ta?

Risei rang 13

Thupui: Jakoba neh a nai hei Aigupta ramah

Itep rang: Genesis 46:26-34

A thiltum: Pathian mihei iamnotu hei suaka an om.

Thuma: Abrahamama kha Hebrai mi iti a nit (Gen.15:13). Hebrai chu “Tuiralhei” itina a nit. Atunlaia “ram dangmi” (foreigner) ei iti ngai hih ning ati. Abrahamama Kanaan a lût a khan hi riming hih an ivua a nit. Khantaka rithokin chu archi hei reng reng Hebrai hei itin an ikoi tak a nit. An òng khom Hebrai òng a nit a, Bible masatak khom khah Hebrai Biblei iti a nit. Thuthlunglui ithiam rangin chu Hebrai òng risei bak ai nang a nit.

Ṭam sikin Jakoba neh a naihei Aigupta rama an rithona, amakhan, kum 400 (Gen.15:13; Sintho.7:6) iti neh kum 430 (Exo.12:40; Gal.3:17) an om iti a nit. Kum 400 ka sar iti angka ringai eila idik a ti. An om sot a nit ti riattheina chu Aigupta an pan a khan mi 70 bang an nit a (Gen.46:27), an hong suak nok tenan chu kea lon idiar tak ringot khom nuai irukka an nit phak tak a (Namb 11:21). An rengkan vang chu nuai som an inis rang rihoi a nit. Meghalaya state mizon an iphak den rihoi a nit.

Pa khatka hin thuzerin “Pathian rilinga ito tuang intam tak khuang hih ning ata, a dot rang chu Israel hei ning anti,” ati an ti a, a dik ang reng. Pathian mi ini si’ n iamnotuhei suaka an om laiah khan ui-ar tak ilua khom an ivarh ino a nit.

1. Jakoba neh a nai hei Aigupta ramah an rithon: Josefa a ureng hein an i-en nuamino, an izuarpu khah Aigupta Reng Faroa nuai ah minister ilian takin a oma, Faroan ân lut sikin a nuam lam takkan a khosak theia. Khante, Kanaan rama a pa neh a urenghei khah tolailir iṭha tak tak imangin a hang thon a, mi 70 ka hei neh an ran lom hei neh khan. Aigupta ram ram ṭhatna mun Gosen phaia Faroa phalnan ân om tak a. Aigupta mihei lak khah Bera vai ngai mi hih an i-en nuam ngaiino tak a nit sikin an ta rangin chu a ran tea an hei iom khah ân ṭumna tak khom ai nit pek a nit.

2. Jokoba neh Josefa an thi tâk: Jakoba chu Aigupta a an rithonah khan kum 130 mi a nit a, kum 17 ka an om nungin kum 147 mi inin a thi tak a (Gen.47:28), A ruak kha Aigupta rama Doctor ithiam hein thu theiinoa siam rangin sun 40 an buaipuia. Kha rizoiin sun 70 ka an ṭa nok a, khanung chu Kanaan rama an sungkua ithlan ranga inranah om ithlanah an hang phum tak (Gen.50:1-13). Josefa khom a thi zoro a hong nai tak. A suapuihei ziangah Aigupta chu an ram idet ni maka, Kanaan rama kir nok rangin Pathianin a lai ṭhui isua rang a anit a; khangkana iṭhui isuaa an om tikah amah, Josefa, ru hei khom ichoi sa nget rangin he archa diam a. Khanchu, kum 110 mi inin Josefa chu a thi tak a (Gen.50:24-26).

3. Josefa riano reng dang an hong inlal: Josefa damlaia Faroa khah chu Aigupta mi diktak ni maka; Hyksos mi, “Berapu Renghei” an ti ngai hei laia mi Asia ram tiang mi a nit a. Annihei richia renghei khan chu Israel hei khah an ditsakin an ngaisak ok ngaia. Khahei richia khah lan lal mai sela chu Israelhei khomin Aigupta khah an ram ni mak iti an riat phak no khom ni thei a ti. Khannise, Aigupta mi diktak an hong inlal tak tenah khan Israelhei khan kuttum an ituang tak a nit. Sin intak tak takhei an insia Lung inrimanna (cement) angkana hi ning ati neh rolung (Ita) an insiama. Lungkhamna nei viat iloiin ui-ar angka doran an imang a nit a, an nuam tik tika an itok a. Josefa lak kha a thi tak a, ite ti ngam iloiin an iom tak a nit. An sol rei sikin an lungkhamna an riphath ngaia, khan, lunginkham nekan sin inrik ual an insin ngai. Hebrai hei khah an pung tûr tûr sikin an rihel rang an ṭi sikin Hebrai nai ipa suak reng reng ithat let let rangin mi nai innei ngai hei khah thu ipe an nit tak a. Khannise, Aigupta Nurse ifel tak tak mi inika Saphraii (Moi) neh Puaii (Thangi) hei khan Hebrai nai isuak ipa hei kha a rugin an saninzok ngaia. Khanchu an hong pung tûr tûr ngir tak a. Pathian khomin Moii neh Thangi hei khah a ditsak ok ngai. Hingka dora intak ituang pumin kum 400 ka sar Israel nai hei chu

Aigupta ramah an iom a nit. Josef an thi rang toa hê a ircha angka khan Pathianin la thui isua nget a tim iti chu ei la irsei ranga ei iriat rang a nit.

Richang Spell: Hebrai 11:22: Iamnan Josefa khan, a thi rang a hong nâaih khan Israel richihei Aigupta ram ata an hong suak rang thu â sîr a, a ruhei an rê rang dân khom â ril a.

Tongridon:

1. Hebrai iti hi itenam? Tum arpu masatak? neh atun laia tongkamin im ai nit?
2. Josefa damlaia Aigupa reng ichang ngai hei khah tak mim an inith?
3. Jakoba khah kum idorka anit inim Aigupta an irthonpui? Aiguptaa kum idorka a om nok nung inim ai thi?
4. Jakoba ruak khah sun izakam doctor hein an ibuaipui? Sun idorkam Israel hein an isûn?
5. Moini neh Thangi ei iti hih tuhei mani? Im an itho ngai?
6. Aigupta mihein ingkana miheim an i-en nuam ngaiino?
7. Josefa thucha nungkhon ni riat danin isir roh.

Risei rang 14

Thupui: Aigupta suak an zok thu

Itep rang: Exodus 3:1-10

A thiltum: Pathianin a som imanga mihei a sanisua.

Thuma: Exodus hih Grik tong thumal inika “Ex” (isuak, rikhai, rikiang) neh “hodos” (lampui inzin) iti rizoma imang a nit. Ite suak manih, inzin suak manih, rikhai pai tina manih a nit. Ei Bible in Fesuak itin a mang sikin Fesuak iti hih a irhoi nise arhoi. Israel naihei Aigupta suak ata Kanaan ram ipana an fesuak thu hih Exodus thupel tak a nit.

Kalkan kût neh Exodus hih Judahei sakhua ringatna bulpui a nit. Kristian hei rangin Jisua thina neh thoinokna ai poimo angka tak hi a nit. Israel hei Aigupta suak ata an suak thu neh Kristianhei sual neh thina suak ata suak thu hih Bible thupui poimo a nit. Kha suak bôih ata saninzokna sinitho rangin Pathianin a sinthotu a siam ngaia. Sual boia tânghei inzok rangin Pathian sinthotu ei nit sa iti ei riat rangin ei inuam a nit. India ram khom British (saphei) kut nuaihan hun isot takka a om nungin Mahatma Gandhi’n zalenna a sual tak tak a, kum 1947 15th August a Independent inpuang khah ingka dorkam India ram mihein ei ilom. Vuaniten khomin 15th August a thlung ikipa lomna ei inpuang ngai a nit.

1. Pathianin Mosia a koi: Sunka chu Pa khatka hi bera enkola a om lain Pathianin a zuang isona. Aigupta reng Faroa ziangah ife a, a mihei Kanaan ram ipana infe ranga ngen rangin itir a nit thu a rila. Kha mi khah Mosia a nit. Mosia chu a huphur tak tak a, risit khom arsit ok a. “Ker sit rei tak, ne tirtu riming khom ki riat ino keng, va sir ta maninlang tuten ki thu oi nonih hi te. Ke dang khom ar ngola, tong ri-ak keng ki nit,” a ti a. Pathian khan “Nang ompui ki ta, sinthotheina nei rangin nang tangpui mai ki ti,” itin a thora. Riphial rang dan a riat khaino sikin kha sin khah ithok rang arsiam zel tak a.

2. Faroa lak mi tuklul ilian a nit: Mosia khan Faroa ziangah a thu riat a zu sir a. Ani lak chu a lei khir khap tak a. Mosia khan Pathian rimingin sinrikhel dang dang isomka imangin Faroa mihei chu dûk a hang intuanga. An tuang laiin chu Faroa lungril arnêm viat ngai a, “Hi dengtheina hih inboi inla khanchu, nangni isua ki ti,” a ti ngai. Khan, a hong boi nokin chu phal nok khai ngai mak a. Mosia khan tui hei thisen ân chang pek, uṭok ân tâm pek, rik intâm a sua pek, ithoi intâm a sua pek, ui-ar intâm â thlâk pêk, sakhuai ân rivoi, irial ân sûr pek, ikhai intâm a sua pek, sun thumka ini ân zîng pek. Hi thil ithlunga hin Aigupta mihei rangin chu tuang thei rual loi a nit a, Israel mihei rangin chu ite intakna ai omina a nit. Khaten khomin Faroa lungril chu ala khir maia. A nungkhon takah chu Aigupta mihei insungkua tinah nai ipa suak masa murdi chungah nai lutir thina zanka thlakin a zuang thlung tak a. Israelhei chu kha thina khan a kal rikana, bera thisen an inkhar ibiang kâng tiang seng seng an inot sikin. Amah hi kalkan kût hong riphutna bul a nit. Khatenah khan chu Faroa khom tuang zoi khai maka, Israel hei chu isua a phal thei ṭok tâk a. Faroa lungril ikhir hh Pathianin ingkana lungril ikhir khom a nê nget ngai iti inlangna a nit.

3. Mosia lo a thluk tak: Aigupta mihein an mithi hei an buaipui laiin Israel hei chu an sum neh puan, an richon iṭha hei neh an ran lôm hei neh Kanaan ram ipan rangin Aigupta ata an suak hûl hûl tak a. An tamzia lak khah kea lon idiar tak ringot khom mi nuai irukka iti a nit a, an ran lom hei neh an neinun murdi neh naipang puak chungah pua hei, dartinchungchuanga an itho hei, an suak hei neh khanchu a miriam ringot khom nuai som ikai an inith rang rihoi a nit a, en iom tak rang a nit. Atunlaia angkan ṭong inring mun (mike) lak la om no nia Mosia rangin chu ibuai iom tak chu ning ati. Khannise, Pathianin a mang nuamna a tirna khan Pathian mihei sanisua sin a ithok chu a bul riphutna Exodus ai mang tak hi a lo thlukna a nit.

Rchang Spell: Lapui 119:105: Ni thu hi ki ke rangin meiser a nit a; ki lampui rangin ivâr a nit.

Ṭongridon:

1. Exodus iti hih iṭong ata ila suakim neh im a omzia isir ta?
2. Judahei sakhua ringatna bul im a nit ei iti kha?
3. India ram zalenna mu kum, thla neh tarik riziak roh?
4. Mosian sin rikhel a inlang isomka hei an dotin riziak ta?
5. Pathianin Mosia a mihei inzok ranga a tira khan riphialna rangin ingkana mîm ki nit ai ti kha?
6. Israelhei Aigupta suak ata an fesuak laia kea lon idiar tak hei ka idoram an inith kha?

Risei rang 15

Thupui: Ramikung ipanin ramcharah an inzin

Itep rang: Hebrai 3:12-19

A thiltum: Pathianin a mihei an risei ngai, amah an riattheina rangin.

Thuma: Mosia lekhabu ringaka hei laiah hin Riphutna, Fesuak, Levidan, Ritepna, Daninikna hei ka hi chu Israelhei Aigupta ata an suaka, Kanaan ram an lût ma tet Jordan sua lam Moab phaizol an thlung idena an thurchi riziakna bu a nit. Hi sungah hin Juda sakhua thurin ringatna chu a om vanga. Mosia lekhabu hih nin riat intamin chu Thuthlunglui thonthu chu nin iriat intam ok rang a nit. Hi lekhabuhei sunga hin Mosia Dan ei iti ngai chi dang dang Thupek som (Exo.20:1-17) hei, Thuthlung bu (Exo.20:22-23:19) hei, Rithiangna Dan (Lev.20:1-17) hei, Deuteronomy Dan (Deut.bung 22-25) an iti hei ai om a nit. Hihei banah Thiampuhei rivongna dan neh sintho rang dan ifel taka riziak a nit a. A thupek hei an zom theina rangin an inang murdi a zoro takah a pek ngai a. Ama nekan anmahni an ringai poimo ual zoron dûk dengtheina ân tuang ngaia. Kha dengtheina tin hei khah anmahni inriseina ranga Pathianin a mangruaa ai mang ngai a nit amah, an riat theina rangin.

1. Pathianin Israelhei a ruai mai: Aigupta ram ata hong isuak hei khah Pathianin a ruai mai a. Tuipuisen khom Mosia rol imangin a tôk isat a, imuang icharah an fea (Exo.14:1-15:21). Ifah rang an risam zoron an ițul țul imu thei zel rangin Manna a peka. Sa an rizukin vamim a sua pek a (Exo.16). An tui arhalin Mosia rol imangin lungpui ata tui a tok isua pek a (Exo,17:17). Khangka khan ramchar ite om nonah munah khan a ruai a. Kanaan ram ilût ranga a ruaitu khan a thlung nget i-iam ai om a nit.

2. Pathianin dan chi dang dang a siam pek: Miriam hih a loma om ranga Pathianin ane isiam a nit sikin munka om mai theina rang dan (riruaina dan) ei inang a nit. A loma om ngai ei

init angka ei rimun mai theina rangin ruaitu ei ițul a nit. Ei ruaitu tak chu Pathian a nit. Khasikin Israel hei khom an Pathian neh an miriam champui hei karvana an om rang dan ița Pathianin ai pek a nit. Hi dan hei hi ibâ nonah ranga lampui izuia tûk bân ei itho ngai angka hi a nit. Kha tûk bân itundet ino chu ibâna a nit a, itun richela lon chu ibâna om ngai maka an fena rang an itlung ngai a nit. Pathian dan ei iti khom hih khangka khan a nit. Dan ichai iloia ringnun imang chu Pathian iruaina lam izui a nit a, an tum ram an thlung ngai.

3. Pathianin a mihei dûk a tho ngai: Pathianin mi dûk a tho a hin san a nei ngaia, an isual sik ringotin dûk ai tho ni loin, an sual rilet a, an hong kir nok rang itungin ai tho ngai a nit. Israel hei khah Pathianin a ruai ințhat tlia kaneh thil ite sikin manih Pathian an iringla nok zel ngai a nit. Amakha, Pathianin nuam maka, an chungah inriseina a zuang itlung pek ngai a nit. Mosian sinai tlangah Pathian thupek a hang lak lai khomin rangkachak serat chal rilim an lei ikhunah khan Pathianin anmahni a inrituk that a nit khah (Exo.32:25-29).

Arona neh Miriamin Mosia ruaitu a nitna an thik sikin Miriamin chu voika rengin ai phâr a nit (Num.6:12). Kora, Dothana neh Abirama hei khomin Pathianin ruaitu a ai siam Mosia neh Arona anphiar rûk sikin rineng ikakin a lem ei iriat a nit. Khasikin mipui hei chu Mosia chungah an ilung hoi mak a, Pathianin ri inlengin mi 14,700 ka an ithi phak a nit (Num 6:16).

Țumka khom Pathianin a ruaina lamah an riphun nok rek a; Pathianin irұл tûr irat tak inei a hong tir peka mi tam takah irұл tur rivoiin an ithi man a nit (Num.21:4-9).

4. Pathianin thu izom rang a nit: Aigupta rithoka Kanaan ram panna lam khah lah bāk no khomseh Israel hei khah Pathianin kum 40 ka thangin a iruai inrikual a nit. A san chu lam dangah iruai seh an intak sik rang dan a riat pek vang sikin a nit. Ramchara fe thleng iloia fea ridoina an sik mai rang khah a mu

pek vang sikin (Exo.13:17). Pathian hin ane ruai inthat ngai tlia kaneh ei hang iringla nok ngai hi chu na! A mi dit bik hei vang chu an lungril a khir pek oka a nitin chu inriseina khirh tak neh a iruai ngai a nit kha.

Richang Spell: Thubarhei 28:9: Dân zôm nuam inotu chu a tongtaina khom itir iom a nit.

Tongridon:

1. Mosia dan bu ringaka an dotin riziak ta?
2. Mosia dan dang dang chi ilika ei ithen khah i-im an init riziak ta?
3. Pathianin Miriam hei hih ingkana om rang inim ane isiam?
4. Pathianin mi duk a tho a hin im san ai nei ngai?
5. Pathianin a mihei im a pek ngai? Ifah rang an risamin, sa an rizukin, an tui arhalin.
6. Tu heim rineng ikak ilem kha?
7. Pathianin ri an lenga a thi hei khah idoram an init?

Risei rang 16

Thupui: Israelhein raminkung an lût

Itep rang: Joshua 1:1-9

A thiltum: Pathianin a sinitho rangin a mihei an rithluk mai ngai

Thuma: Joshua chu Mosia nung ithultu, Israelhei Kanaan iruai itluntu neh Israel nam hei an lua rang chit isempek tu a nit. Efraim nama mi a nit a, arming dik tak chu Hoshea a nit a, Mosian riming ithar Joshua itia ai be nok a nit. A omzia chu Inzoktu, “Saninzoktu” itina a nit. Amalek iral an doi laiah khan Mosian sipai ruaitu takin ai mang a nit (Exo.17:8013). Mosia ritongna puan ina a fe laia tangpuitua a tang (Exo.33:11). Kanaan entlattu (spy) mi 12 ka laia khatka a nit (Num.14:6-10). Joshua ruaitu thar iruaina nuaiah Israel hein Kanaan an lut thu ei irsei rang a nit.

1. Kanaan ram lei iluah hei: Israelhein Kanaan an hong lût nok maa Kanaan ram lei iluatu namhei chu Amorhei, Hithei, Periz hei, Kanaan hei, Hiv hei, Jebus hei an nit. Hi namhei reng reng Pathian iring isava ngai an lei nitno sikin Israelhein va um rizula an mun va chuan pek rangin Pathianin thu ai pek a nit.

2. Israelhein Kanaan ram an lût: Israelhein Kanaan ram an pana Moab ramah an om laiin an ruaitu tak Mosia chu a thi taka. Nuna naipa Joshuan Mosia mun chu a thul taka (Deut.b.34). Khanniselan, Aigupta rama suak murdi hei chu lam laiah an thi vanga, Joshua neh Kaleba tino chu (Num.14).

Joshua lomin Kanaan an lût a khan Jakoba nai 12 ka hei riming chitin an ranin rambung a sempui a. Levia chihei chu thiampu an nit sikin ram bik nei iloiin an suapuihei somakhat kha an chantum ini rangin Pathianin a rel pek a. Josefa riming bika ram chantum om iloiin a naihei Efraima neh Manasea rimingin ram chantum ipe an nit. Josefa neh Levian ram chantum neino khomseh Efraim neh Manasean an chang sikin Jakoba nai 12 ka hei chu rikipin chantum an irsem a nit.

Jordan dung chu martianga rithokin sim tiang ipanin a luanga Tuipui (Dead sea) thiah ai lût a nit. Jordan ral sua lamtiang nam inika neh nam rizatka; Reubena nam, Gad-a nam

neh Manasea nam rizatkan an lua a. Jordan ral kothlang tiang a danghei chu an om vanga, Manasea nam rizatka dang hei khom an tam dan izirin ram chu an irsem a nit.

3. Ral idoi risiam tian rang: Kha ram bung hei an hang risemah khan an iral hei murdi khah Pathianin ai ûmisua pek vang ni viat mak e. An lua zoi loi rang rama mihei khah ûmisua vang a nitin chu ram khah ân thim rei rang sikin a tûl dan izira ûmisua thiai rangin thu ipe a nit (Exo.23:29). Amah hih Kristian hein nenah ei chang dan neh khom a ir-ang a nit. Pathianin sual tinreng hih voika ine zit rang ti maka, sual chu idoi thiaia ine thiai rangin ane inuam a nit. Joshua ziangah khom “Ni sirna tenah ni ram ningati,” (Jos.1:3). aiti angkan. Pathian rilinga ei tuang ngam dan izirin Kristian irat ei initin, ei init ino thei a nit.

4. Pathianin a sinitho rangin a phût: Joshuan Israel mipui hei chu ikoi bûmin, Pathianin lung a thlung sika a ruai dan murdi chu irilin, anni khomin Pathian chu lungithlunga, a sin chu iþha takka tho an irtâng a nit itin ai fuih a nit (Jos.b.23). Pathianin an chungah a tþat a, a lei enkolna murdi chu a sin an thona ranga mo a lei inpelna a nit. Ei ni te mo ei pel iti ei riatim?

Richang Spell: Luka 12:28: Khaangkan ram loisûl, vuaninta om, naktûka lungthua hâl nôk rip rang ilua Pathianin khangka dôran a von teh, nangmani iamna chînhei o, khahei nêka khan nangni a vo natinsat rang vang na!

Tongridon:

1. Joshua riming masa khah im ai nit? Joshua iti hih tu ibe mani?
2. Joshua sipai ulianah a tång masa takin tu ral im an idoi?
3. Kanaan lei ilua namhei riming ân dotin riziak roh.
4. Israel nam laiah tu namheim rambung nei ino?
5. Jordan ral sualamtiang ram bung ipe nam hei khah tu tu namim?
6. Jordan dung tak tiangim a irngam?
7. Rambung an risemnaah khan ithom iralhei ûmisua vang an nitno?
8. Ingkam Kristian irat ei init rang?

Risei rang 17

Thupui: Roireltuhein Israel an op

Itep rang: Roireltuhei 2:6-3:6

A thiltum: Roireltu diktak chu Pathian a nit.

Thuma: Israelhein Kanaan ram an lua nung khomah khan nam danghei chu an velkan an la om mai a. Israelhein Pathian an iam inþat neh tþatno enfia nan an lai om mai a nit. Joshua a dam laiah khan chu an rengkan a op vanga. Joshua a thi nungah khan chu a tûl dan izirin iral hei ata saninzoktu rangin Pathianin roireltu mi 14 ka a huna rangin ai ngaitua pek a nit. Roireltuhei sinzong tak chu iralhei ata Pathian mihei sanisua a nit sikin “Sanisuatuhei” iti rang rihoi tak an nitin an ringai. Khotualah neh ram chungah roi an rel ireh rang omaka, a tûl dan izira Pathianin ai mang chop an nit. Hi angkana huna roireltu tak tak chu Pathian a nit sikin an thurchi riseitu hein chu “Pathian roirelna hun sung” (Theocratic period) itin an ibe a nit.

1. Roireltu hei hun sung: Joshua a thi zoiah khan Israelhei chu ruaitu bîk nei iloiin an om a. Ruaitu boia omin chu nuam nuama om hih iol tak a lei nit ngaia. Iralhei khomin ingam takka hong idoi an itum zel ngai a nit. Kha iralhei ata an nam inzoktu rangin Pathianin mi tukhok manih rithlangin ai mang pek ngai a nit. Khangkana mihei iruainan iral chu an hang inea, kum idorka manih chu ralringamin an om nok ngai. An hong isual noka, runtun an hong om noka, Pathian ziangah insirin an rilet noka; Pathianin mi 14 ka reng sanisuatu rang mi ai phun pek a nit. A nungkhon takah Samuelan roi a rel laiin reng inei an nuam taka. Pathianin an reng masatak rangin Saula chu a pek tak a. Khante, Joshua thi nunga rithokin reng Saula inlal ma sung khah Roireltuhei mi 14 kan roi an rel hun a nit a, kum 410 vel inin a lang.

2. Roireltuhei: Roireltuhei thurchi risei rang eila mi khatka thurchi lua khom ei isir zoi ino rang a nit sikin an riming neh an riming omzia neh an thurchi omna bung neh richang ka risin tum eila insungah hong risei tum eila tþang a ti.

An riming	A omzia	Omna mun
Othniela	Pathian sakeibaknei	Roireltu 3:7-11

Ehuda	Rizomkhom	- do - 3:12-30
Samgara	Iria nimak	Roireltu 3:31
Debori	Ikhuainu	Roireltu b.4-5;
Baraka	Khothlar	Roireltu b.4-5;
Gideona	Tuk isattu	Roireltu b.6-8;
Abimeleka	Rengtakpa or	
	Ki pa chu Reng a nit	Roireltu b.9;
Tola	Rilung tete	Roireltu 1:1-2;
Jeptha	Inzalentu	Roireltu 10:6-12:7;
Ibzana	Iria nimak	Roireltu 12:8-10;
Elora	Sasua	Roireltu 12:11-12
Abdona	Suak angkana	Roireltu 12:13-15
Samsona	Ini dôr keng	Roireltu b.13-16;
Samuel	Pathian iriata	1 Sam.2:20-25:1;

3. Roi an rel dan: Israel namhei chu nam dang dang angka iding ta khomseh lunginrual takan an iom dil inin a lang a. An chungah sualna sikin iral hei an hong râng a, annin an sual khah poi antin chu Pathianin anmahni sanisuatu rang mi rat khokhông ai tir pek ngai a nit. Kha iral hei khah inen ral ringumin an om ngai. An chungah roireltu diktak chu Pathian kêng ai nit. An siatna neh an iding suak nokna ngai khom Pathian ata an om dan izirin Pathianin ai rel ngai chu a nit. Roireltuhei ei iti hei hi chu Israel chungah Pathian roirelna mangrua ka keng an init ngai iti hih ei riat mai rangin ei nuam.

Richang Spell: Thubarhei 11:9: Pathian ngaisak ino tòng khan a bungtualbômhei â siat ngai a, mi fel vârna rêkin chu mi dikhei a saninzôk ngai.

Tongridon:

1. Mithiam hein Roireltuhei ei iti hih im ting eila arhoi an iti?
2. Joshua neh reng Saula kara roireltuhei khah mi idorkam an init?
3. Roireltu diktak khah tum a nit ei iti kha?
4. An riming omzia isir ta?
 - a) Debori b) Baraka, c) Samsona, d) Othniela, e) Jeptha, f) Samuela,.
5. Roireltu laia an thurchi ne lung iton tak thurchi ni riat danin isir ta?

Risei rang 18

Thupui: Israelhein reng an nei

Itep rang: 1 Sam. 1:4-22

A thiltum: Reng iṭha tak neh isual tak ei nei Pathianin a phal.

Thuma: Roireltu nungkhontak Samuela a thi maah khan Israel mipui hein nam dang hei angkana reng inei an nuam thu an irila. Pathianin a phal sikin Samuela neh a lomin reng an rithlang tak a. Saula Kisa naipa chuh an reng masatak a hong nit tak a. Saula chu Davidan a thula, Davida khah Solomonan a thul noka. Hi reng ithumka hei inlal sungka Israelhei chu an rengkan reng khatka enkolna nuaia an ioma nit. Solomona thi nungah khan Juda lal ram chu reng 19 kan roi an rela, Israel lalram a mong nungin kum 100 ka ala iding thei a nit, Juda ram chu Babulon sorkarin irûnin an imong a nit. Hi lalram inika hei an iding sunga roireltu reng hei khah a then reng iṭha tak tak an nit a, a then reng isia tak tak khom an iom a nit.

1. Israelhein reng inei an nuam: Samuela a hong tar ok taka khan ama thultu rang a naihei Joela neh Abija an nit a. Anni lak kha mi ṭha neh irintlak rangin ilang maka. Thamna la hei, dikino tak taka roi irel an song ngai sikin Israel mipuihein an vela nam dang hei angkana reng tak inei an nuam taka. Samuela ziangah an ngena, Samuelan chu lei lôm bâk maka. Samuelan Pathian a rôna, Pathianin mipui hei ngenna chu ingaitua pek rangin â ril a. Khannisela rengin an chungah roi a rel tikah an thiltinreng chungah ân lal rang dan thu chu a ril vanga. Khangka a nit khomin an nuam ngit tak sikin Pathian ṭhat tipuiin Samuelan an reng rangin Kisa naipa Saula chu arthlangpui tak a.

2. Israel reng ram ithumkahei: a) Saula: Saula khan anlal sungin iral a doi intam ok a. Ani hih mi lian neh dung risang a nit a, mi vantlang hei khomin a dar tenah an phak thei chak ngai anti. Khan, Pathian nuamno lam a sin intam a. Ân lal mong tiang vang chu invêt angka ai om tak a nit. A naipa Jonathana neh Davida hei khah mal richan an nit a; khannise, Saulan, Davida

khah ithat a tum mai ngai a. A nung taka chu Filistia iral hei neh an ridoia, Filistia hein amah neh a naipa, ithumka hei neh an ithat a nit. An lal kum sung hih kum 40 a nit.

b) Davida: Reng Saula kha a that reino sikin a damlai sung ngeiin ama thultu rangin Pathianin Davida chu a lei inrifuk pial tak a nit a. Davida chu reng roinpui tak, Pathian idit zong tak mi inia sir a nit (1 Sam.13:14). Ama lua tak khomin idiknona chu ai nei ngir a nit. Kum 40 ka roi a rel a, a naipa Solomonan ai thul a nit.

c) Solomona: Solomona chu roi a rel indik theina rangin Pathian ziangah varna a ngena (1 Renghei 3:9). Reng ivar taka be a nit. Thuvar 3000 a sira. La 1005 a phuaa (1 Renghei 4:32). Israelhei laiah Pathian Biak in (temple) sin masatak a nit. Nupui 700 aneia, thaikem 300 a nei sa (1 Renghei 11:3). A nupui hei sika hin hoisakfamna lamah neh milem biakna lama thuiinvaiin a om a, a mihei rang Reng thano tak ai nit tak a nit. A thi nungah khan Israel ram chu inikan a inthen tak a nit.

3. Mi thanohei reng itha nei an tak: Mi thanohei rangin reng itha nei an tak ngai. Mi tha rithlang rang tak ngan khom niseh tum a om ranga? Thil dikino manga rithlang Reng hein idik takkan roi khom rel thei ngai make. Arthlangtu hei khomin dikinoa tho a nit iti reh ual ngai maka chu Reng itha neh idik tak suak ngai make. Reng itha nei neh nei no chung thu-ah mipui hein mo an pel. Ei ramah ruaitu tha neh idik inei rangin mipui hei mo ei ipel a nit iti ei riat a tul.

Richang Spell: Nehemia 9:37: Pumapa Pathian, nangman Abrama khah ner thlang a, Babilon ram Ur khua ata ni thui suak a, Arming Abrahamana ni sak pek a.

Tongridon:

1. Israelhei an rengka reng khatka enkolna nuaiah an om sunga khan tu tu reng im reng ichang?
2. Juda lal ramah khan reng izakam roiirel?
3. Israel lal rama khan reng izakam roiirel?
4. Israel renghei laiah tum Pathianin “Ki lungril ri-angpui ki mu tak,” aiti?
5. Israel reng hei laia tum temple sin masatak?
6. Reng Solomonan i) Idorkan thuvar a isir? ii) Idoram la ai phua? iii) idorkam nupui ai nei? iv) idorkam thaikem ai nei?
7. Ingkana miheim reng itha nei rang?

Risei rang 19

Thupui: Israel neh Juda ram inthen thu Itep rang: 1 Renghei 12:1-15

A thiltum: Inthen hih ratnona bul a nit.

Thuma: Solomona a thi nungah khan a ram chu inthenin a om taka. Martiang (northern) Jeroboama lomin nam 10 ka hei mahni khata roiirel rangin an inran a. Jeroboama hi Solomona sinitho ngai laia ruaitu tak a nit a (1 Renghei 11:28). An ram chu Israel ram or Efraim ram iti manih a nit ngai. Nam. 9 ka hei lai ata zuang ritlakin reng 19 kan roi an rel man a. Assuria sorkarin B.C.722 ah khan a hong run a, Israel lal ram chu ai mong tak a nit. Khantaka rithokin chu nam 10 ka hei chu an thurchi isui zui rang om khai mak.

Simtiang (southern) Juda neh Benjamina nam inika hei chu reng dik richi Solomona naipa Rehoboama lomin Juda reng ram an indinga. Anmahni reng richi zuang rizomin reng 20 kan roi an rel mana. B.C.586 in Babulon sorkarin a hong runa an reng hei neh suakin a thui vanga. Juda lalram khom ai mong a nit.

1. Israel neh Juda inthen: Ei zuang isir mai tak angkan Israel ram chu Solomona inlal tenah khan ram khatka omin reng khatkan roi ai rel a nit a. Solomona naipa Rehoboama a hong inlal a khan a mihein a pa Solomona zianga sia an ichoi ngai itam rei khah inrikai ual rangin an ngena. Rehoboama khan aram upahei a rona, anni khan chu inrikai pek ual nise iti khah an nuama. Rehoboaman tlangval hei a ron noka, anni rekin chu ikhir khapka a mihei chung roiirel rangin an ithora. Tlangval hei ithor dan angkana roiirel rangin a thluk lem tak a.

2. Jeroboama: Kha zoro laiah khan Solomona sinitho ngaihei laia ruaitu chang ngai mi fel tak hi a om a. Arming chu Jeroboama a nit. Ani hih Efraim richi Nebata naipa a nit a. Rehoboaman mipui hei ngenna a lei nol pek tak sika khan an ram martianga om nam 10 ka hei tanginrualin Jeroboama neh a lomin an inran tak a. Kha maton teta khan zanthla Ahiza'n Jeroboama inlal

rang thu a lei iril khah a nit saa. Kha entirna rangin zanthla Ahiza'n a puan khah lek 12 ka thlerin lek 10 ka Jeroboama a lei ipek a nit. Jeroboaman a khopui rangin Sekem arthlanga. Hi khua hih Tirza khom anti sa ngai.

Jeroboama hi reng iṭha tak chu ni mak. Milem biakna mun hei a siam a. Kût khatka thla sarina a an inei ngai chu thla riatnaa mang rangin a thon pui a. Voika khom zanthla khatka hi iman a tum a, a hei iban kaneh a kut hei a kim pek khapa lah kir khom lah kir thei khai iloiin a oma. Kha zanthla khan Pathian ziangah a ṭongṭai pek nok sikin ala dam nok (1 Renghei 13:4). La thonôk ngam ati nin iamim? Kum 22 vel roi ai rel a nit.

3. Juda neh Israel ram: Hintaka rithokin chu Israel thurchi an isirin Juda ram neh Israel ram hi a ran rana isir a nit mai tak. Juda ram chu an ram simtiang Juda richi neh Benjamin richi hei omna ram khu a nit a. An khopui chu Jerusalem a nit. Israel ram chu khâ nam inikahei bana Israel nam 10 ka hei omna ram murdi a nit a. Hingkana ringei iloia an hong inṭhen indarh tâk sika hin nungtiang chu iral hein an ngaminsiat an ruaikan lungsiat iom takkan an imong a nit.

Richang Spell: Mathaia 12:25: Jisuan an ingaituahei khah a riat a, an ziangah, “Tak ram khom lôm risiamin an ridoi risakin chu iding sôt ngai mak e. Tak khua khom, insungkua khom lôm risiamin an ridoi risakin chu an ilîr rang a nit.

Ṭongridon:

1. Ithom Israel neh Juda inṭhenin an iom?
2. Rehoboaman tuhei thurôn pek inim roi ai rel?
3. Jeroboama ingkana mi neh tu richi'm ai nit?
4. Tu zanthla'm Jeroboama inlal rang â ril?
5. Israel lalram khopui kha ikhua mani?
6. Jeroboama Israelhei chungah kum izakâm ânlal?
7. Juda rama nam idorkam an om? tu tu heim?

Risei rang 20
Thupui: Israel ram
Itep rang: I Reng hei 21:17-25

A thiltum: Pathian iamino hi rimangna a nit.

Thuma: Mar tiang (Northern) a om Israel nam 10-ka hei khah Israel ram a nit a. An Reng Jeroboama kha Efraim richi a nita, Efraim ram hi Israel ram inlaina taka om ai nit angkan Efraim ram iti khomin an mang ngai. An Reng hei neh an nam ruaituhei Pathian an iam dikno sikin an tuang ngaia, nung tiang vang chu Assuria Sorkarin B.C.722-a khan a hong rûna an thurchi lua isui zui rang om khaiino khopin an iom a nit.

1. Israel ram: Mar tiang Israel ram (Efraim ram) chu Jeroboama rithokin Reng 19-kan roi an rel rithlâka. An Renghei laiah Jehua ti nino chu Pathian nuamno lam isin ngai Reng isual tak korong an nit. Reng nitna khom Reng richi ual om iloiin nam ikuaka hein richu neh zal rat isongin Reng ṭhungmun an ilua ritlak ngai a nit. Reng richua kha dora nam hei ibuai karah khan chu a om a hoino rang zia chu na! Bung tual bom neh ibuai ilua hih a hoi ei iriat ngai ino a nit. Ei ni hei khom ei nam danah ilal ṭhungmun te te hih a om ngaia Ureng sung neh Panam sungah rinuarna te te ai om mai ngai a nit. Hingkana ilian richu na hin chu inpumna ai om thei tak tak ngaiino a nit.

2. Milem ibia an uar: Pathianin ai dem tak chu milem ibia hi a nit. Milem ibia iti chu Pathian neka thil dang ringai inlut ual hi a nit. Bible-in Kuatinkamna hi milem ibia itin â sir sa. Ei Kuatinkamna hin ei lungril murdi,ei rithla murdi,ei ngaituana murdi a lâk vanga Pathian angka dorkan ei ibiak ngai a nit. Israel Renghei khomin milem ibia hih an uar tak taka. Reng Ahaba zoro lai vangin chu Baala thiampu mi 450 neh Aseri thiampu mi 400 lom hei neh Pathian zantla Eliza a khât bangin an irsiakpui a nit kha, Eliza chu Pathian iringin a zuang ṭangpuia nenah ai chang a nit. Baal Pathian thiampu hei chu ithat vangin an iom a nit. Ahaba nupui Jezebeli vang chu Bible in nupang

tin tin laia nupang isia taka ai record a nit. A thi khomin aruak khah ui hein an ifâk zoi lôk a nit. (2 Renghei 9:35)

3. Pathian iamino loman anmu: Israel Renghei laiah neh an ram mipui hei laiah khan Pathian izâ neh iṭi reng omake. Pathian ilua ṭi khaiino khan ite poisak rang nei khai ngai make. An miriam champui hei lunginkhamna châng khom reh khai maka. khasikin, lunginrual neh ṭanginrual khah chu thil theiino thluk a nit. Juda ram among ma Kum 136-ka velah khan Assuria Sorkarin a hong rûna. An rengkan suakin ai ṭhui vang a nit. An khopui Ninevi a tâng inah ai khum vang ningati. An chung thuBible in alei isir lok chu a idik a nit hite, 1 Renghei 14:15-16-ah khan: “Pumapa khan Israel hei chu kuttum thong ata, vadunga lailuang inîng angka Israel hei chu inning ati. Aseri Pathiannu lem hei isiam a Pumapa ning an inthik sikin an chibul hei a lei ipek tâk ram iṭha tak ata hih Israel hei chu la phâi infai vang ata, Eufrates vadung pen tiang la thekindar ati. Israel hei chu Jeroboaman a ruai insual na hei sikin Pumapan Israel hei chu nung ai song rang a nit”, a tia.

Richang spell: Lapui 68:2: Meikhû a îlêng rimang ngai angka anni chu an îlêng rimang a; khuailu chu mei iluma ai zôi ngai angka, Mi siahei chu Pathian makungah an rimang tâk.

Ṭongridon:

1. Israel ramah tuhei namim an ram inlaina taka om?
2. Israel nam idorkam Rengṭhungmun richu ngai?
3. Israel hei Reng laiah tum Reng idik tak?
4. Baal thiampuhei khah idoram an init?
5. Aseri thiampuhei khah idoram an init?
6. Pathian zantla Eliza neh Baal neh Aseri thiampu thu khah ni riat lamin isir ta?
7. Israel hei Pathian an iamno lomman im an imu?

Risei rang -21

Thupui: Juda ram

Itep rang: 2 Renghei 23:1-3

A thiltum: Pathian thu ringaiinlut nam hei chan aṭhat ngai.

Thuma: Juda ti hi Hebrai ṭong a nita, Ei ṭongin chu “Inpak oma” iti rang rihoi tak a nit. Juda ram simtiang ram nam inika hei kha an nit. Davida rithoka Reng richi zuang rizot maia roi irelin Reng 22-kan roi an rela. Israel hei rangin Kum 136-kan an iding sot a nit. Suaka an itâng khomin an la hong kir noka. Suak ata an hong kir nok nungah khan chu Juda neh Israel isir iṭhen theiin om khai make. Anni hei bang hih a om tak an nita, Israel iti an init vang tak a nit. An sakhua riming chu atun tenan Juda sakhua (Judaism) an iti mai tak a nit. A namin chu Israel an nita, an sakhua Juda a nit.

An Renghei hi idem rang omino korong chu ni vang ual maka, Israel Renghei rangin chu a tlangpuiin Pathian chu an riat ual. An thurchi hi lam itam takan isir thei chu a nit khan, Pathian ireh ual an nit sikin an chan ṭhat ual thu hi ei isui nuam a nit.

1. Vanglai thu chu ân rum ual nget: Solomona naipa Rehoboama khah a hong inlal ah khan mipui chung a roi arel rang dan buah Upa (ulian) hei a rona. Anni khanchu rinem uala roirel rangin an irila. Amah a lai naiinpang khom ni thei ati, anthu ron pek khah ipom thei maka. Tlangval te rual a rôn noka. Anni hei khan chu, nakana thil hong iom rang ngaitua phak iloiin, inrum takka roirel rangin an lei ithora. A zom nuam dan tak khom ning ati,ripak tak neh inrum takkan a om taka. Khantaka rithokin chu a ram mipui itam ualin tuang zoi thei khai maka, an rihelh tâk a. A ram chu inṭhenin aom taka, Nam 10-ka hei Israel ram itin an inran tâk a nit. Aman chu nam inika hei bang khah a op taka. Jerusalem chu khopuia mangin Juda ram an iti chungah ân lal tâka.

2. Israel ram nekan Juda ramin Pathian an ṭi ual: Juda ram Renghei khan chu thonchaina nei mai ngai khomseh a tlangpuiin

Pathian thu an oi ual ngai. Reng Asa hei, Jehosafata hei, Joasa hei, Josia hei, khah an nit. Reng Josia vang khah chu Reng iṭha tak a nit. Pathian chubai unna lamah mihei iruai inṭhatu ai thluk a nit. Reng Josia siamṭhatna an iti hih Pathian thu tep intam rangin chu itep nuam neh ringai nuam iom tak a nit. Reng takin Pathian chubai un dan lama ma a hang ṭruai khah chu mipui hei rangin idorka lom iom im ai nit rang. Ei ni hei chu, iti thei den itho thei riti om eila inkhôm ife khah chu taka omim ei iti zel rek rang a nit. Juda Reng hein chu Pathian Zantla hein an iril lam angka takin an thuneina an imang indik ngai a nit.

3. Juda ram chu Israel ram nekan arngum ualin a chan aṭhat ual: Juda ram chu an Renghein Pathian an iza ual sik hi ningati an iding sot uala, an inṭhen nungin Kum 136-ka an la iding sot a nit. Kha bang khah la ni maka, Israel hei chu nam chi 9-kan Reng an icang rithlâk a nita, Juda hei rek chu Reng richi a rithoka zuang ife maiin Reng an ichang mai a nit. Davida Reng ram chu a ding thiai maia. Nakana B.B.586-a khan Babulon in suaka a ṭhui vanga, Khannise Israel hei angka rimang rip make. Babulon suak ata khom an la hong kir nok ireh thein ai om a nit. Ei ram chan ṭhatna rangin Pathian iṭi mi ei tam ai ṭul a nit.

Richang spell: Lapui 12:1-2: Pumapa ne ṭangpui roh, Pathian ngaisak mi zel om khâi mak a; Miriam naihei lâiah mi dik imu rang zel om khâi mak e.

Ṭongridon:

1. Juda ram khah Israel ram rangin kum idorkâm a ding sot?
2. Juda Reng riming iṭha pel hei riming ân dotin zuang riziak roh?
3. Tu Rengin Pathian chubai unna siaminṭhatna sin itho kha?

Risei rang: 22

Thupui: Judahei Babulon suaka an itâng

Itep rang: 2 Renghei 24:1-4; 25:11

A thiltum: “Pathianin a mihei sual â hua”,

Thuma: 2 Renghei bung 24 neh 25 heiah hin Juda hei Babulon sorkarin a hong inea suaka a ṭhui thu ei mua Jer.52:28-30 a ei mu nok danin chu ṭum ithumka sar suaka iṭhui an nitna thu a langa, suaka an iṭhui murdi chu mi 4600inin a sira. II Reng 24:14-16 ah chu Pasalṭha ringot khom mi 1000 (Singka) inin a sir a. a zon thu-ah chu Renghei bu a mi hih iiam a om ual. Ram sunga mi vantlang tena chu suakin a ṭhui vanga roi bak nonih iiam ai om a nit. Mipui kha dora tam an suak changna rang ram ipana anife dûl dûl rang kha chu ibuai iom tak ai nit rang a nit. Pathian hin a nuam lam neh a nuam no ei riat infel theina rangah hin mipui ei ibuai chuak chuak rang khom a poi ai ti ngai ino a nit.

1. Juda hein Pathian thu oi make: Juda ramah khan Pathianin a Zantla hei imangin thu a sir ngaia. Reng khatka Jehoiakima a hong inlal a khan reng roirel dan angkana nino Aigupta thuneina mangin a reng ram sin ân rifêk a; Political appointment (Politiks thuneina manga sin ipe) iti angkana sin hih a thoa. Zantla Jeremia hei, Uria hei thusir a nol a, zantla Uria vâng chu ai that a nit (Jer.26:20-23) Pathian nuamno lam takin sin ai tho a nit.

Â nungah a naipa Jehoiakina a hong inlal noka. Hi mi khom hi khangka ngirin a sual noka. Pathian thu reng uksak nuam maka. Ama thultu Zedekia khom ṭha ual nok maka. (2 Chron.36:11 ff) Hi hei sika hin an siatna rangin Pathian ning a imur titak tâk a nit.

2. Suaka an itâng: Jehoiakima chu Babulon Reng Nebukadnezzaran ring manin a hong mana, Suakin a ṭhui pat taka. Amah neh a lomin Daniela neh a mal hei khom an iṭhui sa a nit.

Johoiakina a hong inlal noka khan Nebukadnezzara khan kha neka natinsat ualin a hong doi noka. An rama vantlang chung lam mi them thiam neh huaisen, tlangval iṭha neh mi lian hei murdi chu suaka a ṭhui vang tâka. Hi zoro a hin mi singka zel suaka ai ṭhui a nit (II Renghei.24: 14)

Zedekia a hong inlal noka; ani khomin Babulon sorkar nuaia itloma om rangin chu riphah bik maka. Aigupta tiang a țang ngit a; Nebukadnezzaran a hong doi noka laizam a tho a Nikhomseh a la man ngira. A mitmu ngeiin a nai hei chu a that pek vanga. Kha nung ama mitru khom an ikhel pek paia. A hun nungkhonah chu zing inthimah a kuia ai thi ning a ti itin isir a nit.

Nebukadnezzara khan idin viat iloiin a soisak taka. An Biakin roinpui Solomona isin khah a siat pek vanga. A sunga nei nun ițha murdi kha a lâk pek vanga. Khanchu suakah a țhui vang tãk a Jerusalem khua chu kho-ram ai chang tak a nit, ngaisiat a om vangna!

3. Pathianin sual â hua: Eze.18:23-32-a ei imu angka Pathianin sual a ihua a nit. Ingkana mi sual khom an riletin chu a ngaidam zel ngaia. A mihei ngei khom an isual maia a nitin chu zua ual bil ngai make. Juda nam hei khom amah an zui sot ual viata a donsui ngai ata chu, a thupek zom nuam iloia anmahni nuam dan ringot isonga an om tik tenan chu lungkhamna boi riaikan duk a thotum ai tho ngai a nit. Ani chu miriam angkana lunghoi isak a ithlem zoi chi a nitno sikin. “Ki ti chu ki ti” iti ngit ngai a nit sikin. A thu zom chu tiklai khomin ai lom ngai a nit.

Richang Spel: Heb. 12:11: Thununna rêng rêng hih tuang laiin chu ilôm iomin ilang ngai mak a, ngaisiatomin a îlang ngai a nit. Khannisela, tuang zoi tenan chu kha taka isõia om takhein chu irâ thlangam iom tak â sua a, ringnun ifel tak ân nei ngai.

Ƨongridon:

1. Jeremia 52:28-30-a Babulon sorkarin Juda suaka ai țhui hei khah idoram an nit ati?
2. 2 Renghei 24:14-16-a Babulon sorkarin Juda suaka ai țhui hei khah idoram a nit ati?
3. Tu Rengim Nebukadnezzaran ring mana suaka ai țhui?
4. Tu Rengim Babulon Rengin a mitmuah a nai hei a that pek riaia, ama mitru khom a ikhel pek?
5. Tu Zanthlam Juda Reng Jehoiakiman ai that?
6. Tu Rengim Babulon rengin matona neka natinsat uala a hong idoi kha?
7. Itho sikin Pathianin Juda hei chungah a ning ai thik?

Risei rang 23

**Thupui: Babulon suak an itangna ata isuan an om:
Itep rang: Jeremia 24:10-14; II Chron.36:22-23;**

A thiltum: Pathian mi hei rang sabeina thar aom nok ngai.

Thuma: Juda hei chu Babulona Kum 70 suak an itâng inin isir a nit ngai (Jer.25:11,12; 29:10) Amah kha, suaka an om sung nget khah ni ual loiin B.C.516-a Temple ithar an sin zoi nok ten khah a nit. Suakah an itâng nung Persia Reng Kuran (Cyrus) Babulon khah a hong op taka. Kura hi Pathian iam ino mi a nita (Isa.45:1-4) A hong inlal tir B.C.539-ah Jerusalem a Juda hein Temple an sin nok rang a phal a (II Chron.36:22,23; Ezra.1:2; 5:13; 6:3) khante, Temple a bel-bûl hei khom a thon kir nok vanga (Ezr.1:7) Nakanah vang chu Juda hei an insunga mangrua belbûl richona tholom khom ai thopui a nit. (Ezr.3:7)

Thuthlung luia zantla tam ual hein hun la hong ithlung ranga Israel hei roinpuina rang an lei isir lok ngai reng reng khah uluk takka riseiin chu Babulon suaka an itâng rang neh an suak nok rang thu hih a nit ual ngaia. Kha sabeina om rang khah Zantla dik neh Zantla lem hei khomin an lei isir dan a nit ngai. An itâng laia zantla Jeremian lekha a hei thon dân vângin chu isuak nok khai ino rang angkana ribe thei rang khopin an itângna munah ommun idet ikhwar rangin aiti a nit (Jer.29:5-6) Khankhom Pathian thun chu beidong lungdong tenkho a om tak nung khomin sabeina thar imu rangin a la siam pek ngai iti nen risei ai tum a nit.

1. Sabeina dik ino: Juda hei Babulon suakah an itâng zoi phing kaneh khan Gibeon mi Azura naipa Hanaian thu ân puang peka, “Pumapan ane sona, Kum inikah sungin Babulon suaka tâng murdi chu an hong ikir nok vang rang a nit ati,” itin. Juda hei rangin chu ringai nuam iom tak ning ati. An hong kir nok rang nikhua an ngakmo tlia kaneh. (Jer.28:1-4).

2.Thudik ngai siat iom chu: Kha hun laiah khan zantla Jeremian “Kum 70 ikaia nin itâng rang sikin in hei isinin lungril idet takkan om lolo rei” itin a sirpek tâk a (Jer.29:5-6) A idik nget rang lak a nit ngaisiat a om tâk tlia na! Kum inika chu a hang hek phota, zantla Hanania thu’npuang khah adik iti fiana rang ite omkhai mak a. An lung ilêng rei sikin la khom sak pei khai mak a, an ãap ringot taka (Lapui.137:1-6) lungsiat an om ti rei.

3. Jerusalem ikir nok rang: Khaangkana beidong takah isot takah an om nungin Pathian rêng rêng riano Persia Reng Kuran (cyrus) Babulon chu a hong ine thut taka. Judahei ta rangin chu bei ai dong nok ual tâk chu a nit. Khannise an tungno lam takkan thupek ithar a hong suak taka;” Jerusalem kir nok nuam murdin kir nok ta unla, Biak-in hei hang sin unla, Biakina neinin belbul hei khom choi nok vang rei, Jehova chu Pathian a nit sikin,” itin thu a hang isua taka (Ezr.1:2,3) A ti zoi kaneh ai suak zel thei ni ual nonia, ðhenka chu in khom rimut ual khai no nih. Khanchu, Juda neh Benjamina nam puipa ual hei neh thiampuhei khah an fe masaa; mipui 49697 hei in an zui dul dul taka (ezr.2:64,65) zanthla Isaian hi mihei hong kir nok rang thu hih a mua, a lei isirlok a nit. (Isai.40:3-5).

4. Kura thupek hi â det a nit: Jerusalem an hang thlungin Biak-in chu a mun ngirah khan an sin nok taka. An lom bâk bâk tak a. Reng Daria a hong inlal nok akhan Judai ram lei iop ngai Tetaniahein Reng Daria ziangah “Hi mi hei hin tu phalnan im Biak-in an hang isin itin an noa. In buai an itum a nit. Reng Darian thil risinsiana (record) ilui a sui vela. Reng Kura irziak ngei phalna alei ipek thu chu a mu suak taka. Khasika khan Reng Daria khomin an Biak-In sin chu tuten inbuai iloia ãangpui thei tenah ãangpui lem rangin a ti tâka. (Ezr.5:6-17; 6:1-12) An lei tûng ban neka roinpui ualin Pathian sintho an chungah a zuang ithlung tak anit. Pathian mihei rangin chu ilom a va om rang vangna!

Richang Spel: Rom.4:18: Abraham khan itûng rang a boi tlak nung khomin a tûng ngit sikah khan, “Nam itam takka Pa,” a hong nit tak,” “Ner chihei chu ârsi zâkah la nîng an ti,” iti riziak angkah khan.

᠓ongridon:

1. Juda hei Babulon suaka Kum izakam an itâng?
2. Tik kumah khanim Juda hei Temple isin nok rangin Persia Reng Kuran ai phal?
3. Tu zantlam kum inika sûngin Babulon suak ata an isuak nok rang itia thu’npuang?
4. Juda hei suak ata an hong kir nokah khan mipui idoram an nit?
5. Judahei Temple an sin nok thua seltu khah tu mani?
6. Lapui. 137:1-6 richang hi an dotin riziak ta?

Risei rang 24

Thupui: Makkabia hun

Itep rang: Daniala 11:31-32; Matt.24:15-18;

A thiltum: Thuthlung lui neh Thuthlung thar kara thil ithlung hei Bible riseinan kâm a om sa.

Thuma: Thuthlung lui neh Thuthlung thar karah hin Kum 400 vel a tlak a, kha hun sunga Juda hei thurchi chu Bible-a hin chuang khai maka. Hi hun sunga thil ithlung itam taka hei hih thuthlung thar hunah poimonah an nei ok sikin ireh rang ai that a nit. “Mang Sang Porinche” (Matt.24:15) an iti ngai hong suak na khom hih hi hun laia lei iom a nit a. Farisai, Saddukai, Sanhedrin iti hei khom hih hi hun laia lei iom riphut anit.

Juda suak itâng isuatu Kura kha Persia Reng a nita. Persia hei chu Grik hein an hong inê noka. Grik hei Reng riming inthang tak Elexander roinpui (Elexander the Great) khan B.C.327-ah India ram khom a zuang irûn phak a nit. Aigupta ramah kua riming inthang tak Alexandria kua khom khah himpu riming ichoia inding a nit. Grik hei chu Rom sorkarin an hong inê noka. Jisua hun laia roireltu hei khah Rom sorkar an nit.

1. Grik hein Persia an inê: Persia hei chu Grik hei neh an ridoia, Grik hei khah ine thei khai maka. hun isot tak sùng chu Israel ram khom Grik sorkar thu nuaiah an oma. Grik Reng riming inthang tak Alexander roinpuia an iti khan ama riming ichoian Alexandria kua khom ân dinga. Paula malpa Apollova khom khah kha khomi a nit (Sinthohei.18:24) Kha kuaah khan Grik tonga Thuthlung Lui bu masatak chu mithiam rual 70 ka hein an ilet ei iti khah.

2. Mangsang Porinche: Grik hei inlal laiah khan Judahei chungah anisual tak taka. Antiochus Epiphany B.C.175-164 sunga ân lalpu vang khah chu a sual ual a. Jerusalema ilût in mi 40,000 (Singilika) vel athata. Then itam takah chu boi rangin a zuara. An Biakin maichamah khan Juda hei ranga sa rithiang ino tak vokpui sa hei a lan vela. Jerusalem Kulhbang hei a tok

isima. An Pathian chubai iun a khapa. An Biak-in chu milem biakna inin a siam a. Bible a hal isiata. Hingka taka Pathian Biakna mun innima iborhtu hi Daniala bu'n “Mangsang Porinche” itia a isir khah a nit (Dan. 9:27; 11:31)

3. Makkabia neh aloma hei an pût tak: Kha laiah khan Jerusalem thlang (West) tiang inai tengah Medeim kua Thiampu Mattathia a oma. Naipa ringaka mi huaisen tak tak hi a neia. khahei khah. Mirthiang Johana hei, Ruaitu Simona hei, Juda chungchoia hei, Eleazar Ram ngainat a hei, Johathan mivara hei an nit. Hi hei hin lunginrual takkan an sakhua mualphoi isaktu hei chu idoi rangin an risiam taka. An ngam tak tak a. Juda hi Juda Makkabia an tia. Makkabia iti chu “chungchoia” itina a nit anti. An ureng laiah ulian tak nino khomseh an ureng laiah ruaitu tak ini rangin Pathianin a inrifuk a nit anti (I Macc.2:66) Makkabia hi arming chungchoia ai nit angkan a râl hei khom a ngam tak taka. Anni hei hin huaisen takkan an doi ngam sikin an ine taka. Khasikin Juda Makkabia riming ichoian lekhabu inika riziak a nit (I Macc & II Macc).

Hingkana an inê nungah hin Juda hei chu mahnia roirelin, roireltu neh thiampu lalhei an nei a. Tempil khom an inrithiang noka. Hi hun riatmainan “Inpumpek kût,” an iti chu an inei zui mai tak a nit. B.C.63-ah Rom sorkar nuaiah an om nok tak.

Richang Spell: Luka 9:23: Khante mi murdi ziangah, “Tukhom ne zui a nuamin chu mahni phialin nîn tin a kros riputin ne zui riseh.

Tongridon:

1. Thuthlung lui neh Thuthlung thar karah kum izakam a tlak?
2. Bible in “Mangsang Porinche” itia a isir khah tu mani?
3. Hi hei hih an riming omzia riziak roh.
Johana, Simona, Juda, Eleazara, Jonathana.
4. Makkabia iti hih itinam ai nit?
5. Makkabia rimingin idoram lekhabu riziak ai nit?

Risei rang 25

Thupui: Rom sorkarin Palestina ram a op

Itep rang: Luka 2:1-3; 3:1

A thiltum: Thurchiṭha indar ratna ranga risiamna hun a nit.

Thuma: B.C.65-ah khan Grikhei chu Rom hein an hong ine nok tak a. Rom hein an op fel tak tak nungah khan risuk-risuanna ala rat a. Ridoina khom a la om dap dap mai a. Rom hei thunuaia Palestina ram i-optu inlar tak ei iriat chu Herod Liana, Jisua suak zoroa laia naisen ithattu khah a nit. Kha hun lai takah khan chu Rom hein an hun lai rammual chu an i-op vang iti rangin ai om a nit. Amakha, Thurchiṭha puangindarh na ranga zoron ṭum tak a hong nit iti hih risei ei itum tak chu a nit.

1. Lampui: Rom sorkarin Grik hei an inea, roirelna chu an chang tak a. A khopui tak chu Rom a nit a, amakhan an rengtak (Emperor) chu a om a. An rengtak ichangtu murdi chu arming rangin Kaisara (Caesar) itin an ikoi ngai a nit. Kaisara nuaiah khan ram dang dang i-op nok rangin Governor an iti ngai hei an om noka. Khahei khan Kaisara inlom ino an ṭi tak tak ngai. Kaisara lomno lamin an omin chu an sinna ata inringam an nit zel ngai sikin. Jisua suak laia naisen ithattu Herod Liana khom kha Kaisara nuaia om a nit a. Jisua Krista an ikhai laia Governor Pilata khom Kaisara nuaia mi ngir a nit. “Jisua nen zokin chu Kaisara mal nino tin e,” itia an ikhek khum khomah khan Governor ini ala nuam mai sikin aṭi rang ai om a nit. Hingkana ram rizat tak an op sika hin Rom sorkarin chu an ram sung fe hong olna rangin lampui iṭha tak an isiam tak a nit. Kha hun laia Kristian an idem bâk bâk hei khan an lampui siam hei khah Kristianna indar ratna rangin mang anti iti reng an iriat ino a nit.

2. Grik ṭong an lâ: Grikhei chu nam ivar tak an lei nit sikin an ṭong khah a lei inlar ok tak a. Rom sorkar i-op ram heiah khan Grik ṭong chu manginlar ai nit angkan atunlai sap ṭong ei imang angka hin mitinin imangin an irriat thei ngai a nit. Nam dang neh nam dang khom tu ṭong khok manih imangin ei rison thei viat non chu ei irzui sot pei ngaiino a nit. Ei irsonpui thei

hei chu ei irngaiinnat bik ngai a nit. Grik ṭong ithiam hei ta rangin chu ram dangah khom sinitho a ol pek a. Khah a nit sikin Pathian thuril khom ṭong risei nang khai iloian an fena tinah Grik ṭong imangin an isir zat zat thei a nit.

3. Kristian hei ranga an ṭumzia: Pathianin thil ân rifêk thiam a. Rom sorkar khah Kristian hei rangin isual bâk khomseh an inlalna nuaia Kristian sakhua a hong inzir khah ân darh ratna rang piala Pathianin a lei inrifûk chu a nit. Jisua chu hun dangah neh mun dangah a lei isuak niseh chu hinga takin rammualah Kristianna a pung rat no khom a nit thei; rammuala mi om murdi hi 4,019,000,000 (Million ilika neh Crore someleikuakka) vel ei nit a, ama hin mun ithumka thena munku chu Kristian ei init tâk a nit. Rammuala sakho dang dang laiah a tam tak ei nit a. Eimahni ne dot chu Muslim or Mosolman sakhua a nit a, Kristian bâk inika thena bâka ranga tam viat an nit thei. Hinga taka ei pung ratna bul itumtu tak chu Rom sorkar khah a lei init a nit. Rom sorkarin thurchiṭha puangindarna ranga ṭangkaina a lei inei hei chu:

a) Rom ram sunga khan namzat ritleia ri-enna a om no sikin “Mi tin ta rang Thurchiṭha,” iril a ol sam.

b) Rom ram sunga khan fe hongna rang lampui a ṭhat sikin Thurchiṭha ril a ol sam.

c) Rom khopui ngeiah hin nam dang dang an om ripol duak sikin Thurchiṭha an iriat ril indar nok a ol.

d) Vantlang nun arniama, Thurchiṭha an lom bîk.

e) Grik ṭong kha Rom ram sungah an thiam vang sikin rison ribia ân ṭuma thu riril risak a ol sama, Thurchiṭha puangindar an ṭum.

Richang Spell: Filipi 1:2: Pathian ei Pa neh Pumapa Jisua Krista ziang ata lungkhamna neh ringeina nin ziangah om riseh.

Ṭongridon:

1. Tik kumah khanim Rom hein Grik hei an ine?
2. Rom sorkar rengtak riming kha im an ivua?
3. Rom sorkar nuaia Thurchiṭha puangindar ol samna bi inika riziak ta?
4. Rammuala mi om murdi number riziak ta?
5. Rammuala isakhuam mi nei intam tak?

C. Thuthlung Thar

Risei rang 26

Thupui: Jisua suak thu

Itep rang: Genesis 22:15-18; Luka 2:8-14

A thiltum: Judahei itungpui Messia chu namtin rang a nit.

Thuma: Messia ti hih Grik tonga “Kristos” ti neh omzia thumun a nit. Grik tonga khah ilan Krista ei iti zel tak a nit., A omzia tak chu “Riakrithuah” tina a nit. Judahei itungpui tak chu Messia a nit. An Messia tung dan rek chu Pathian riakinrithu manih Davida Rengthungmuna thung rang a hong isuak rang a nit a. Reng roinpui neh sinithothei tak ning ata, anmahni Judahei, nam dang hei murdi ata inzoktu rang ning a ti. Juda nam chu nam dang murdi chung a roinpui neh inchung bik khopin ai op khôm rang a nit. Nam dang tuten an ithluk ino rang a nit itin an itung a nit.

Koilom hein, “Pumapa atun zelim ai nit rang Israel hei ziangah ram ni pek rang?” (Sintho.1:6) itia an ridon lai khomin hi lungril hih an irput mai nise arhoi. Nuai ram reng roinpui rang angkana tungna sik neh Israel nam hei roinpui bikna rang angka ringota an tung sikin Bethlehem sakhenga zuang izal Jisua khah chu Messia ini thei rangin iam thei ngang maka, an imu’nthel a nit. Judahein chu nam dang murdi hei chu Pathian tang iloia ring pi pai rang angka an ringai (Efes.2:12). Khannise Pathian tum danin chu nam dang murdi khom a ihuap a nit a, an iriat thiam thei khaiino a nit. A tun idenin Jisua iam iloiin Juda sakhua an la tûk a, Messia chu an lai tung mai ning a ti. Atunah hin Irael rama miriam iom riza kata 3% bang Kristian an nit a. Hi hei khom hih a tam tak chu an rama Arab mihei an la nit nok. Atunah hin Juda sakhua ibia chu rammual miriam riza kata 0.44% bang a nit.

1. Nuai neh Van kara palai a zuang suak: Nungak rithiang Mari chu Josefa neh rinei ranga an rihual laiin Pathian sinthotheinan Pathian naipa inei rangin a lei inrifûk lôk isa a nit,

a. pasal nei viat iloiin nai a lei vong sai tak a. Josefa chu arngai tha thei tlak maka. Nei khai iloi rang a tum a. Khannise kha zoro takah khan vantirtonin Josefa chu thurithup a ril vang a. Mari nai vong chu Rithla Rithianga mi a nit a, khasikin rinei iṭhul loi rangin a ti peka. Josefa khom khan lung ihoi takkan a nei tak a. Nai a nei mâkah chu a nupui Mari chu pol mak a.

Rom sorkar nuaia om a nit a, sorkarin kum 14 ka thlung ikipa riteppui (census) a nei ngai a. India sorkar khomin kum 10 ka danah riteppui (census) ai nei ngai angkana hih. Riteppui zoron chu mahni richibul hei omna khua chita ifen riming riziak ngai a nit. Josefa hei nupa khom an chibul Davida khua Bethlehema riteppui omna ngeia ithlung itumin an fe tak a. Kha zoro lai takin Mari khah nai nei zoron a de tak a, lungsiat a om ti rei. An va thlungin chu mikhual thlung in ranga an khualbûk in sin murdi mikhual an lei sip zit taka. Bible in an thlungna in chu ne ril maka; nikhomseh Marin nai a neia khan naite chu ran bu pekna khengah an inzal iti a nit sikin serat inah an ithlung inih rangin an iam (Lk.2:7).

2. Mi tin ta ranga Thurchiṭha: Juda hein thil khatka an itho ngai chu arkhel ok a. Nun nai a nei rangin chu nai a zuang suak kaneh chu irihoi itum thiam hei lo ipen an iruai ngai a. Nai a suak tak an ti kaneh “Ipâm nupangim,” an ti a. “Nupang” an tin chu irihoi itum ngai hei khah in tiang an rot nok a. “Ipa keng,” antin chu ithiam takan irihoi chu an itum ngai a nit. Jisua zuang suak zanah khanchu ram nuaia bera venga riak ngai hei ziangah Pathianin hingkan thu a zuang inpuang a, ‘Ṭi no unla,’ ringaita u, mitin ta rang Turchiṭha lomiom tak ki zuang itlun hi, vuanah hin nin rangin Davida khuaah Minringpu a suak tak, Reng Krista chu.....” itin. Jisua nu neh Pa khan nuai rihoi itum ithiam iruai rang nei zoi maka. Khannise, an nai isuak kha Van Reng Naipa a nit sikin. Van zaipol hein an zuang ilom a nit.

An chung takah Pathian roinpui rise, Nuaia ai lom bak bak miriam hei laiah ringei thu leng rise,” itin La roinpui tak an

zuang sak tak a. Rivana rithoka rol khan “Mitin ta rang,” itia thu a zuang inpuang khah a roinpuia, “Mi” ini hei kan Jisua chu an ta rangin an inei thei tak a nit. Ni ta rang a nit a, ki ta rang a nit a, ei rengka ta rang a nit a, ingkana ilom ai om rei takim na!

Richang Spell: Luka 2:10-12: Vântirtôn khan an ziangah, “Ti no unla ringai rei, Thurchi Tha lôm iom tak nin ta rang neh mi tin ta rang ki zuang îthlun a nit. Vuanah hin Davida khuaah Minringpu Pumapa Krista a suak tâk. Nin risinsia theina rang chu, naisen, puanzêla tuam, sakhênga zâl mûng nin ti,” a ti a.

Tongridon:

1. Judahein Messia an tung dan khah ingkam ai nit isir ta?
2. Kum izaka idan inim Rom sorkarin riteppui ai nei ngai?
3. India sorkarin kum izaka idaninim riteppui ai nei ngai?
4. Judahein nai ipa an suak zoron im an itho ngai ni riat danin isir ta?

Risei rang 27
Thupui: Jisua naipang lai
Itep rang: Luka 2:39-52

A thiltum: Jisua chu Pathian thu angka takin a insung hei ziangah a om.

Thuma: Jisua naipang lai thurchi hi ei Bible in a ne ril tam no sikin isir rang nei intam bâk mang mea. Khankhoma a tul rua omhei chu ei sap sua theia. Titi bu heiah chu i-imanih an irziak khom chu a oma. Khan khahei khah chu isir ual no min a. Juda sungkua pangai nun dan dik tak nuaiah a hong iseilian a nit a. Khahei karah khan Pathian naipa a nit arriat mai a. Ama angkana Pathian naipa a nit rire puma nuaia a nu neh pa hei thuzoma om chu thil intak tak ni thei a ti. Miriam seng sengah khom chinka ringai rithla mi viat hein chu ruaitu hei imusit hi thil i-ol tak a nit ngai. Jisua rithla mi nitna zia tha tak hih ei risei thein chu ilom iom tak ning a ti.

1. Jisuan Pathian naipa a nit arriat mai: Jisua chu kum 12 ka a nit a khan Kalkan kût laiin a nu neh pa'n Jerusalema Pathian biak inah an thui a. Naipang dang hei zianga om manih isonin a nu neh pan an maksan raka, mu thei khai maka. In lamtiang a hong kir nok khaino sikin Jerusalema an kir nok vang vanga, Biak inah an va enin chu Pathian thu inriseitu khah thu'nril thuntak tak hei hih a lei ridon vel lai an va mu a. A en murdi khan arkhel an ti tak tak a. Naipangin khangka taka roinpui neh inril thu ai riat thei khah arkhel an ti tak tak a. A nu neh pa khan, “E toia, ni irmang tak manih kin sona, kin ilung a hâng ok tak keng,” an hei ti a. Ani khan, “E! ki pa ina ki om rang ai nit hi nin iriat ino mani?” itin a dona. Arngai rang dan rehthei make. Ani lak khan, “Pathian naipa dik tak ki nit a, amah hi ki in chu a nit zel hi,” a tina a lei nit pial a.

2. Jisuan nu neh pa thu a zom: Jisua khan Pathian naipa a nit riria tian khomseh taksaa a nu neh pa Mari neh Josefa hei chu musit ngai mak a. Thil an iriat phâk ino ai riat om khomseh

“Nin inmol,” ti ngai maka. An thuhei khah a zom tak tak ngaia (Lk.2:52). A hong thuar tir tir a, ritha hei khom a nei inthat a, warna tiang khom mihei a khûm zat zat a. Nu neh pa hei chu inmol bâk khomseh an thu thua om hi Pathian neh miriam ditsak dongna a nit a riat a (Lk.2:52). Nu neh pa izâ no neh poisak ino chu Pathian ditsakna dongna ni ngai mak e. Bible-in “Pumapa ni Pathianin thu nang ai pek angka ni nu neh pa choiinrisang roh; khanchu Pathianin ram nang ai pekah hin vangsak ințumin om nita, ni dam ai sot rang a nit,” (Deut.5:16) aiti a nit kha. Pathian ditsakna hi richongna neh neinungna nekan a that ual ok. “Tangka neh rangkachak nekan ditsakna hi a lut ual ok,” (Thuvar 22:1).

3. Jisuan nuai dan zom inchai make: Jisua chu Juda sakho dan dik tak izomin sun riat kan serh an tan (Lk.2:21). Pumapa zianga lan, Pumapa dan murdi izui isua dap a nit (Lk.2:39). Naisen ala nit laia rithokin a nu neh pan dan zom inchai pui mak a. An izui rikippui tlap a nit. Baptistu Johana zianga Baptisma ichanga felna dan tin tin ipâl thlenga a len suaktu a nit. Eini hei laiah chu dan no angkana thil itho hih ei irngai inrisang ngai a nit. Khangkana mi khah Jisuan a irngaiinrisang ino mi tak a nit. Jisuan a nen risei danin chu mi hih an roinpuia, Pathian lama an inthûk dorka dan neh inriseina an ngaisak a, thu an izom tir tir ngai a nit. Mahni ringaiinrisanga midang imusita, poisak ngaiino mi reng reng an ichungthua sakho mi rei tina a nit. An țongțainah khom “a porinche,” a ti (Thuvar 18:9).

Richang Spell: Kolosa 3:20: Naipanghei, zorotin nin nu neh nin pahei thu zôm rei, amakhah Pathian lungdo a nit.

Țongridon:

1. Jiusa kum idorkanim a nu neh pan Jerusalem tempila an ife pui?
2. A nu neh pan an riat ban thil ai riat om khomseh a nu neh pa hei im ti ngai mak aiti khah?
3. Jisuan Juda sakho dan a zom inchai nonah bi inika ni riat isir ta?
4. Pathian ditsakna hi ihei nekanim a that ual ei iti kha?
5. Felna dan omzia ni riat lamin rilfia ta?

Risei rang 28
Thupui: Jisua sinthodan
Itep rang: Mathaia 9:35,36 Luka 4:16-22

A thiltum: Jisuan miriam ițul a riat.

Thuma: Jisuan sin a phut khah kum 30 mi a nit tak (Lk.3:23),. Judahei laiah khan kam isin thei ranga kum ithluka an ringai dan chu kum 30 ka hi a nit ngaia. India ram danah sorkar nokri (kam isin) isin thei ten chu an nuai takah kum 18 a nit ngaia. Levi chi hei kam sin thei ten chu kum 30 a nit a (Num.4:3,47). Josefa, Faroa maa a ding phut kum kha kum 30 a nit a (Gen.41:46). Davida roirel phut kum kha kum 30 a nit saa (2 Sam.5:4). Lekha ziaktuhein mi dang an inrisei thei ten chu kum 30 a nit ngai. Amah hin Jisua sinthona rizik suak dan a inlang a nit.

Grik hein chu taksa neh rithla ițhen an tum ngaia. Isirin chu isir ran thei a nit a, khannise, ițhen thei chu ai nit thlak ino a nit sikin Kristian inriseinaah chu taksa, lungril neh rithla hin miriam takpumpui ai siam inrikip a nit. Jisua sinthona khomah hin a rengka iton korongin ai sin a nit iti hih risinsia ei la ei nuam. Taksa neh rithla țulna hih miriam ițul tak a nit tina a nit.

1. Pathian thu rilin Jisua chu ân zin ngai: Misualhei an lei rilet a, Pathian ram an lut thei nan Thurchițha rilin Jisua an zin mai ngai. Khua tam tak a tlo kual a. Ân zin velnaah mi khatka khomin a thuril ringai nuam an omin chu tititakin a isir pek ngai a nit. (entirnan) Samari nupangnu (Joh.4:5-30). A thu sir chu a fîa ual theina rangin thil om dan an iriat infel isa imangin a sir pek ngai. A țong rikhek thu mang khom thil isir infel a tumnaa ai mang khah a poimonah a nit a. Entirnan Matt.13:33-ah Rivan ram inrikheknaa “Chol” ai mang hih chol chu Pathian ram thu isirnan ai poimo nget itin isir tum eila, a didikino a nit. A thusir hin ai tum tak chu an rithla nun siaminthat a nit.

2. Inkhom inah ân risei ngai: Jisua hi Inkhom ife zot tak a nit. Inkhom ife chu tho dan pangaia ai nei a nit (Lk.4:16). Pathiannia

Sande Skul ife nget ranga ei irngai angka hin Inkhom zoron chu ife nget ranga ringainah ai nei a nit. Inkhomnaah hin Pathian thu chu ikûk takkan an risei ngaia. A vâr sikin a thuril chu an riat thiam thei rang lama isir ai thiam a nit.

3. Dam inohei an dam: Jisuan mi lungril neh rithla lam inrisein Pathian thuhei isir ngai khomsela, an taksaa natna neh an lungril chu arzom tlat a nit iti a riat sikin anni chu lung ân kham tak tak ngai. Damna bang pe maka, an von a tamin ifa rang a pek sa ngai. Mithi hei ten khom ai kai ithoi a nit. A îndam banah mipui 5000 neh 4000 hei khom a ifa'n khop a nit.

4. Taksa lungril neh rithla hi miriamah pumka an nit: Rithla rigaiinrisang oka taksa ngainep hi a dikino a nit a, taksa ringaiinrisang oka rithla ringainep khom hih a dikno a nit. Taksa tâng iloiin rithla neh lungril hih a ran rana ilah thei ni mak. Rithla neh lungril tâng iloiin taksa khom hih ite ual ni make. Jisuan chu miriam ringnun pumpui itûl hih a irngai poimo tak tak a nit. Nen takna tinreng khah Jisuan nang a inzângpui thei a nit.

Richang Spell: 1 Thessalonika 5:23: Khante, ringeina Pathian ngêi khan nin pumkan nangni inrithiang sela, ei Pumapa Jisua Krista a zuang tikin nin rithla, nin ringna neh nin takpum nin pumkan sêlnaboin nangni inzòk riseh.

Tongridon:

1. Judahein sinitho ranga mi puitling an irngai khah kum idorka mi him an init?
2. Tu heim taksa neh rithla hih a ran ran a nit iti ngai?
3. Miriama pumka hei khah i-im an init?
4. Jisuan a damlaia sin a tho dan bi ithumka ni riat isir ta?

Risei rang 29

Thupui: Jisua a thina neh thoinokna thu

Itep rang: hebrai 2:9-18

A thiltum: Jisua chung a thil ithlung murdi ei ranga tul korong a nit.

Thuma: Jisua thini (Good Fraiday) hi a karah March thla'n ei manga, a karah April thlan ei mang ngai a. Kum tin a zoro hi isût chop a tul mai ngai. A san chu Juda calendar neh Kristianhei calendar ri-ang maka, Good Fraiday hi Juda hei calendar a rithoka isût a nit ngai sikin. Judahei Kalkan kût chu an calendar a Nisan 14-ah a nit ngai a. Jisua thi zoro khah kha Kalkan Kût zoro tak kha a hong nit a. Nisan chu March neh April thla ritenna tenah a hang ihuap ngai. Juda hei tep danin chu rivana thla khih â det a rithokin an phut a, a hong cheng (lirlai) a boi nok tenah kha an tep ngai. Khaangkana, hong itepin Nisan 14 chu thla lir lai tak a nit ngai. Khanchu March neh April thla sung thla lir lai tiang hong tok rang Tlanni tak kha Good Friday ni rangin ei imang ngai a nit. Jisua ringnuna â zui, a suakni, a sinthona, a thina, a thoinokna neh rivanah a luina hei, khantak ata a zuang nok rang idena a thurchi reng reng ei saninringna ranga Krista sintho rizom mai a nit iti hih ei risei suak ranga ei inuam a nit.

1. Jisua kha ei سوالهي sika thi a nit: Jisuan rammualah sin a tho laiah khan mi tam takan chu an lom tak tak a. Juda sakhua ruaituhei khan chu lom mak e. Ithat an nuama. That rang dan lampui izongin an buai tak tak ngaia. Khannise, mipui ningthik rang an ti sikin ridin takan an ichâng a nit.

Khangkana ithat an inlung mainah khan thiamno an inchang rang dan izongin lam itam takan an phiara. A koilom laia mi khom an ithlem inê tak a. Jisua khah ân man thein chu T.30 ipe an inkunga. Ani (Juda Iskariota) lakin a lei iham tak a. A zoro a hong thlunga Gethsemane rikulah a om laiin an man tak a. Kha zanah khan Thiampu Laltak Ana inah an thui masa a. A

tuk zingah chu an sakho roirelna risang tak Sanhedrin maah an inding nok a. thiamno an inchangna rang rêng mu zoi mak a. Rom roireltu Pilata ziangah an fepui noka, lam ithumka an nonah bi ichoi san: a) Thu ðano ân risei ngai, b) Kaisara ziangah rineng man sia choi a khap, c) Reng arti (Lk.23:2).

Pilatan a thiamnona reng man thei mak, isua nuam khomseh mipuihei sikin isua ngam khai maka. Heroda ziangah an fe noka, Heroda khom khan tho rang dan reh ual maka, Pilata ziang ngirah a hong tir ikhir noka. Pilatan ithat rangin mipui hei kuta a pek tak a.

Kros an inriput a, Kalvari tlang lamah ikhai rangin an fepui tak a. Mipui tam takin an zui a. Krosa an ikhai tak. A thi taka. A rangchat maka, ama musittuhei rangin a ðongtai pek maia: La phuatun:

“Ithom ni dairek taka, thiamchangna reng ni nei ino mani? khan dairek nonla O Rengpa, thiamchangna reng kinei ino rang,” itia a isir angkan a thiam thu sirin iding ngit sela, eini hei hih ei soal sikin ei ithi nget rang nom a nit a. Khannise, lung ane thlung rei sikin ei thi sik ai thi tak a nit.

2. Thlan ata a thoinok tak: Jisuan a damlai heiah khan thi man sela ai thoinok rang a nit itin a lei isir ngai sikin Juda ruaituhein â thlan chu Lungpui ilian taka ising a sipai hei inveng rangin an ngena. Tlanni chonunga thi khah Pathianni zing takah ithlan ata khah a hong thoinok tak a. Thina chungga thuneitu tak chu an ithat thal theiino chu a nit. A thlan chu ingka vengin veng khomseh a thoi lamin ai thoi a nit. A thoinok nungin a koilomhei ziangah khom a van lar ngaia. A thoinok nunga a taksa chu danglam tak a nit tak. Ingkan takim ai om iti khom rilinfel thei ni khai mak e. A karah a kut neh a kânga sabe hei ân en theia, ân ton ngaia; a karah inkhar rikal khapa khom a thleng thal theia. Amah hin thina a nea, a thoinokzia a in entir a nit. Eini khom ai thoinok angka hin ei thi nungin van taksa thar ineiin ei ithoinok rang a nit.

3. Jisua ringnunah â poimono reng omak: Jisua a suakna hei, a sinthona hei, a thina hei, a thoinokna hei vanah a lui dan hei neh a zuang nok rang thu hei reng reng hih a poimono khatka lua omake. A rangka hin saninringna ei chang theina rang lam korong a nit. Miriama zuang inzirin ei nitna tin ane riatpuia, a sinthona heia ei ringnun siaminthamna a nit a, a thina khan ei thi sik a thia, a thoinokna mangin a nen ring nok a, vanah a zianga ne ðhui rangin ai zuang nok rang a nit. Ama sik bangin Pathian ziang ithlung thein ei om tak; Ilom a om vangna!

Richang Spell: 1 Timothe 1:15: Nikhomsela, lungril rithiang, sia neh ðha riatna rithiang neh iamna dik taka rithoka suak lungthlungna khah a hong pung theina rangin hi thu hih nang kî pêk a nit.

Ṭongridon:

1. Juda hein kalkan kût an imang ngai kha taka hong inñan mani?
2. Jisua thi zoro khah izaro mani?
3. Juda hein thlaka sung sun ingkam an tep ngai?
4. Juda ruaituhein Jisua thina ranga an nona bi ithumka kha isir ta?
5. Jisua Krosa a tuang laiin a rangchat maka im ai ngen?

Risei rang 30

Thupui: Pentikos nin Rithla Rithiang a zuang thlung

Itep rang Deuteronomy 16:9,10; Sinthohei 2:1-13

A thiltum: Rithla Rithiangin tina an boi.

Thuma: Pentikos chu Grik tonga somringana tina a nit a. Israelhein an fatun (barley) bu ât masatak chu Pumapa ta ranga an lan ngai rang a nit (Deut.16:9,10). Khantaka rithokin hapta kar kût hapta 7 kah an mang rang a nit. Kha hapta kar 7 ka (49 days) zoi kaneh a sun somringana khah Pentikos kût an ti a. Amah hi kalkan kût ata sun somringani a nit. Jisua thoinok ata sun 50 na kha Rithla Rithiangin roinpui taka iamtu hei laia a zuang ithlung a nit sikin Thuthlung Thar Koindangah chu pentikos neh Rithla Rthiang hi rizom angkana ringai khom a nit zel (Sinthohei 2:1). Pentecostal Koindang hei khomin Rithla Rithiang hih an ichang bîk angkana ringaiin riming khom an irvua zel a nit.

1. Jisua nung izuihei an indôp: Jisua an that nungah khan a nung izui ngai hei kha an indôp ok tak a. Jerusalema Marka nu Mari in chuanchung chontan inrila iri nei ngam bâk iloiin an ribuk khom ngaia. Amahkhan, lungril khatka riputin inkhomna an nei ngai a. Min an omna an iriat rang neh an thusir an iriat rang kha an ti tak tak ngai.

2. Riano thei in om khai mak: Sunka chu Jisua thoinokni a rithoka a sun somringani chian, Judahei Pentikos kût nia khan an omna in chu thlipui natinsat tak isem angka hin â ri dur dur tak a. Miriam ilei angkana hih meichok angka a lang suai suai tak a. An rengka chungah khan a fûk chit tak a. Rithla Rithiang an idong a nit zel tak a. Ilei khan Rithla Rithiang zarah Pathian thu sir theina neh isir ngamna a entir a. Mei khan soal ata rithiangna neh sinthotheina a entir a. An limnaah khan an iri khah ithup theiin om khai maka, â ring tûr tûr tak a.

Kha zoro lai taka Jerusalema kût imang ihong ram dang dang 15 vel a rithoka hong hei an la châm a. Khanchu an iri

khah a nat ok tak sikin khahei khom khan an riat phak tak a. An itlan khôma an thlir vong vong tak a. Thil rikhel tak khatka chu koilom hei khan Pathian thu an isir suai suai tak a, a thlirtu nam dang dang hei khan an thusir khah anmahni tong chita isir angka an lei riat chit a. A then hei vangin chu arkhel anti rei sikin “Zu an inrui anit hi,” an ti a.

3. Koilomhei an ihai tâk: Mi iriat itia ridin detka lei iom ngai hei khah tina ite nei khai maka, an ngam tak tak tâk a. Mi an imu murdi ziangah Jisua thu thatzia neh roinpuizia chu an isir pek thiai tak a. Petera, Jisua an man laia nupangtenu ziang khomah Jisua miriat a nit isir ngam khaiino khah, itî reng reng nei khai mak e. Khani suna an thusir sika khan mi 3000 hein Jisua Krista chu an iam zel tak a (Sintho.2:41). Rithla Rithianga inrithluka an om tenah khan chu tute mi thaidop reng om khai make. Iamtu thar nintin iboksan an iom thiai tak a nit.

Richang Spell: Luka 11:13: Nangni mi soal manin nin naihei thil itha pêk nachâng nin riatin teh, nin Pa rivâna mi vangin teh â ngêntuhei kha Rithla Rithiang ai pêk rang vang na!” a ti a.

Tongridon:

1. Judahei hapta kar kût khah hapta izaka neh a sunin sun izakam ai nit ngai?
2. Pentikos nia Rithla Rithiang zuang thlung dan isir ta?
3. Ileiin im ai entir?
4. Mei in im ai entir?
5. Jerusalema Pentikos kût imang ranga hong hei khah ram idorka ta'm an init?
6. Koilomhein Rithla Rithianga thu an isir masataka khan mi idoram iamtu thara hong ripe?
7. Mi then arkhel iti hei khan im an inrui keng an iti?

Risei rang 31
Thupui: Jerusalem Inkhompui
Itep rang: Sinthohei 15:1-6, 22-29

A thiltum: Pathian thu inrisei dan idik neh dikno thuah Koindangin roi a rel ngai

Thuma: Jerusalema an inkhompui thurchi irianfel rangin chu Sintho.15:1-35 hi itep rang a that. Jerusalema an inkhompui nei hi A.D.49 vel (Jisua thinung a kum 19 na) inia ria a nit. Kha hun laia rangin chu Jerusalem khah Koindang munpui tak angkana ringai anit. Khantaka an Koindang ulian tak chu Jisua unaipa Jakoba khah a nit (Sintho.12:17; 15:13; 1 Kor.15:7). Hi Jakoba hi lekhathon riziaktu khom a nit (Jak.1:1).

Ei Koindang roirel dan richuan dang danghei chu: Amasa takah Koindang, khanung Bial, Prebytery, Synod neh Assembly a nit. Koindangah Upa hei neh Koindang Komiti member hein roirel an ta. Biala Pastor hei, Upa neh Koindang tualsung Upa hei; Presbytery a Pastor hei, Upahei neh Evangelist hei; Synod neh Aassembly chu a bikin Pastor hei an nit.

1. Jerusalem Inkhompui an koi: Tirton Paula neh Barnaba khah Koindang hei itirh in ThurchiṬha an rila. Juda Kristian hein an lei sêl a, “Iamna sik bangin min saninring chang thei noni Mosia danin serh an tan sa nget rang a nit, itin. An risêl ok tâk sikin Jerusalema Koindang ruaituhei ziangah Paula hein ingaitua rangin an ithlun tâk a. Inkhompui ikoia relinfel rua a nitin an riat tak a. A.D.49 ka velah khan Jerusalema Koindang roirel inkhompui masatak chu an ikoi tak a nit.

2. Inkhompui thurel: Jerusalema khan roirel rangin Tirton hei, Upa hei neh Koindang mihei chu an ribûm khôma. Paula neh Barnaba neh mal thenkahei Antiokei khua rithokin an hong țang sa a. Iamtu thar hong iom thiai hei rang ihuapin Mosia Dan izoma serh itan nget a țul neh țul no thua an isir thlang tak a. An risêl ok a.

Khanchu petera a dinga, Kornelia zianga Pathian thu a thlung dan neh nam tinrengin Mosia dan zom sik ni loia iamnan saninring an ichang thei a nit itia an lei iam dan thuhei ata ithiam takan a hang isir a. Paula neh Barnaba khomin iamna sika saninring thu ngir an isirnaah Pathianin â pompui zia neh a lungkhamna ân lang tâk zia thuhei an isir sa a. Kha thuah khan an irsêl ok khom a nit taka, an țong khom ai lum ok tak ning a ti.

3. Jakob an khaikhom: Khaangkana an risel ok tak naah khan thudik chu a riat thei tak sikin Jakob an roirel thurel chu thunei tak kan a khaikhom tak a. An thuthlukna chu: “Mosia dan izom nget nang ual make,” iti hi a nit. Kha an thu thluk dan tak kha Jentel iamtu thar min an lei inbuai tak hei ziangah lekhathon rangin țha anti tak a.

4. Juda neh Sila kuta an inchoi: Antiokei khua iamtu thar hei ziangah hinga takah hin an thon, “Rithla Rithiang neh kei nin hi thu poimo ti ban hih chu puak irik ual nin chungah ibâng tum mang unge; milem biakna sa ifa hei, sa thisen ifa hei, sa têt a thi sa ifa hei neh rizukna sual hei bâng rei kin iti a nit. Hi hei hih nin ima'n chu nin rangin țhâng ati. “Dam rei,” itin an thon taka (Sintho.15:28)-29). An thu riziak chu Juda neh Sila an inchoia. Koindang hein an lei mun chu an lom tak tak a.

5. Ireh rang: Hi zoro lai ata hih Pathian thu inrisei dan idik neh dikino thuah Koindang inkhompuiin Bible inriseina sirsanin thu an lei irel ngai a nit iti hh ireh ranga țha a nit.

Richang Spell: Galatia 1:8: Nikhomsela, keimanin manih, rivâna rithoka zuang itum vântirtôn khomin manih, Thurchi Ṭha dang nangni an isir pêkin chu vânisalin om riseh.

Ṭongridon:

1. Jerusalem Inkhompui ikoi a nitna san nin iriat isir ta u?
2. An Inkhompui khan tum ruaitu tak ai nit?
3. An thurel khah tak khua mihein an ithon?
4. Tu heim lekhathon ichoi?

Risei rang 32

**Thupui: Paula Thurchiṭha rilin ân zin ngai (zin voi I & II
Itep rang: Mathaia 28:18-20**

A thiltum: Thurchiṭha inpuang neh Koindang iphun hi iamtuhei sinpui tak a nit.

Thuma: Sinthohei 8:4-12:25 sung khah ei tepin chu Jisua koilom hei neh a nung izui hei chu mun dang dangah Thurchiṭha rilin an rivak indarh ngai iti ei riat a. Paula khom Thurchiṭha sirin an zin ngai iti hih ei risei rang a nit. Hingkana ân zin hih tum ithumka vel a nit a, a tum lina chu Rom khopuia Kaisara makunga a chungthu isir ranga a fena a nit. Sinthohei bung 13 ka rithoka a mong idena hin Paula arvâk vel thu isirna a nit ual. Paula hin hinga takah hin sin a lei tho a, a roinpuiin enton tlak ai tling a nit.

1. Paula Thurchiṭha rila ân zin voi khatna (Sintho.13:1-14:28): Iamtu masa hei laia min lar tak Paula neh Barnaba chu Rithla Rithiangin Thurchiṭha ril rangin a ti a. Khasika khan anmahni khat rizukna banga inzin suak ni loiin Koindangin an itir suak kher a nit. A tirsuaktuhei chu Suria rama Antiokei Koindang a nit. Rikuangin Kupra tuihual ram an pana,. Pamphulia an pan noka, Pisidia ramhei, Lukoni ram hei an rifang thiaia. Hingkana an inzin laiin Paphos kua doithiam Elumanan a lei inbuai a. Pathian sinthotheinan a mit ân del peka. Reng ai-otu Serjia khan Paulan Pathian thu a isir pek a oi thei tak a.

Pisidia rama Antiokei kuaah thu a sir nok a. Mipuiin an lei lom tak taka, an ribuk tul tul a, Mi tam takkan Jisua an iam tak a. Khannise, inartuhei an lei om nok thiai a. An hang inbuai nok tak a. Lustra kuaah Jisua rimingin kebai an indam nok a. Khasika khan mihein an ringainrisang ok sikin Pathian hei angka dora iûn an tum a. Khan nuam pek maka. Pathian isom pai an nit thu i-uar takkan an isir a. Amakhan, nartuhei khan Paula chu lungin an deng ruih ruih tak a. Ithi nget ranga an iam sikin

rikul putiang an paih a. Pathianin a lan dam nok. “Intak itam taka tuangin Pathian ram ei ilût rang a nit,” itin thu an isir mai a. Mihein Jisua an iam indet ual ual a. Kua tam takah Koindang a hong iding suak tak (Sintho.14:22).

2. Paula inzin voinikna (Sintho.15:36-18:22): Antiokeia Peula neh Sila chu Pathian thu ril rangin an suak nok tak a. An inzin masaa an Koindang inding hei khah an itlo suak nok vang a. Lustra kuaah Timothea a lei oma, serh a tanpuia, a thui zel tak a (Sintho.16:1-3). Khanchu, Rithlan ân riat lam angkan Makedonia rama an fe a. Philippi kuaah an lût a. Hi kuaah hin puan senduk izuar ngai Ludi khan Jisua a iam sa tak a. Khante, nungak, ramhuai iman khatka ân dam a. An buai zui zel tak a. Lunginah an itângna ai chang pek a nit. Khannise, zanah Pathianin a zuang saninzok a, tâng in vengtu neh a insung mihein Jisua rimingin baptisma an ichang a nit (Sintho.16:13-34).

Thessalonika hei, Beroia kua hei an itlo zoi nungin Akaia rama Atheni, Pathian itam taka an biakna kuaah Pathian thu chu an isir thiaia. Min mol neh mi varhei laiah an zoronum lam lamin Pathian thu chu an isir thiai a. Korinth kua vangah chu hapta lei sunthumka sarh ichâmin Priskili neh Akuila hei nupa hei neh khom an irmu a nit. Hi nupa hei hi Paula hei rang mi tangkai an la hong init a nit. Korinth kuaah khan mi tam takan Jisua an hong iam tak a. Buaina khom an tong zel a. Pathian tangpuinan an infel thei râm a. Korinth ata an hong kir noka, Priskili neh Akuila hei nupa khom an thui zel a, Efesia an mak nok a, Paula hei chu Antiokei an kir nok. Antiokei kua an hong tlungin chu an lei lom tak tak a.

Richang Spell: Johana 20:21: A thar vangin Jisuan an ziangah, “Nin chungah thlangamna om rise,” a ti nôk a. “Pan a ne itir angkan kei khomin nangni kî tir a nit,” a ti a.

Tongridon:

1. Inzin voi khatnaah paula khah tunem an inzin?
2. Inzin voiniknaah Paula khah tunem an inzin?
3. Paula inzin phutna ngai neh a kir noka arngamna ngai khah ikhua neh i-ram mani?
4. Tak khua'm Paula hei Pathian angka dora ibiak ranga an lei itum kha?
5. Inzin voi khatnaah tak ramim an ipan masatak?
6. Tak khua'm tâng in vengtu neh a insung mihei Jisua Krista iamtu an ichang?

Risei rang 33

**Thupui: Paulan Koindang ai phun hei a ngaisak zui
(zin voithumna neh lekhathon)
Itep rang: 2 Korinth 11:21-31**

A thiltum: Thurchiṭha'n puang neh Koindang iphun hi iamtuhei sinpui tak a nit.

Thuma: Sinthohei 18:23-12:16 sungah hin Paula inzin voi thumna thurchi ei mu a. An inzin voi nikna a hong kir khah hun isot tal ka an ringam nungin inzin voithumna rangin an suak nok a. Inzin voinikna zoia arngam sungah hin Alexandria khomi Apollova'n Efesi khua a lei zuk itloa. Priskili neh Akuila hei nupa khah an lei oma. Anni khan Apollova chu Pathian thuhei an lei inriseia. Koindang riatpuina lekha isiampuiin Korinth tiang an lei tirh a (Sintho.18:24-28).

1. Paulan a Koindang phun hei atlo: Paula kha anzin voinikna a hong kir nok nungin Antiokei khuaa sot tak inzin iloiin a oma. Nungah chu an zin masaa a irfang khua hei khah rifang nok rangin an zin nok a. Efesi khuaa a lut masaa. Inkhomna in (Synangog) ah thla thumka sarh an risei a. Kharizoi kum inik ikai dapkan a châm noka, Turana inriseina inah an risei ngaia. Turana hi an reng manih an riseina in ineitupa ningati. Efesi hi doithiam tamna khopui a nit a. Paula thu inriseina an zom sikin an doi riseina lekhabuhei khah an hal rivam a; Tangka singringaka (50,000/-) man vel ning ati an ihal khah (Sintho.19:19). Efesi khuaah hin Pathiannu Diani rilim khah an biak ngaia. Diani rilim inluan ngai Demetria khan Paula hei thusir khah mihein an iam tak takin chu Diani Pathiannu ringainep anta an sum lona ngai ai tlak riniam rang an ṭi sikin ân buai tâk a. Khankhom ingkan kan manih ithon an indai thei râm a.

Khanchu, an inzin noka, an inzin masa ṭuma an khua tlo ngai hei khah Grik ram idenin an rifang suak nok a. Thla thumka

reng an thang a. Kha rizoiin chu an hong kir nok tak a. An hong kir tiang Troas khua itlon sun sarika an châma. Pathianni zana paula neh a lomin zanbu an rikhil a. Paulan thu a sira; a sir insot rei a. Tlangval khatka Eutuka chu inrimu a lei ibuk a. Tukverh ata khah a thlak tak a. An zu thoiin chu a lei thi pial tak a, khan, Paulan a kaiithoi nok a. Khani zanah khan chu Pathian thu khua varin an isir a nit (Sintho.20:5-12).

An hong kir nok thiaia, Mileti khua rithokin Efesi Koindang Upahei archaa, iṭha takan a fui a. An inṭhen nok rang tena khan chu an ṭap an ṭap a. An ringai risak sika a nit. An Koindang phun tak hei khah ifuiin Koindang idet taka iding mai rangin thucha hei a pek a.

2. Paulan a Koindang phunhei lekha a thon: Paulan a Koindang phunhei itlo mai thei mak sikin, anmahni ithorna neh risei maina rangin lekha a thon a. Pathian thurchiṭha khah an iriat bangin inrup mak a, irian thar mai a, Koindang iṭha taka an iding det theina rangin a inrisei thiai mai sa a nit. An laia Pathian thu riat dan dik tōk inohei chu a diknona irilfia pekin a dik an ipom rang neh an zui rang a sir pek sa ngai. Kha inriseina lekhathon 13 ka hei khah ei Biblea ei imang hei an nit.

(1) Rom lekhathon (2) 1 Korinth (3) 2 Korinth (4) Galatia (5) Efesi (6) Filipi (7) Kolosa (8) 1 Thessalonika (9) 2 Thessalonika (10) 1 Timothea (11) 2 Thimothea (12) Tita (13) Filemona lekhathon an nit.

Richang Spell: Mathaia 28:18-20: Jisuan a hong nâi a, an ziangah, “Rinêng neh rivâna thuneina murdi ki ziangah ipe a nit tâk. Khanchu, fe unla, nam tina mihei ki Kôilômin siam rei; Pa neh Naipa neh Rithla Rithiang rimingin baptis unla, thu nangni ki pêk murdi izôm rangin inrisei rei. Khante, ringai ta u, keimah kumkhuakan, rammual mong idenin nin ziangah om mai ki ti,” a ti a.

Tongridon:

1. Paula inzin voinikna zoia arngam sungin tum Efesi a lei zun zin?
2. Paula Efesia kum inik ikaia Koindang hei an riseina ngai mun khah tu ta mani?
3. Tum Diani Pathiannu rilim isiam ngai ei iti kha?
4. Paula takmuna'm Efesia Upahei ikoiin thucha nungkhon ai pek?
5. Efesia dôi riseina lekhabu an ihalinrivam khah idora manim anit ei iti kha?
6. Paulan a Koindang phunhei lekha ai thon hei khah an dotin riziak roh.

Risei rang: 34

Thupui: Thurchiṭha buhei an riziak

Itep rang: Luka 1:1-14; Johana 21:24-25

A thiltum: Pathian lerkhabu rithiang eiinei hei hih Rithla Rithiang sintho a nit.

Thuma: Bible pumpui hi mi dang dang 40 vel in hun dang danga an irziak hei ilakhoma bu khatka siam nit a. An riziak hun sung khom kum 1600 rivel sunga riziak a nit. Thuthlunglui bu ei iti bîk bu 39 hei hih Pathian lekhabua an ipom hun tak chu A.D.90 Jamnia khuua inkhompui tum khah a nit. Thuthlung thar bu 27 hei hi Pathian lekhabu ranga an ipom masatak chu A.D.397 Carthage khuua inkhompui tum khah a nit. Khantaka rithoka khan a rengka hin Pathian lekhabu Rithiangah Koindang hein ei irngai indet tâk a nit.

Thurchiṭha bu 4 ka hei khom hih thuthlung thar bua riziak masatak chu ni ual mak a; khannisela Bible inrifomtu hein ân tum dan rang rihoia a inrifom a nit. Riziak masa hei chu Paula lekhaton hei an nit.

1. Thurchiṭha bu 4 ka a om: Thurchiṭha bu 4 ka; Mathaia, Marka, Luka neh Johana hei irziak ei nei a. Thurchiṭha bu an ti bîkna san chu Minriseipu Reng Jisua Krista thurchi riziakna bu hei a nit sikin. Jisua thurchi an irziak korong chu a nit a, khan an riziak dan chu ri-ang vang mak e. An riziak danah ri-angnonah viat viat a om sikin thunô a nit tina ni ual mak e. Nangni khomin nin Pastor thurchi riziak ta unla nin riziak dan ar-ang no khom ni thei a ti. Nin riziak dan ar-angno sikin nin Pastor chu ni mak ei iti thei ino a nit. Reng Jisua thurchi khom hi mi 4 ka hein an irziak a nit sikin ar-angnonah a om viat viat khom ni thei a ti, khan thudik chu ai nit ngir a nit.

2. Thurchiṭha Mathai irziak: Mathaia hi Juda mi, Jisua koilom 12 ka hei laia mi khah a nit. A thu riziak dan khomah Jisua chu Juda mi a nitna a uar bîk a. A thurchi arziak zoro hi, Jisua thi nung kum 40 nunga (A.D.70) vel a riziak a nit.

3. Thurchiṭha Marka irziak: Marka hih Jisua koilom mi ni maka, Pentikos nia koilomhei an ribukhomna in ineitu Mari

naipa a nit. Petera neh an rikan ok a, Peteran, “Ki naipa,” (1 Pet.5:13) itin ai koi a nit Petera neh koilom danghei ziang ata hih Jisua thurchi hih a riat a, a irziak ning ati. Papias-an chu, “Petera tong iletu Marka’n ifel takkan Jisua thurchi hi a irziak suak tâk a nit,” a ti. Arziak kum hi Jisua thi nung kum 36 (A.D.65) vela riziak ini rangin an riat. Thurchiṭha riziak masatak a nit.

4. Thurchiṭha Luka irziak: Luka hi daktor a nit a (Kol.4:14). Jentel mi a nit. Jisua thurchi arziak laiah hin mi tam takkan riziak an tum a, khan Jentel mi lian khatka arming Theofila an iti rang uluk takka suia a irziak pek a nit (Lk.1:1). Jisua chu Judahei rang khomin, Jentel hei rang khomin saninringna tluntu ‘Mitin ta rang Thurchiṭha’ a nitna thu a uar bîk.

5. Thurchiṭha Johana irziak: Amah hi koilom Johanan Jisua thi nung kum 68 (A.D.98) vela a irziak a nit. Jisua koilom laiah Johana hi a dam isot tak a nit anti. Ani riziak danin chu Jisua a nuai nunchan (a ringnun mang dan) thu tiang ni ual loiin Pathian ziang a rithoka zuang a nitna lam i-uarin Jisua sinrikhel sin hei khom khah a Pathian nit zia inlangna a nit zia inlangnan a sir.

Thurchiṭha bu dang ithumka hei hih ‘Mu’ ri-ang, (synoptic) an tia, Johana chu a dang hei angkan ni loiin danglam ual viat kan Jisua thurchi arziak.

6. Pathian iruaia riziak an nit: Hi Thurchiṭha riziaktu hei hin Jisua thurchi, mi ziang ata an iriat hei, amah Jisua thusir neh sintho an imu hei ata an thei dorka suiin an mu dan neh an riat dan angka takin an irziak a nit. An lungsungah riziak thei rangin Pathian polna an idong a nit. Pathian thu (Bible) ei iti hih miriamin Pathian iruaina an dong sika an irziak anit. Rithla Rithiang sintho sika an irziak a nit iti ei i-iam tlat a nit.

Richang Spell: 2 Timothea 3:16: Pathian Thubu tin hih Pathian rithuak khuma riziak a nit sikin thutak inriseina rang hei, dikino rikôkna rang hei, â châi intlûnna rang hei neh nunchan dik taka lêngna ranga rilna ranghein ai nang tak tak a nit.

Tongridon:

1. Thurchiṭha riziaktuhei thurchiṭha riziak kum neh riming riziak ta?
2. Ingkana Thurchiṭha hih an irziak mani?

Risei rang 35

Thupui: Judahein Kristian hei an intuang

Itep rang: Mathaia 5:10-12; Johana 15:20

A thiltum: Intuangna chu Koindang ratna bul a nit ngai.

Thuma: Kristian Koindang hong iding khah Juda sakho ruaituhein an nuamno tak tak a.. An tum tumnah isualsanin an intuang ngai. Thei vang seh Kristian hei chu inboi dip an itum a nit. A tira rithokin kum 300 sung chu Kristian intuangna rikhel tak tak voi 11 ka vel ai om a nit. Khahei laia a masatak chu Judahein an intuangna khah a nit. Hih ringot khom hih mundang dangah tum izakah ai om a nit. Khannisela, Kristian intuangna chu phaivua kara kang mei ithat angka a nit a, intuangnah a natinsat dorka Kristian chu an ipung ual ual ngai a nit. Thil rikhel tak chu a nit reng.

1. Petera neh Johana an man: Petera neh Johana Jerusalem biak in lûtna (gate) “Enhoi” an iti bulah patling ikai tâk a suak ata kebai chu Jisua rimingin an indama. Peteran kha mi damna thu khah thusirnan a mang a, patling 5000 kan an iam zel tak a (Sintho.3:1;4:4). Amakha, Judahein an nuamno tak tak a. Jisua thoinok thu an isir sikin an lunginchoi sa maka. An man a, tâng ina an khum zel tak a. Jisua riminga thusir nok khaiino rangin an iþhi a. Khan anni, Petera neh Johanan an zom no dan lak khah, “Pathian thu zom iloia nangmahni thu kin izom rang hih a idik mani ngaitua ta u, keini chu kin imu neh kin iriat hih isir iloiin kin iom theiino a nit,” itin an sam zel a (Sintho.4:19,20). Thorang dan reh loiin an isua nok a nit kha.

2. Stefana lungin an deng that: Stefana khom Pathian thu a sir mai sikin Jerusalema an mana. Ani lak khan a thusir chu ihai takkan a sir maia. Khua ata an thui isuaa, khua penah lungin an deng ruih ruih a. Thei neh theinon arkhuuk a dil a, “Pumapa hi an thil thonsual hih an chungah mo inpel no roh,” itia a tongtai zoin chu thla ringam takkan a thi tak a (Sintho.7:60).

Kha thu sika khan Kristian hei chu an kolvel khua heiah an tei indara. An fena tinah Pathian thu an isir thiaia. Pathian thu-oi an hong pung ok tak a. Sot inoten Judai ram neh Samari ram khotina Kristian an pung tir tir tak a.

3. Paula a piangthar: Paula chu Saula khom an ti sa ngai. Kristian hei intuang ngai a nit a. Stefana an deng that lai khomin a dengtuhei silbom lei rikhoma lei enkoltu a nit. Damaskaa Kristian hei ai mu murdi imana lung ina ikhum vang rang itum a a fe laiin a ziangah Jisua a zuang inlar pek a, a hong piangthar tak. Ai dem ngai tak Jisua ranga tuangna natinsat ituang intam pol inin Jisua thurchi isirin a hun murdi ai mang inhek pui a nit (2 Kor.11:21-29).

Hi hei tin hang ithlirin intuangna an tuang natinsat dorka Jisua Krista iamtu an ipung ngai a nit. Kristianna hi idoi chi ni mak. An doi natinsat dorka an ipung tur tur mai a nit. Nuai neh van reng inthangin ai ompui tak hei khah tu nim doi ine tâng an ta.

Richang Spell: Filipi 1:12: Suapuihei, ki chungah thil itlunghei khah Thurchi Tha indarna rang a lei nit iti nin riat kî nuam a nit.

Tongridon:

1. Kum idorka sung neh tum izakam Kristianhei intuangna ai natinsat?
2. Tum Krista a iamna sika martara thi masatak?
3. Peteran kebai indama, om thu imanga a sermon a sirah khan patling idorkanim Jisua Krista an hong i-iam tak?
4. Tum Biate hei laia Kristian masatak kha?

Risei rang 36

Thupui: Rom sorkar nuaia intuangnah

Itep rang: Jakoba 1:12; Thuphuang 12:10

A thiltum: Intuangna hi Kristian tak neh lem fiana a nit.

Thuma: Kristian Koindang hong ithuar mai khan Rom sorkar kut an tuang tak tak a. A natinsat ual angkana lang ringot khom tum 10 ka vel ai om a nit. Koindang thurchi-ah chu hi hun laia intuangna an ituang thu hi isir ino thei ai nit ngaiino a nit. An intuangna ngai san hei chu:

1. Kristianhei chu Rom reng tak Kaisara nuam iloia reng dang inei itum angkan an ringai.
2. Sipaiah an tang nuam ngaino sikin ram lungthlung inoa an ringai.
3. “An sakramen a miriam sa an fâk ngai,” anti.
4. Kaisara chu pathian angkan an biakno sikin an ihua.
5. Kristianhein nam pathian hei lung an inhoino sikin ram sungah itamhei, ripuihei, ninuhei a thlung ngai anti.
6. Midanghei Kristiana siam itumin sakho dang an isir insiat.
7. Rom khopui kâng chu Kristianhei ihal a nit anti.

Hi intuangna hi A.D.64-314 sung khah a nit a., kum 250 vel sungin zalen takka om zoro reng nei mak. Khangka karah Kristian sakhua a hong iding suak thal thei chu Pathian sintho sik ringot a nit.

1. Kristian an intuang: Rom sorkar khan Kristian hei chu sorkar ikala iamom ino neh Rom pathian lung an inhoino sikin ram sungah siatna rikhel tak tamhei, ripuhei, tuilian neh ninupui ithluntuah an inpela, an mana; lung inah an khuma. Thenka hei chu chopuiah an khuap de a, meisertui an vura, zanzing rangto'n chu tolai invartu meiser angkana ringaiin, mun tinah an hal inchok ngai. Thenka chu savun iring ithu hein an tuama, an ui isual tak tak hei an pek a, an fâk ihek ngai. Thenka hei chu siriak ilum rithloka an but a. Thenka chu Krosa an ikhai ngai. Thenka nok chu thing at munin an at ithler ngai. Thenka nok chu sechal ihai an insik that ngai. Dûk tho dan chi dang dang imang rang an riat intam sikin an inrum tak tak ngai a. Kristian hei lak khan Jisua Krista zianga an dongtum roinpuizia bang

khah an ngaitua sikin ilom takkan la sak pumin an thi denin an tuang ngai a.

Khante A.D.303 Feb'24 a khan reng tak Dioclesiana khan thupek ithar a sua nok a; Biak in iseh vang rang: Bible neh Kristian lekhabu reng reng inrimang vang rang; Kristian sakho mangrua murdi isut vang rang itin thu a suaa. An dingmuna an tak pek rang vangna! an idingsuak zoino om na!

2. Thenkan Jisua an phial: Decias (Deisias) neh Gallus (Galus) hei inlal lai A.D.250-252 velah khan vang chu Krsitian hei chu lung inah an khuma. An Pathian an phial a, sanong pathian ziangah an ribol nuamin chu isua zel zel rang iti a nit a. Khasika khan Jisua iam ngam tak tak ino hei rangin chu an tuang ngamno sikin sanonghei pathian ziangah an ribol nok tak a. Thenka hei chu Jisua Krista riming iphial nekan chu ithi an rithlang lem a.

Intuangna a hong richual ual nungah khan Jisua riming iphialtu hei khah insirin Koindangah hong ilut nok an nuam a, an hong rizonga. Khan, mi tam takkan ilah lut nok rang nuam khai maka, a thenin an insir tak tak anitin chu ilah lût nok tha an ti a. Koindang inthena ten a hong iom a nit.

Kristian tak neh tak no chu tuangna neh intakna hin ai fia ngai a nit. Mi tam takkan Jisua Krista sika ithi khom an rihuum laiin rua sâr sika inkhom fe pei ino an lai om nok ngai hei ingaituan chu Jisua ranga ei lutno rang zia na! Bible in chu, “Anit, tukhom Krista Jisua Pathian ngaisaka om nuam kan intuangna an tuang sa rang a nit,” (2 Timothe 3:12)

Richang Spell: Mathaia 10:32,33: “Tutu vântlâng riata ne thlop chu kei khomin ki Pa rivâna mi makungah thlop ki ti. Khannisela, tutu vântlâng riata ne phial chu ki Pa rivâna mi makungah phial ki ti.

Tongridon:

1. Kristianhei intuanga an omna ngai san hei a bi indangin isir ta?
2. Kristianhei an intuang ngai dan ni riat lamin isir ta?
3. Reng Dioelesiana thupek ithar isua khah i-im an init isir ta?
4. Rom sorkar nuaia Kristianhei intuangna natinsat ual tum izakam ai thlung?

Risei rang 37

Thupui: Constantinea Kristian a hong nit tak
Itep rang: Isaia 40:12-17; Thuphuang 1:17, 18

A thiltum: Kristianna chu sakhua ring a nit.

Thuma: A.D.284 ah Rom sipai ruaitu Diocletiana a hong inlal nok tak a. Rom ram a rat ual theina rang itungin a ram pumpui chu bial inikan khosak (east) neh kothlang (west) bilain a thena. Khosak bial chu amah, Diocletiana neh Galerius-an an op a. Kothlang bial chu Maximinus-a neh constantius-an an opa. Constantius-a a thi nungin a naipa constantine-an a thul a. Ani a hong inlal a hin a lal champuihei chu a doia a ne a; Kothlang ram pumpui reng tak a hong nit tâk. Khosak reng a doi nok a, a ne noka. Rom pumpui chu aman a op vang tak a. Ani hi iam loi takan Kristianah a hong rilet a. Reng tak khah Kristian a nit tâk sikin a ram sungah Kristian intuangnah murdi chu a hong inthim val tak a. Amah hi Pathian iring roisak ngei a lei nit iti hih ei riat nget rang ei nuam.

1. Reng huaisen Constantine-a: Rom reng Constantine-a chu tlangval huaisen tak, tuai iþha tak, pa lian zen zon, rivo khoma rihoi tak mi a nit a. Ridoi hi a thiamin, ralthluk neh a hang rithluk tak tak vangin chu a-ot ngam rang omak iti rangin a om. Hang i-en reng reng khomin ralthluk imang ithiam mel a irput reng reng a nit. Iþi nei ngai maka, lôm khom a nei thei tak tak ngaia. A.D.306-a apa a thi-ah khan an rama sipai hei khan ani khah an reng rangin an inpuang zela. Ân lal kumah khan kum 34 mi bang a nit.

2. Milvian rikala ridoina: Milvian rikal hi Rom khokol a Tiber vadunga ido a nit a. Amakhan Constantine-a neh Maxentius-a an irdoi rang a nit a. Ridoi ranga a fe rang zanah khan Constantine-an rimang rikhel tak hi a nei a. Armangah khan rivanah khin Jisua Krista riming lam toi Kros hih a mua. Kros bul takah khan, “Hi risinsiana hi mang inla, ridoina chu ine

nget ni ti.” iti hih riziakin a om a. Rikhel hih a ti tak tak a. Khanchu kha risinsiana kros khah a lukhumah neh a sipai hei tang iphoa arziak indang pek vanga. Ridoi rangin an suak tak a. Maxentius lomhei khom an lei risiam rining chak a. An hang ridoi tak tak a, isot taka an ridoi nungin chu nenah a chang tak a. Maxentius-a chu a that tak a. Khantaka ta chu a thil mu khah a tak tak a nit iti a ngaitua a. Kristianah a hong ripek tak a.

3. Kristian intuangna arngam tak: Rom reng tak Constantine-a Kristian a hong ripeka khan thupek ithar a sua zel a.

1. Rom ram sungah mi tinin anmahni inuam tak sakhua an zui rang iphal a nit tak.
2. Rom ram sungah Kristian sakhua chu sakho dang neh rithluk sakhua ai nit rang tak.
3. Intuangna sika Koindingin a thil nei a lei ichan tak murdi ipe kir nok vang rang a nit.
4. Kristian hei ringamni (Sunday) hi sorkar ringamni (holiday) a imang ai nit rang tak.
5. Kristian thiampu hei chu vantlang sinah in-öl an init rang.

Hi thupek isua a nita khan kum 300 ikaia intuangna lei ituang tak Kristian hei ranga ilom a om rang zia chuh.....! Lom rei sika a sêt khom om anti i-iam a om.

4. Kristianna hi sakhua ring a nit: Thinah inea kumtuanga iring ranga thoinok Jisua Krista chu Koindang lu a nit a. A Koindang hei chu a op maia. Khasika khan intakna neh intuangna karah khom Koindang chu a dingsuak tak. Ân tuangtu neh inboi itumtu hei murdi an hong rimang thiai a. Inboi an itum tak Koindang chu a lian tir tir a. rammualah sakhua thuar irat tak a hong nit tak.

Constantine-a khan ama riming ichoiin khopui ithar Constantinople an dinga. Amakhan Kristian hei Pathian bang ibiak iphal a nit a. Rom sorkar ratna chu Kristian thurin ining thei ngaiino khan a ilet pai tak a nit.

Richang Spell: Hebrai 4:12: Pathian thu chu a ring a, sin a tho thei a, khandai bêneirim ingaihtak nêkan khom a ngaih ual a. Ringna neh rithla richinna hei, rurbun neh rithling hei idênin a sun ikhoi chit thei a, lungrila ngaituana neh tumna hei khom a riat thei zel ngai.

Tongridon:

1. A.D.254-a Rom sipai ruaitu khah tum ai nit?
2. Taktiang rikala'm Constantine a neh Maxentius-a ridoi rang an iti?
3. Constantine-a i rilim imanginim Milvian rikala ridoinah nenah ai chang?
4. Constantine-a Kristian a chang nunga thupek ithar a isua khah ni riat dorah isir ta?

D. Kristian Nun
Risei rang 38
Thupui: Ringaichinna
Itep rang: Mathaia 5:5; 11:29; Mika 6:8

A thiltum: Pathianin ringaiichinhei a choiinrisang ngai.

Thuma: Ringaiitlom, zaidam, nun rinêm ei iti hei hih ringaiichin hei nunchan ilangna a nit. Ripak neh risong hei hih Pathianin ai dem a nit. Mi ripak neh risong hei chu a lengpui an tak a, arzuipui khom ai hoiono a nit. Mi zaidam hei chu arzuipui ei nuam a, arsonpui, arpolpui ai hoi a nit.

1. Ringaichinna hi Pathian zepui a nit: Filipi 2:8 ei enin chu Pathian ringai chinna ifel takkan ei imu a nit. La phuatun “Ingkanim Pathian nai tloibei misual ki rangin ai thi?” aiti angka, Jisua Krista rineng neh rivan Rengpa ni manseh, miriam hei nun itlangpui rangin a nitna (a roinpuina) tinreng ikhêng riaia miriam laiah a zuang iom hih a zepui ân langna a nit. Ringaichinna hi Pathian zepui ai nit angka kha nun khah inei bangin Pathian ei irpol thei a nit.

2. Ringaichinna hi mahni rimusitna ni mak: Itlom, ichin ei iti hih miriam ringaiah chu itlom rei angkana ringaina iom thei tak a nit. Mi imusit, mi i-ero ituang rang angkana ribena om thei a nit. Nu neh Pa thuzom hei chu mal neh cham neh rual neh chim lai khomah an nun a zalen no sikin mal cham nuamna tinah tang thei ngai maka, malcham laiah “iṭhing” ilo thil i-ol tak a nit. Khan, nu neh pa thu an zom sikin an sinna kipah tuan an tlunga mi imarit an ilo ngai a nit. Miriam ringaiah itlom angka om khomseh ei nei nget ranga ei Rengpan a lei isin pial tak a nit sikin aman inei thei rangin a zoro takah ne tangpui ati iti ei iam zoi rang a nit.

3. Ringaiichinhei Pathian a choiinrisang ngai: Ringai chinna ei iti hih itlom angka ilang khomseh Pathianin ai choiinrisang ngai a nit. Miriamin ei ichoiinrisang nuam hei chu mi lian, mi roinpui hei an nit ual ngai a. Khan, Pathianin ai choiinrisang

nuam ngai hei chu mi ringaiichin hei an nit. Pathian thun, “Ringaiichin hei chu an ham a that, rineng hih an la lua rang sikin,” (Mat.5:5) ati. Khanoka, “Mi musit ngai hei chu a musit ngai, ringaiichinhei rek chu lungkhamna a pek ngai,” (Thuvar 3:34).

Thing khom hi â râ a tamin chu thing itang a buk a, arniam tir tir a, riniam tengkan min â râ an rimal a, an fâk ngai. Khaangkan miriam khom lungkhamna neh thatna nei intama ringaiichinhei chu an nit ngai. Pathian choiinrisangna dong nuamin chu mitin laiah ringai chinna inlang ai nang a nit.

Richang Spell: Filipi 2:8: Ringaiichin takkan a om a, Thina dên rakkan thu a zôm a, krosa a thina ngêi kha.

Tongridon:

1. Pathianin im ai dem tak?
2. Ringaichinna hi tu zepui mani?
3. Pathianin ingkana mi heim ai choiinrisang ngai?
4. Ingkana nun inei inim Pathian neh ei irpol thei rang?

Risei rang 39
Thupui: Tuangdiarna
Itep rang: Rom 8:25; Hebrai 12:1

A thiltum: Lamtinrenga lothluk rangin tuangdiar a nang.

Thuma: Loi sin ithoa takritai neh ipei taka sin ithotun chu a monga tlai chi ra itam takah armal ngai a. Risei mi khomin thuzomna neh takritaina a nei sikin a mongah chu taksa vangsak inumin ai om a nit. Mi lotluk tâk murdi ridon unla lothlukna lampui an ro laiah intakna itam takah an fe thleng zia thu isir rang an inei nget rang a nit; amakha tuangdiarna ei iti chu a nit.

1. Krista enton rang: Kristah rammualah a zuanga a lampui zuang ro reng reng hih intakna lampui korong a nit. Reng nai a nit khan, inriang itlom takan ai zuang a nit. A suakna Bethlehem khua ti ngai khom ei la serat inah sial ichi liakna rikuangah (sakheng) a lai nit nok a nit. Tlangval a hong nit noka, rammual par neh a ringnun armun rang lai takin a pa thu banah a ringnun a mang inliap rangin iphal ni mak. Pathian nai ai nit angkan sinthotheina tinreng a kuta om a nit. Khah khom khah a nuam lama imang thei ni make. Ama nitna tianga a nuamlam tinreng a chân riai ngamnah kha ritlanna sin a thona rang tianga a lothlukna chu a nit. Misual a chung a kut itlaka, chil isaktu murdi hei khah phuba la rangin tongbai khatka hangnei seh vantirton sang itam takah, Michaela neh a lomahei, voika rengin â tangpui rangin an zuang ithlung rang a nit. Khannise, “Ner cham nirse,” ai ti lem a nit. Tuangdiarna lam puitling takka lei irotu ei Rengpa nunah hin risei ei ti u.

2. Tuangdiarna hi ingka sika ei inei im: Tuangdiarna ei iti hih ân dât a inei thei ni maka, kha nei theina ranga ne turtu a om sik bangin inei thei a nit. Jisua Kristan tuangna tinreng ipal ngama a tuangdiarna chu miriam hei lungthlungna sikin a nit. Miriamin ei irvoi a om sikin intak ei isik ngam a nit. Kristian

nun a tuangdiarna san chu kumtluang ringna itunga ringnun imang ei nit sikin. Pathian lungthlungnan amah lung ei thlung theina rangin diarnan ane ingak ngei ngei a nit. Amah lung ei ithlung angkan midanghei chungah ei tuangdiarna ei inlang rang a nit.

3. Tuangdiarna lampui iro rangin thil itam takah ei ritem riat (experience) rang a om:

a) Mahni rivong thiamna: Thonchaina lam iom tinreng ata rithiar filim.

b) Mahni sintuma intak ituang ngam: Loisin min ruasêp-ruabar karah khom a loi sinna lungithlungin intak a tuang ngam rang; khaangkan riseilaihei neh sinthona dang inei hei khomin. Ei iamna lampui khomah ei rithla ringnun izoka a om theina rangin thlemna chitin reng idoi ngam ituang ngam ai nang a nit.

c) Ngo-rilna neh inriseina tha (Discipline) izom rang: Nu neh pa thuzom an nen riseina ipom thiam, an thu nuaia ribil ithiam ai poimo a nit. Khaangkan ei chungah unlian manih minriseitu (teacher) hei ne rilna murdi ringai poimoa, an ti lama om ai nang ngai a nit. Hingkana zoro a hin chu lomna tam bâk ngai mak, riphun-richiarnan a nen buai intam ngai sikin.

d) Dikna song ngam: Biate thuvar, “Tong dik iril ne sa zâng ituk mi mu mâk,” iti a nit a. Dikna hi mi tinin ei irngaiinlut a nit a, khannise, ei inei thei ngaiino a nit. Idika om, idika tong, idika sin hih mihein chu ringaiinlu bâk ngai mak, an thlukno sikin sirinsia an itum ual ngai a nit. Dikna ringaiinlut mi chu ai tuangdiar a nit tina thluk a nit.

4. Tuangdiarna râ: Tuangdiarna sika irâ om taksa thilah chu inloi vangsak ințumna, sumpuan inei, richon lamtual inei, Inloi rifûk, sinna lian isin nitna risâng inei neh a danghei an nit. Rithla tianga lothlukna chu: Limna hei, lomna hei, raifanna hei rithla ringamna hei, lungthlukna hei, lungthlungna hei neh a dang dang a nit.

Taksa neh rithlaa tuangdiarna lomman ei iriat tinreng hei hih a tlonga ipe nizat ual ngai mak. Min intak rêtkâ an ilosuak ngai a lei nit. Intakna itam takka ife thlengin hi hei hih ei lai mu rang a nit.

Richang Spell: 2 Timothea 2:5,6: Pathian khatkah bang a om a, Pathian neh miriam kârah khom palâi khatkah bang a om a, miriam Krista Jisua khah. Mi murdi ritlanna ranga ripetu khah a nit. Saninringna thu khah Pahianin a zoro inkung takah a zuang inpuang tâk a.

Tongridon:

1. Tuangdiarna rangin tûm ei enton rang?
2. Tuangdiarna hi isika omim?
3. Tuangdiarna lampui ei rô laia ei ritem (experience) rang bihei khah iim an init isir ta?

Risei rang 40

Thupui: Iamomna

Itep rang: Mathaia 25:21; Lk.19:17; 16:10-12;

Thup.2:10b

A thiltum: Iamomna hi nei intamna a nit.

Thuma: Iamomna hi Pathian neh miriam karvanah neh miriam neh miriam karvana palai poimo tak a nit. Atunlaia nin SMS hei hih idorkam iamom a ti.....O! Pathianin miriam hei a fiana ngai neh a en sinna ngai chu iamomna a nit. Bible a tlangval iamom ei iriat hei laia khatka chu tlangval Josefa kha a nit a, Pathian nintina a mel ai muno lungril banga ai iamtu ta ranga a iamomna khah ai roinpui a nit.

1. Iamomna hi Pathianin miriam heia ai phût a nit: Pathianin Abraham a koi thu hih thu ringai nuam iom tak a nit. Pathianin a koia a zui zel a, Pathianin nai ipa a peka arming Isaaka, Isaakan naipa inika Esua neh Jakoba a nei a iti karah hin kum riza itam taka ai tlak man a nit. Pathianin Abraham a son voikhatna neh voinikna kar khom hih kum itam takah ai tlak man a nit. Khannise, a son ikipa Abraham a lei isâm thar thar ngai a nit. Camping tum khatnaa Pathianin nang â sôna ilom takkan ni lei don a; camping tum iniknaa nang â sôn nokin chu sam thei khai mak che. Ithom ai nit? Nang a sonna masa khan ni lei iom khai ino tina a nit. Ni lungthlung nu, ni lungthlung pa khah nin rimu karka chu lungthlungna thu nin rilan maia; nin omna ân dang tenan chu lungthlung dang neh an rison nok mai tak sikin ni buai tâk chu a nit. Pathianin nintin iamom roh ne ti ngai make, eimahni khah ata rangin ei iamom mai rang a nit.

2. Iamoma ei om theina chu a thu (Bible) hi a nit: Pathian takam ai tong ngai? Bible-a a nit. Bible a thu omtin hih Pathian rithuak khum a nit. Rithla Rithiang tong itina a nit. Bible hi lam itam takkan itep thei a nit, rammual thu riatnan; Israelhei thurchi riatnan; rammual renghei roirel dan riatnan; Jisua sintho riatnan, iamtu hei ring dan riatnan neh a dang dangin. Anit, a

ingka lama tep khomin a that a, Pathian thu ai nit angkan kha ei iriat hei khah rithlan a thu ring nitna a mang tenan chu nang ai siam indanglam nget rang a nit.

Bible hi iamomna bu a nit. Bible ei tep ikipa Pathian neh rison theina tlangah ei iom a nit. Pathian khomin amakhan nersonpui rangin ane ngak mai ngai. Bible tep nuam ino Pathian ranga iamiom om ngai mak. Bible reng reng tep iloia Pathian ranga iamiona ribe thei mai chu mi rikhel tak ai nit rang a nit. Bible tep theiino inmol hei rangin chu mi thusir an irngai neh an itongtai ngai a khan Pathianin a lei riatin ai sam ngai a nit. Bible itepin ei iamomna inlang ei ti u.

3. Iamomna hi pungna a nit: Pathian ranga iamiom ei iriat hei reng reng an mongna chu pungna a nit ngai. Ingkana pungna'm? Thatvurna itam takka dongna a nit. An lei idong tak chung a bâk itam taka ibok pek a nit. Joba Pathian mifel tak kha archon neh a nai neh te a chân vang nung khomin Pathian a iamna ima maka, nungah chu bâk izâkan Pathianin ai thung nok a nit. Josefa hei Daniala hei khom Pathian ranga an iamomna lomman chu an omna ram chung a roireltu lian inringat an inith kha a nit. Kristian nuna ei iamomna pung rang chu "Ringna Reng lukhum" (thup.2:10b) a nit. "Thini denin iamomin om roh, khanchu inena lommanin ringna renglukhum nang peng kiti."

Iamna ei nei intam neh iroiah ringat maka, talent ei nei intam neh roiah khom ringat maka, ei inei a chin neh a lian le khom itu ngit a, ivong ngitin ei fe maiin chu a pung nikhua ei lai tong nget rang a nit iti ei riat mai rang a nit.

Richang spell: Luka 19:17: A ziangah, 'Ni thon that, isom itha ni nit, thil iroicheka chungah iiam ni om sikin kho somka chungah ulian nang inchang ki ti,' a ti pêk a.

Tongridon:

1. Pathian ranga iamiom ni riat an lâr ual mi ithumka riming riziak ta?
2. Ithom ei iamom thei ngai no?
3. Iamoma om mai theina im ai nit?
4. Thini dena iamiom hei lomman im ai nit?

Nikhua Poimohei:

TÛM IBÂN PATHIANNI (PALM SUNDAY (Johana 12:12-16; Mat.21:1-11; Mk.11:1-11; Lk.19:28-40)

Thurchi Tha ilikahei hin Jisua inlal takka Jerusalema a lût thu hih isir a nita, nikhomseh Johana riziak bangah hin tûm iban thu isirin a oma. Khasikin tûm iban thu Johana riziak tiang ithlek ualin isir a nit.

1) Jerusalem khuua mihei khan Jisua inlal takkan Jerusalema hong a ti, ti an lei riata. Jisuan dam inohei an dama, ithihei a kaiithoia, a thusirhei khom an lei riat taka. Khasikin Jisua kha imu an nuam tak tak sikin a don rangin tûm iban ichoin an suak taka. Baibila itûm hih Felna neh Pathian naihei rithla tianga an ratna entirna isir a lei nit. (Lapui. 92:12)

2) Thenkan Jisua chuanga rang Sakuartung chungheiah neh a fena rang lampuiheiah, an puan an dapa, thenkan sol an sata, lampuiheiah khan an dapa, khanchu Jisua kha Sakuartung chungah khan a chuanga tak a. Lompuihei khan Jisua kha choinrisangin an ipaia, “Hosana, Pumapa rilinga zuang chu inpakin om riseh. Ram zuang ithlung rang ei Pa Davida ram chu inpakin om riseh. Anchungtakah khin Hosana” itin an ikhek a nit. Hosana ti chu saninring roh tina a nit.

3) Hi zoro hi Kalkan Kût zoro a nita, Judahei nuaidap inika neka tam Jerusalema an ife ngai a nit. Ruaituhein ithat an tum iti khom a riat lenga. Nikhomseh, Messia a nitna mitin riatah inlang rangin huaisen takkan Sakuartung chungah chuanga Reng angkana langin lût khomseh, **“RINGEINA RENG”** nitna silin ai lût a nit. Renghein Sakuartung chungah an chuanga chu ringei an nuam tina a nit a, Sakor chungah an chuanga chu ridoi an tum tina a nit. Jisua chu ridoina Puma angkan ni loin, ringeina Puma angkan Jerusalema ai lût a nit.

4) Sakuartung chungah chuanga Jerusalema chu a lût taka. Ama hih Zanthla Zakaria thu lei rillok a hong idikna a nit (Zakaria 9:9). Jisua chu Israel Reng angkan chubai an lei una, Davida Rengram inding ranga hong angkan an lei itung a nit.

5) Zion nainu ti hih Jerusalema neh a sunga omhei isirna a nit. Jerusalema hih History neh Thuthlung Lui Theology bul a nit banah Pathian lei irthlang khopui rithiang a nit. Nikhomseh Krista khah thina ata a thoinok nungah khan chu nuai Jerusalema ni khai loiin, rivan Jerusalema a ikhin tâk a nit.

6) Jerusalema a lut zoroa lei ilomtuhei ngei khah Krosa hemde noktu an inlit angkan atunlai iamtu, Saninringna dongtuhei ngir hih Krista noltu ei inlit nok thei a nit.

7) Jisuan Sakuartung chungah inlal takka chuanga Jerusalema ai lût angkan, atunlai iamtuhei ziangah hin inlal takkan ei ziangah lût ai nuam a nit.

8) A damlai sùn hek rang tiang voikah mang mang inlalna tluk isila Jerusalema khopui rithiang ai lût angkan ama iamtuhei khom nikhuakah chu inlalna puan isilin nuai ram ima'n khopui Rithiang, Jerusalema ithar ei lai lût rang a nit. La phuatua khomin, Nena tum ban choia, O, Salem thar rifang ki ngakmo a ti.

Jisua Thoinokna (Easter Sunday)

(Lk. 24:1-35)

A thu tlangpui: Thoinokna hi Kristianhei ringatna lungphum idet tak a nit. Thoinokna hi om no sela chu Kristian sakhua ti hih rammualah om no nih. Thoinokna hi thil rikhel tak khatkah a nita, Krista neh a sinthotheina rianohei ta rangin chu iam intak tak a nit. Ringna hih thina boin chu arkip ino a nita, thina khom thoinokna boin chu arkip ino a nit, thoinokna khom Krista zara roinpui takka thoinokna a nit non chu arkip ino a nit.

1. Thoinokna iam intak: Tianlai Judahein chu ra masa ruaithe hi kum tin an nei ngaia. Kha ni a khan chu butelhei hi an hong choia, Pumapa maah an ilan ngai a nit. Kalkan kût a rithoka a sun thumni a nit. Khante, Jisua kha ithlanah iphumin a oma, thlan sungah a zal lai khomin a thihei laiah thu a zu sira, a koilomhein “ARKHELNA” an tia. A thi lai lakah khan rammual a hong inthima, ninu a hong ininga, puanzarhei a zuang tlera, a roinpui tak taka. Thoinok kiti lak teh a ti ngeia, a tak tak chu ai nit rang mani, an tia.

2. Thlan sung an en: Khante, zing takah khua a la var ma'n, Mari Magdaleni (Magdala rama mi), Joani neh Marihei kha thlan ien rangin iti pumin an fea. Thlan lak kha zan khua vara sipaihei iveng a nita. Khante, ithlan an hei tlungin chu a kharna lung kha inlumpain an mua, Petera khan thlan sung kha a hei enin chu puanzel ban chu ite dang mu maka. Vantirton puan ngoi isil hi a lei ithunga, an ti tak taka. Khanniseh, ani khan, ti no rei, Jisua nin izong khah hin om khai make, a thoinok tak, a ti a. Khanchu, an rualhei iril rangin an itlana, an hei itlan laiin Jisua lampuia an ritongpuia, “CHIBAI” a ti a. Khanchu, Mari Magdaleni ziangah an lara, kha zoin EMAU lampuia malrifakahei ziangah neh koilomhei ziangah an lar noka. Voi itam takkah an ziangah an lar sikin a thoinok nget iti an riatinfela, ringlana sip Thoma khomin a iam indet taka. Kha angkah khan, Krista neh rizomna det ineihei chu netu ringnun inein ei lai thoinok rang a nit. Thi nikna khan ei chungah thu nei thei khai no nih.

3. Thi nunga thoinok: Pastor Wilkerson-in a thi tak a thoinok thu a sirna a khan, Indonesia ramah mi khatkah sun nik ikaia lei ithi tak a oma, a nam khom a siat ok taka. Ram lumna rama omhei chu dan naranin an thi nia rithokin darkar 6 nungah chu taksa hi a siat riphuta, a nam khom a siat tak ngai, a ti a. Khante, voikah chu lusun insungkuahei bulah kin ithung laiin Pathianin ki lungrilah ifiang larkan a thi kha uap unla, la sakin zai rei, khanchu a thi kha kai ithoi ki ti, itin ki riata. Khanchu, Pumapa, lungril rithiang nen nei inla, kin laiah zuang om roh, ki tia. Khante La voi 7/8 kin hang sakin chu a hong changa, a thoi taka. Khanchu, a t̄hunghei ziangah khan, “Jisuan rinengah a ne inkir nok tak a nit, ki suapuihei, thil poimotak nangni ril rang ki nei. A khatnah chu, thi nungah hin ringna hi ai mong zel ni loin, a bul arphut rang chak hi a nit. Sun nikah ki thi a nit iti ki riatinfel. A niknah chu rivan ram neh dukmun hi ai om tak tak a nit. Ni damlain, Jisua ni nei non chu dukmun inrit takah ni fe rang a nit iti reh roh” a ti a. Khasikin, thoinokna hi Jisua sikin ai om nget a nit iti hih a lei ritemheia rithokin ai felin ipom indet ai poimo ti tak a nit.

Pentikos (Sinthohei 2:1-21)

A Thu tlangpui: Tianlaia khan Israelhein kum tin voi 7 (sarikah) Kût ruaithe an nei ngaia. Kha hei khah hi hei hih a nit.

- | | |
|-----------------|---------------------------|
| 1) Kalkan Kût | 2) Pentikos Kût. |
| 3) Ritlanni Kût | 4) Bai cholh tångino Kût. |
| 5) Totorot Kût. | 6) Dangdi Kût. |
| 7) Ramasa Kut. | |

Hi hei laia a nikna PENTIKOS KÛT iti hih risei ranga ei inuam chu a nit.

1. Pentikos Kût: Pentikos iti hi Grik tong a nita, a sun 50na tina a nit. Kalkan Kût a sun sarini RAMASA ruai an itia rithoka tepa a sun 50na a hong chuk kaneh an imang ngai a nit. An mang ngai dan nek nek chu Levidan itepin ire thei a nit. Jisua thi zoro kha Kalkan Kût zoro a nita, kha zoroa khan Jerusalemah Judahei murdi neh ram danga omhei murdi khom an hong, hi Pentikos Kût hih an imang ngai a nit.

2. Iti neh Rithla vain an om: Khante, Jisua koilomhei kha ite neh rithlavain an oma, Judahei lakin iman itumin an zonga. Jisua Krista khan OLIVE tlangah rivan tiang a fe rang toa, a koilomhei ziangah, Jerusalem mah no rei, Pathian thil inkung ki isir nin iriat khah lei ngak rei, ai ti khah an lungrilah an riat lenga. Jerusalem chontan inchungtakah khan ite neh rilonthing pumin an oma, Pathian thil inkung Thlangamtu ne pe rang ai ti khah im ai nit rang tak na! an ti a.

3. Thlangamtu a zuang tlung: Pentikos ni a hong tlung taka. Judahein an tho ngai dan angka an omna in heia khan Pathian lekhabuhei an tepa, an tongtaia, La an saka, thiampuhein maichamah thil an lana. Koilomhei chu a ranin in khatka ta ahin an ithunga. Kha zoro takah khan a koilomhei omna neh an rualhei omna in khah a hong ining dur dur taka, chontan sungah khan ilei i-ang zekkan mei angka an ziangah a zuang inlara, an lu chungah a chuang chit taka. Khanchu an lungril lomnan a hong sip taka. A tong murdi khah Galili rama mi an nita,

nikhomseh, tong dang dang neh ram dang danga mi neh khualmi danghei thusir khah arngaituhei murdin suakpui tong angka chitin an riat sikin arkhel an ti a.

Zanthla'n a lei isir "Sun nungkhonah chu mi murdi chungah ker-thla bun ki ta" ai ti kha a hong itlung tak a nit hih te....an ti a. Kha nia rithokin chu tina neh indopna nei khai maka, an rithla arngama, ihai takkan Pathian thu an isir tak.

4. Rithla petu Rithla: Pathianin Rithla a zuk itir khah a iamtuhei iompui ranga a zuk itir a nit. Koilomhein idiar ngeika an lei ingak khah Rithla ringamna an muna chu a nit. Khasikin, Rithla Rithiang chu a iamtuhei iompuitu, thlangam isaktu, invartu, inngamtu neh thusir theina ritha petu a nit. Rithla Rithiang nei inohei chu Pathian Naiheia be nimak iti Pathian thu'n a ne inrisei a nit.

Risei rang – 31
Krismas Lom om
(Mt. 1:1-21, Lk 2:1-52)

A thu tlangpui: Krismas hih rammual pumpuia iamtuhei ranga kumka sunga nikhua roinpui tak a nit. Ei ram tlanga Koindang omna tin khomah Krista suak lomna entirnan mipuin ruaitheina nein hi ni sun hih ichâmin ei imang ngai a nit.

1. Pathian thiltum roinpuizia: Pathianin a Naipa lungthlung tak Jisua Krista a khan a thiltum rithup inlangin a oma. Pathian mangrua ranga a lei inrifuk zanthla itam takkan Krista (Messia) suak rang thu thang an lei itheia, Baptistu Johana khomin thang a lei îthei a nit. (Mk.1:2-7). A zuang inzirna rang nungak rithiang Mari neh Josefa a lei inrifoma, thini denin rifom takkan a lei inrifuk a nit. Kha angkan Judai ram Bethlehemema Saninringtu Krista chu a zuang suak tak. Nikhomsela, Krista suak ni hih mi tam takka hei Saninringna neh rimangna a nit.

2. Buaina neh lungkângna ni a nit: Birip (December) thla hi a tlangpuin lomna, buaina neh lungkangna ni a nit. Jisua Krista suakni (Birthday) ei imang hih mivar lekhathiamhei rilfia dan chu a nuaia angkah hin a nit.

1) Ram tina Kristian a ðenhein nunkhohoia nikhua an mang ni a nit.

2) Sumpuan tham intam ni a nit.

3) Ranhein an ringna an ichan intam ni tak a nit.

4) Naihein Nu neh Pahei chung a ngencho risang ni a nit.

Hi sikah hin Thurchi ðha mitin ta rang iti hih iamtuhei laiah, a lut dan iria izakam om an ti ti hih mimal chita risutfia ðul tak a nit.

3. Birip 25 hih Krismas ni nimak iti selna: Palestina ramah chu fur hih Thlaphal (November) thla bul ata Ritun (March) thla ten hih a nita. Khasikin, ingkanim Berapuhein Bera vengin zanah phulah an riak thei ranga? Hi sikah hin Tharlak (April) thla ruaitui tlakma hi iiam a om ual. Khabanah, Birip (December) thla furlai zoro takin chu inzin vel an tak rang sikin

ram optun riteppui (census) itho rangin thu isua no nih, iti a nit. Nikhomseh, hi thu hih an sut ok nungin Birip (Dec) 25 ni hih a tlangpuin Krismas ni tia mang a nit. Kha angkan 25 ni hi an riziakna masatak chu Philocalian Calender Rom mihein, A.D. 336 vela an lei imangah kha a nit, Kha ni ata chu Birip 25 nia hin Krista chu Judai ram Bethlehemema a suak iti a nit tak.

4. Mang dan ri-ang nona: Birip 25 hi a tlangpuin lei imang ni khomseh, Koindang dang dangah neh mun ðhenah chu mang dan a danglama, khasikin a ðhenin Vatchang (Jan) 6, Ritun (March) 28, Tharlak (April) 18-20, Idoi (May) 20, Ritang (Sept) 29 hei hih an lei imang a nit.

Khante, mang dan mumal a om rak khai no nungah khan Jerusalem Bishop St. Cyril khan Rom khopuia Bishop JULIUS ziangah khan, i nikhua tak him imang niseh a idik tak rangin ni iam? itin a hang ridona. Ani khan, lei imang tak Birip 25 hih a dik tak rang neh a ðha takin ki riat itin a sama. Khaten khomah khan Jerusalem tianga Koindanghein chu A.D. 549 idenin Vatchang (Jan) 6 ni hih an lai mang mai a nit. Khante, Julius thi nungin Rom Bishop LIBERIOUS a khan mi murdin Birip thla 25 hih Krista suak ni dik tak angkana mang riai rang takin thu a sua taka. Vuani ten idenin ei imang mai tak a nit.

5. Krismas iti hin iðang itamkah a nei: Hi hei hih Krismas thu neh arman a nit. 1) Krismas Rose, 2) Krismas Tide, 3) Krismas Box, 4) Krismas thilpek siana, 5) Krismas Cactus, 6) Krismas Daisy, (18th centurya Misonarihei lei imu suak), 7) Krismas Tree, 8) Krismas Card, 9) Krismas Father. Hi hei sungah hin chi nikah a thurchi ibelsa'n isir a nit.

a) Krismas Tree: Hi Krismas tree ti hih ngaidan tlangpuin MARTIN LUTHERA itho suak iti a nit. Krismas zoro, zan zing butin ifarthing omna munah a va fea. Khante, chungtiang a hang tangin chu thingna phaivua isem inning siai siai hei kara si-ar ritle sap sapka var hi a hang mua, a en a hoi a ti tak taka. Kha mun ata a suakin chu thing iðangte a khiaka, naipanghei lom rang neh en rangin a thil mu kha insungah a

siam, thing itangtea khan patchon, ivur entirna neh sathai meiser entirnan a khop tak a. Hi tho dan hih Martin Luthera thi nung khomin a thotu dang tute iria ni khai mak iti a nit. Kha angka atunlai khomah hin a then itam takkan chu an in kolheia neh insungheiah an siam ngai. Khabanah, nuhein Biak ina thingher an lei ichoi ngai khom khah Martin Luthera rithok ningati iti an iiam a nit.

b) Krismas Card: A siam masatak chu J.C.Horseley a nit. Kum 1843 a khan a rualtha Sir Henry Cole ranga ai siam a nit. Kha Card sungah khan sungkua om khom hei lem a siama, a nuaiah khan **“Krismas lomom neh kumthar raifan iom chubai nang kin un”** itin an chuanga. Kum 1862 khan London press **“Charles Goods all and sons”** an itia khan izuar thei rangin inson a nit. Kum 1865 a khan Loius Pravy’n ranga vo a phut. Kum 1875 a khan America (USA) ramah imang iphut a nit.

A siamtun ai tum tak chu Jisua Krista hih Ringei Reng a nit zia inlang ai nuam a nit. Khasikin hi Saninringna nikhua roinpui tak miriamhei ziangah ilan ai nit angka insungkua ringei tak neh inrual takka mang hih Pathian thiltum rithup inlanga om chu a nit. Hi sika hin a nit La phuat khomin, a then lungril ina khom dam rise ai ti a nit. Hi card hih a tunlaia ei mang dan neh a thil tum hih rinai sai ino angka a ilang a nit.

6. Minriseitu: Krismas, tum ita taka mang inuam nin om im? Krismas ingkanim imang nin itum? Krismas mang indik thei nget rangin inria tum rang a nit.

7. Tongtaina: Lung ne thlungtu kin Pathian, kin Reng Jisua Krista suak ni, ne hong ithluntu Pathian ni nit sikin lomthu kin isir. Ilom takka mang thei ranga ne tangpui rangin kin Reng Jisua rimingin nang kin ngen, Amen.

8. Richang Spel: Mt. 1:21. Naipa nei a ta, arming Jisua ni sak rang a nit; ani khan a mihei an soal ata ai saninring rang a nit,” a ti a.

9. Tongridon:

- 1) Krismas iti hi im a omzia? (Krista ruaittheni).
- 2) Birip 25 hih Krismas ni dik taka mang rangin tum an puang kha? (Rom Bishop Liberious)
- 3) Krismas itang itia rithokin ni riat tak inikah sam roh.
- 4) Krismas Card siam masatak khah im ar-ming? (J.C.Horseley).
- 5) Krismas card hih tik kuma siam mani? (Kum 1862).
- 6) Krismas card an insonna khah im ar-ming? (Charles Goods all and sons).
- 7) Krismas card hih a siamtun im a inentir nuam tak? (Krista Ringei Reng a nit zia).